

وَايَّةٍ مِنْ لُؤْلُؤُ مَرْزِقٍ

وَايَّةٍ مِنْ لُؤْلُؤُ مَرْزِقٍ

بیت لکتاب
book-spring.com
عیش مع الکتب

بیت لکتاب

کتابخانه

ایہاں مفتوں

book-spring.com

إيهاب معوض

وَإِيَّيْهِمْ مِنْ لَوْفِ مُرَرٍ

why MEN Love MoZZAZ



مقدمة

* زيه زي كثير من الرجالة، اختار مراته بعقلية أبوه، زوجة محترمة عاقلة بنت ناس، تقدر تصون البيت وتربي العيال. مرت سنين واتحقت الأحلام الصعبة التقليدية، وصحي من النوم مفزوع لَمَّا اكتشف إن اللي نايمة جانبه هي أمه، نزل زي المجنون يدور في الكافيهات، وغرف الشات، وذاكرة الموبايل على واحدة عكسها في كل حاجة.

* زيها زي كثير من الستات، اتربت على إن كل حاجة عيب وغلط وحرام، اتعملها - بدري أوي - ختان لجسمها وأنوثتها وعقلها، عيب تندلعي، غلط ضحككتك يكون ليها رنة، حرام تحطي مكياج حتى ولو كنتي طفلة بتكتشف أنوثتها لأول مرّة أدام المراية.

* على الكافيه اللي دايمًا تحت البيت شاقها لأول مرّة وهي بترقص بمنتهى الحرية على أنغام الشيشة، تهاصيلها المباحة

المستباحة أجبرته يديها دور الكومبارس في مسرحيته
الفاشلة بالوراثة، زوجة ثانية، عشيقة تالته، حبيبة رابعة.
* في قفص الحياة.. الثلاثة محبوبين على ذمة نفس القضية -
التطرف - والقاضي العادل كالعادة بيديهم تأييده أبدية مع
الرافة، والعيال بتنزل تكمل المسيرة.

طب والحل؟

نحاول نوصل لإجابة السؤال: واي من لوف مُرز؟
يلاً بينا (سمايل فيس مطلع لسانه).

البداية

الأستاذ إيهاب محرر باب بريد الغرام.

تحية طيبة وبعد،

أعلم أنها المرة الثالثة التي أبعث لك بنفس
الرسالة.. وأعلم أيضًا أنك لن تُجيب كالعادة..
ولكن أستحلفك بالله أن تجيب هذه المرة فيتي
على وشك الانهيار.

أنا سيدة مرموقة وجميلة، في بداية الثلاثينيات
من عمري.. تزوجت منذ عشرة أعوام من شاب
يكبرني بعامين فقط، وبدأنا معاً رحلة الكفاح، حتى
أنعم الله علينا فأصبح هو رجلاً ناجحاً ومشهوراً،
وأصبحت أنا وكما أخبرتك سيدة مرموقة.

بدأت مآساتي يا سيدي من بداية الخطوبة، حين
اكتشفت أن زوجي مُدمن بنات.. أيوه مُدمن بنات..
قررت وقتها أن أتركه، ولكن حبي الشديد له منعني،
تجاهلت نصائح كل من حولي وخصوصاً أمي التي
أقسمت إنه لن يتغير قائلة: «يا بنتي ديل الكلب
عمره ما يتعدل». طبعاً رفضت وقتها تشبيه خطيبي

بالكلب: «يا ماما خطيبي مش كلب.. هو يمكن ذئب
شوية لكن أنا واثقة إنني هاقدر أغيره». وانطلقت إلى
حياتي معه لأحارب كل يوم في جبهة مختلفة..
فاليوم يخونني مع صديقتي، وغداً مع جارتني، وبعد
غد مع إحدى قريباتي، وبعده مع أي واحدة.. بنت
البواب ماشي.. مرات البواب ممكن.. أم البواب
ما يخسرش.. جدة البواب (لا دي ما عجبتوش)!
أعلم أنك الآن تريد أن تسألني: ولماذا لم تطلبي
الطلاق؟

هاقولك: أكثر من ٥٠ مرة طلبت الطلاق، وفي كل
مرة كان يركع تحت رجلي ويعلم ندمه ويتوسل
ويحلف إنه هيتغير ويطلب مني أساعده، وأنا للأسف
كنت باتراجع، مش بس لأنني باحبه، لكن كمان لأنه
بيحبني موت وكريم معايا جداً، ده غير إنه بيعمل كل
حاجة علشان يرضيني، ما اكذبش عليك أنا قابلت
نوعية جوزي كثير، وشفتها في ناس حوالني لدرجة
إني ابتديت أصدق إن جوزي حالة عادية والمفروض
أتعايش معاه على كده.. لكن أبداً.. هيهات أقبل
أعيش كده.. أنا عندي كرامة.. بس باحبه!
أستحلفك بالله أن تجيب عن ذلك السؤال الذي
بات يشقيني أنا ونصف نساء الأرض:

Why Men Love Mozzaz?

الحاترة

روح

* * *

دي الرسالة المأندلة اللي جاتلي وكانت السبب في لخبطة
حياتي وتغيير مسارها.
يوميها دخلت عليّ المكتب الأستاذة رانيا؛ رئيس التحرير،
وهي ماسكة الرسالة - بعد ما اكتشفتها على إيميل المجلة.
وقالتلي:

- إيه يا أفندي الاستهتار اللي انت فيه ده؟ إزاي ما تردش
على الست دي اللي بعثلك مشكلتها ٣ مرات؟! أمال انت
بتشتغل إيه في المجلة؟

حاولت أقنعها إن عندي آلاف الرسائل، وصعب جداً أرد
عليهم كلهم - ودي فعلاً الحقيقة - بس الغريبة إن كلامي استفزها
أكثر وردت عليّ:

- أيوه ما هو ده اللي انت فالج فيه! آلاف الرسائل.. آلاف
الرسائل.. بس ممكن تقولي إمتى ردّيت على مشكلة
محترمة؟ مفيش طبعاً.. لأن كل ردودك إما على بنت تافهة
مصاحبة ١٥ عيل ومش لاقية فيهم عريس ينفع، وإما على
شاب تافه مش عارف يمسك إيد خطيبته أو يبوسها.. صح؟
للمرة الثانية حاولت أقنعها بمدى أهمية المشاكل اللي من
النوع ده، وأفهمها إن دي تقريباً كل مشاكل الجيل بتاعنا. بس
للأسف برضه ما اقتنعتش وثار في وشي:

- هي كلمة ومش هاكررها: لازم ترد على الرسالة دي،
وهاديك مهلة أسبوعين.. تقدر تعترهم أجازة أو بروفة

على الاستقالة لو حبيت، بس ما ترجعش المجلة دي غير
برد محترم، وحذاري حذاري تجييلي رد من الدكاترة أو
الشيوخ بتوعك اللي ماليين الفضائيات؛ خلاص الناس
زهقت من ردودهم النظرية التقليدية المكررة الرحمة..
أووف.. همّ العباقرة دول ما بينزلوش الشارع يشوفوا
مشاكل الناس، ولأ فالحين بس يترجموا الكتب الأجنبية
وينقلوها زي ما هي؟! آل خلاص يعني مشاكلنا بقت زي
مشاكل الغرب!

جاتك البلا ولية مسترجلة.. إنتي ست انتي؟! دا انتي ست
اشهر على رأي «عبد الفتاح القصري»! وعلى فكرة بقه.. أنا
عارف انتي ليه مهتمية بالرسالة دي بالذات.. آل يعني ضميرك
واكلك على قراء المجلة.. إنتي يا هانم ضميرك واكلك على
جوزك اللي كل يوم بيصاحب عليكي واحدة، دا متجاوز نص
مُحررات المجلة عُرفي.. بس بصراحة له حق، وكويس أوي إنه
ما طلقكيش لحد النهارده.. بس انا بقه مش هارحك وأجاوبلك
على السؤال اللي تاغبك أكثر من صاحبة الرسالة!

الكلام ده طبعًا باقوله لنفسي مش لأي حد ثاني!!
بجد أنا هاتجنن! مش عارف أعمل إيه.. معقولة هانزل
الشارع أسأل الناس ليه الرجالة بتحب الستات.. طب ما هو
بالعقل كده لو الناس دي عارفة الإجابة ما كانتش المحاكم
اتملت بقضايا الخلع والطلاق، أنا كان مالي ومال الشغلانة

المهيبة دي.. الله يخرب بيت الواسطة اللي عملتني صحفي
بالعافية. بس للأسف خلاص ما بقاش ينفع أستقيل.. عليّ
أقساط تدخلني السجن.. مفيش فائدة لازم أشغل دماغى.. بس
تسأل مين يا ابو إيهاب؟ تسأل مين يا ابو إيهاب؟ أيوه لقيتها..
لازم أسأل واحدة محترفة.. واحدة ست ليها تجارب وفاهمة في
الرجالة.. هي دي اللي ممكن تفيدني وتدينني الإجابة المضبوطة،
بس دي هاجيبها مين؟ يا رب علشان خاطري واحدة محترفة..
دا انا عليّ أقساط وعندي عيال عايز أريهم!

- مالك يا أستاذ؟ إنت بتكلم نفسك ولأ إيه؟!
- يا عم جل عن نافوخي دلوقتي.. أنا مش ناقصك! وروح
اعملي فنجان زفت!
- بكفياك زفت يا سي إيهاب.. هههه.. إيه اللي مزعلك بس
يا ريس؟
- أبوس إيدك بلاش شغل الحاجة أمينة ده! واخلع دلوقتي
من أدامي.

- يا باشا احكي لي وفضفضلي يمكن أقدر أساعدك. مش
بيقولوا: يوضع سره في أهيف خلقه.. هههه.
- لا يا عم مدكور ما تقولش على نفسك كده، إنت عمرك
ما كنت هايف، إنت يمكن تافه حبتين، ومتخلف ٣ حبات،
بس ده ما يمنعش إنك ساعات بتقول دُرر.. طب اسمع.. أنا
هاقولك بصراحة.. عايز أقابل واحدة ست محترفة.

- يا سلاام.. غالي والطلب رخيص.. خد يا سيدي.. ده تلفون
أم منال، مره بقه إنما إيه.. غول على السرير.

- غول في عينيك وعين أهلك، باقولك محترفة يعني بتفهم
في الرجالة.. مش بتفهم في السراير يا مُراهق! اجري غور
اعملي فنجان قهوة.

- خلاص يا باشا ما تزعلش نفسك، هاشوفلك واحدة غيرها
بس خد عفر.. واحدة كليوباترا إنما إيه.. لطشتها من الأستاذ
حلمي بتاع الأرشيف.

- كليوباترا! أيوه.. كليوباترا.. برافو عليك يا عم مدكور..

هي دي الست اللي هتجاوبني على السؤال اللي محيرني..
هي دي الست اللي قدرت توقع أنطونيو وتخليه بيع روما
علشانها.. أبوس إيدك قولّي ازاى ممكن أقابل كليوباترا؟
- (يا حول الله! الراجل لسع يا جدعان).. ربنا يزيح عنك
يا أستاذ إيهاب.

- باكلّمك بجد يا عم مدكور.. قولّي ازاى ممكن أقابل
كليوباترا؟ أنا مستقبلي هيضيع.

- شكلك بتتكلم جد يا أستاذ.. يبقى على كده بقه لازم
نشوفلك واحد من اللي بيحضروا الأرواح.. يحضرك
روحها وتسألها زي ما انت عايز.

- مش باقولك مُتخلف.. تحضير أرواح إيه يا جاهل في القرن
الـ١٩٢١!

- (أنا اللي متخلف برضه يا لاسع).. والله يا أستاذ ده الحل
الوحيد، وعندى اللي يحضرك روحها كمان.
- وده مين إن شاء الله فلتة عصره ده؟

- الشيخ بهلول.. شيخ مشايخ طنطا.. والله يا أستاذ ما في جنس
بني آدم راحله في مشكلة إلا وحلها، ياما ستات ما كانتش
بتخلف وخلاهم يخلقوا، ياما رجالة مربوطة وفكهم، ياما
فك أعمال، ياما حضّر أرواح، ياما حل عقد وعالج بني آدمين
فشل معاهم أجعصها دكتور، رُحله يا باشا وجرب مش هتخسر
حاجة، وأهي برضه معلومة تبقى تحطها في الباب بتاعك..
ده عنوانه في طنطا.. خليه معاك وفكر براحتك، ولو ما نفعلش
أم منال برضه في الخدمة.. هههه.

- هههه.. طب اجري يا فالح هاتلي القهوة.

شبيك نبيك .. بهلول بين ايديك

في إحدى القرى النائية بمحافظة طنطا، والتي يقطنها آلاف البسطاء، كانت تبرز عيادة الشيخ بهلول.

بناء عتيق يُشبه من الخارج المصححات النفسية التي كنا نفرع منها في أفلام السبعينيات.. أعمدة بيضاء متهالكة تحمل قبواً أجوف يجعل للأصوات صدى يُشعرك بالرهبة.. ارتفاع البناء الأسمتي وسط البيوت القصيرة والمبنية من المواد العضوية يُشعر الزوار بضعفهم، ويثير بداخلهم الخوف، ويجعلهم مؤهلين للسمع والطاعة وتصديق كل ما سيملى عليهم لاحقاً.

ولكن من أين أتى بهلول بثمن هذا المبنى المهيب؟ هل ورثه عن أبيه الثري؟

لا أظن.. فلو كان الأب ثرياً ما خرج علينا الابن بتلك المهنة الوضيعة.. ولكن الإجابة ستبدو واضحة بمجرد دخولك صالة الانتظار.. عشرات الأشخاص المتراسين في التصاق والطامحين في مقابلة «راسبوتين طنطا»!

لا بد أنهم سيدفعون له الكثير لتحقيق أحلامهم.. إذن فليس غريباً أن يشتري مبنى كهذا.. كده بقّه فهمت. مكتب خشبي شديد القدم، يجلس عليه هيكل آدمي، كأنه رجل.. نعم هو رجل لكنه متهالك ونحيف تمامًا مثل مقعده الأثري، ذكّرني هيئته بعادل إمام في أدوار صبي المحامي في المسرحيات القديمة.

من الواضح أن مهمته هي إدخال الزبائن بالترتيب للشيخ العلامة.. نعم هو بالفعل الرجل المخوّل بذلك.

بالطبع لم يكن بإمكانني انتظار دوري وسط هذه الأفواج الحاشدة، لذا فقد اعتمدت على مظهري الذي بدا مختلفاً عن الجميع، بالإضافة إلى عشرين جنيهاً أعطيتها للحاجب الطيب جعلتني مؤهلاً للدخول قبل الآخرين.

في الغرفة المظلمة لم يكن من السهل اكتشاف مكان الشيخ المخفي بين خيوط الدخان الكثيف، لولا صوته الذي بدأ يُجلجل، بمجرد دخولي، بالعبارة التقليدية: «حي.. حي». صوت جهوري يجعلك تُدرك قبلته في الظلام فتوجه إليه خاضعاً خاشعاً مُستكيناً.

- تفضل يا بُني بالجلوس.

قالها وهو يُلقي بالبخور على الأخدود.

- ألف شكر يا عم الشيخ أنا مستريح كده.

- تمجلس يا بُني ولا تثير علينا الأسياد.

- يا سم فكك من موضوع الأسياد وشغل التلات ورقات ده..
ولأ أقولك خد الـ ١٠٠ جنيه دي علشان نعرف نتكلم مع
بعض بصراحة.

- السماح السماح.. يا أسيادنا جاهل مش فاهم.. يا بُني خد
فلوسك وقولي انت عايز إيه بالظبط!
(وأخذ مني الفلوس).

- أيوااا.. كده نعرف نتفاهم.. شوف يا مولانا.. أنا عارف
إن حضرتك - من غير زعل يعني - راجل دجال ولا ليك
كرامات ولا شفاعات، وإلا كنت نفعت بيها نفسك بدل
ما انت قاعد القاعدة دي.. بس بصراحة الفضول واكلمي
وجايلك علشان أفهم انت ازاي بتقدر تقنع الناس دي كلها
وتريحهم بالوهم بتاعك ده؟

- جاهل.. غبي.. مغرور.. عايز المساعدة ومكسوف تقول..
قوم.. قوم.. اخرج برّه بدل ما أعفرتك وأمشيك على إيدك
ورجليك.. قوم.. قوم!

- يا عم بالراحة شوية ما انا قُلتلك ما باكلش من الكلام ده،
وبعدين طالما انت مكسوف عنك الحجاب وواصل كده،
طب ما تقولي أنا جايلك ليه، وتوريني كراماتك!

- إنت جايلي يا غلباااا علشان جُرنالك العدماء.. عايز
تعرف ليه الرجالة بتحب النسوان، كفاية ولأ أقول كمان؟
- الله.. الله.. الله.. دا الموضوع باينه قلب بجد.. إيسيه؟ هو

اللي بنعمله في الناس هيطلع علينا ولا إيه؟! إيه يا عم انت
عرفت الحاجات دي منين؟!!

- خلاااص.. خِخلص الكلام.. اطع بره.. أوام أوام.. حسيبي..
حسيبي.

- يا عم أنا آسف وادي راسك أهني (وادّيته ٥٠٠ جنيه تاني)
بس قولي انت عرفت الحاجات دي ازاي؟ أنا هاتجنن!
- هات جاتك البلا (وأخذ الفلوس).. أنا هاقولك بس علشان
جاهل.. وغلبان.. وعدمان.. حي حي.. بس خلّي بالك قبل
ما تمشي من هنا هاكون نسيتك كل اللي عرفته.. اتفقنا؟
- حقك يا باشا ما انت لسه واكلمي مقص حرامية.. اتفضل
قول واملني شروطك.

- شوف يا إيهاب يا ابن إجلال، وما تسألنيش عرفت اسمك
واسم أمك ازاي، لأنني مش هاقولك.. لكن هاعترفلك
بحاجات على أد فلوسك.. أولاً أنا أصلاً ما اسميش
بهلول، والدقن والجلاية دول لزوم الشغل، زي ما بتشوف
بالظبط في الأفلام.. أنا اسمي الحقيقي بهاء.. دكتور بهاء..
وامتياز دُفعتي في طب عين شمس تخصص علم نفس
اجتماعي.

- أفندم!!

- أرجوووووك بلاش تقاطعني أنا ما صدقت افتكرت..
وسيبني أكمل بدل ما أنسى اللي كنت ناسيه أصلاً.

أنا من مواليد المحافظة دي - طنطا. اتولدت واتربيت وعشت فيها، بس طبعا درست عندكو في القاهرة، ورفضت كمان التعيين في الجامعة، قلت أرجع بلدنا أبيع الكام قيراط اللي سابهملي أبويا وأفتح عيادة نفسية، على أساس إنها حاجة جديدة في البلد وتخصص نادر، وأهو بالمرّة أبقى جنب أمي أراعيها وأخذ بالي منها.. فتحت العيادة، وكتبت عليها الاسم بسلامة نية: «العيادة التخصصية النفسية».

- يا أستاذ بهلول وحياتك أبوك كفاية اشتغالات.. أنا مش مصدق ولا كلمة من اللي بتقولها.

- هتسييني أكمل ولا تاخذ فلوسك وتمشي؟

- طب اتفضل كمل لما اشوف آخرتها معاك.

- كتبت الاسم وما توقعتش إنه هيكون السبب في تدمير عيش مستقبلي!

- إزاي يعني تدمير مستقبلك؟!

- كلمة عيادة نفسية نزلت على أهل البلد زي الصاعقة.. الحقوا يا ولاد مستشفى المجانيين فتحت عندنا.. الحقوا يا ولاد دكتور المجانيين أهو.. واتقلبت البلد كلها فوق دماغني، اللي بقى يخاف مني، واللي بقى يعزل ويشترى بيت تاني بعيد عن عيادتي، ويا ويله يا سواد ليله اللي كان يبجي يزورني من جيرانني أو أهلي.. علطول ياخذ لقب مجنون.. طبعا أنا ما استحملتش شهرين ورُحت قافلها وقعدت جنب

أمي في البيت أصرف من القرشين اللي فاضلين من وورث أبويا الله يرحمه.

- ما شاء الله.. طب بدمتك ده كلام يصدقه حد عاقل.. يعني حضرتك دكتور ومتخصص كمان في علم النفس الاجتماعي، أنا حاسس إنني قاعد باتفرج على فيلم هندي! وشوية شوية هتطلع أخو أميتابتشان.

- شوف يا أستاذ إيهاب.. إنت طلبت مني أقولك الحقيقة وأنا وعدتك بده.. مش لأنك تستاهل أغامر بنفسي واكشفلك سري، لأ، أنا باعترفلك لأنني محتاج من وقت للتاني أحكي لحد الحقيقة علشان ما انسهاش، وأنسى إنني دكتور بهاء، وأعيش طول عمري الشيخ بهلول.

- الله الله.. دا الكلام باينه بجد.. يعني فعلا حضرتك دكتور؟ معقولة!! بس ازاي اتحولت لدجال؟ آسف.. أقصد يعني عراف؟

- يا سيدي دجال عراف كلها محصلة بعضها.. بس صدقني الناس هي اللي عايزاني كده.

- إزاي؟

- ما انا لسه هاكملك.. في يوم من الأيام وبعد كذا شهر من قُعادي في البيت صحيت من النوم مفزوع على صوت جارتنا اللي ساكنة في البيت اللي جنبنا.. رُحت أشوف فيه إيه، لقيت ابنها عمال بيتشنج ويرفس بإيده ورجله، والولية

يا عيني مش عارفة تعمل إيه، وكل اللي طالع عليها: «ابني ملبوس.. ابني ملبوس.. أكيد أم محمود هي اللي عملته عمل علشان يتجوز بنتها». دخلت عليهم لقيت الولد فعلاً شكله غريب، ما بقتش عارف أعمل إيه، لكن حظي الحلو إني بأبص جنبه لقيت ورقة مختومة بختم النسر، وفهمت إنها استدعا للجيش.. علطول شخّصت الموضوع على إنه «Nervous shock» صدمة عصبية يعني، وطبعاً دي جاتله بسبب الاستدعا.. رُحت جايب حباية مُهدئة ودوّبتها في كوباية ميه وشربتهاله.. شوية وابتدى يفوق، قتلته يا عم مالك، كل ده علشان الاستدعا! طب ما كنت تقولي وأنا أشوفلك حد يخلصلك الموضوع.. وفعلاً اتصلت بواحد كان زميلي في الكلية أبوه عميد في التنظيم والإدارة خلّص الموضوع ولغى الاستدعا.. الجميل في الموضوع إن جارتنا - أم الولد - ما كانتش معانا في الأوضة، ولما دخلت ولقت ابنها بيضحك وفرحان، وافكرت إن آخر حاجة شفتها هي كوباية الميه اللي شربتهاله.. قالت بس.. الأستاذ بهاء فك العمل بتاع ابني.. وفجأة غيرت اللقب بتاعي من أستاذ لشيخ، لأنها طبعتا هي والبلد كلها ما كانوا معترفين بي كدكتور، ومشيت الولية في البلد تحكي عن كراماتي وقدراتي، وطبعاً نسوان البلد ما صدقوا حاجة يحكوا عنها ويضيفوا ليها، وفي ظرف شهر كان محسوبك بقي نار على

علم.. وبقي مكاني مزار لأي واحد عيان أو عنده مشكلة أو عنده حلم مش عارف يحققه، ابتديت أكبر وأتعرف داخل وخارج المديرية، لحد ما وصل اسمي للقاهرة وباقي المحافظات، وبقت الناس نجيلي من كل مكان، وأديك النهارده جايلي على الصّيت.. شُفت بقّه!
- يا سلااام! يعني الناس هي اللي عملت منك دجال؟! آسف.. أقصد شيخ؟!
- أيوه ما هيّ الناس كده.. دايمًا بتدور على قوة خرافية خارقة تحقق لها أحلامها بدون أي مجهود، علشان كده لما حلفت يومها لجارتنا إني ادبت ابنها مُهدئ للأعصاب.. قالتلي: «الشربّه وبعيد، لهو ابني معنون يا سي بهاء؟ إنت بس اللي بركة ومش عارف قيمة نفسك».
- بس تعالي هنا قولّي.. طب لما انت بتعترف إنك دجال، أمال عرفت عني المعلومات دي إزاي؟! يعني اسمي وهدفي من زيارتك؟
- ما هو ده الفرق بين الجاهل والمُتعلّم.. أنا لما لقيت الموضوع مشي كده وابتدت الهدايا والعطايا والنفحات تنزل عليّ، قلت ما بدهاش بقّه.. شيخ.. شيخ.. طالما الناس مبسوطه كده ومحتاجة شيخ، فوراً ابتديت أدرس وأجيب كُتب ومراجع عن الجن والأعمال لحد ما وصلت لطريقة تحضيرهم والتعامل معاهم كمان.

- هُمَّ مين؟

- الجن.

- إزاي يعني؟ أنا أعرف إن العلماء نفوا الكلام ده وأكدوا إن

الإنسان ملوش أي سُلطة على الجن.

- معاك حق.. مفيش بني آدم له سُلطة على الجن.. لكن ينفع

يستعين بيهم، وكمان يعمل معاهم اتفاقيات.

- اتفاقيات؟! إزاي؟

- أقولك إزاي.. كل بني آدم وله قرينه من الجن - شيطان يعني -

وانا بقه باخلي القرين بتاعي يستعين بالقرين بتاعك، ويعرف

عنك معلومات، بشرط إنك تكون انت عارفها عن نفسك،

وأكثر كدبة ممكن تصدقها هي الكدبة اللي بين جملتين

صدق.. يعني «اسمك إيهاب - هتلاقي بكره مليون جنيه -

من سكان القاهرة» دي كدبة بين صدقين.. يبقى هتصدقها

علطول؛ لأن الأولانية والأخرانية صدق جبتهم من قرينك،

واللي في النص كدبتي اللي لازم تصدقها.

- بس أنا قرئت مرّة إن الإنسان لازم يكفر علشان يستعين

بالجن.

- لأ مش لدرجة الكُفر.. بس أكيد لازم تقدملهم شوية

تنازلات.

- زي إيه؟

- دي خليها في وقتها.. لكن صدقني أنا عمري ما خدعت

حد، ولا طلبت من حد مليم.. بالعكس دول هُمَّ اللي كانوا

بيتحايلاوا عليّ علشان أقبل عطاياهم.

- سبحان الله! طب قولّي.. إزاي بتقدر تحقق للناس دي

أحلامهم، برغم إنك يا دوب بتقدر تعرفها من خلال قرينهم؟

- شوف يا سيدي أصل مشاكل الناس نوعين: نوع مادي

ملموس، ونوع نفسي محسوس.

- يا عيني على التقسيم والسجع؟! -

- هههه حلوة.. يعني لو جالي بني آدم عنده مشكلة نفسية،

والناس قالتله إنه ملبوس وعليه جن، يبقى الموضوع سهل

وكل اللي هاعمله إنني هأكدله الموضوع ومش هانفيه.. لأنني

لو نفيته هيسيبني ويمشي.. والحل شوية أدوية ومُهدئات

أخلطها مع العسل والأعشاب على كلمتين مش مفهومين

زي «شمخورش منهورش»، وبعدين أقوله شوية معلومات

شخصية عنه من اللي بيحبهاالي قرينه.. واشرب يا باشا..

وربك الشافي. زيارتين وأقوله مبروك الجن الهندي اللي عليك

خرج.. تلاقى الراجل قام يجري زي الحصان. بس يا سيدي

وخذ على كده خمسين حالة من نفس العينة، وعندك نص

البلد مرضى نفسيين. وفيه حالة تانية دايمًا بتجيلي وبعالجها

بسهولة: إلهي هي «الراجل المربوط»، وده يا إما شاب فشل

ليلة دخلته بسبب التوتر أو عدم الخبرة.. يا إما راجل كبير

وابتدى يتعب صحياً أو يمل من مراته. وعلاجهم الاتنين

واحد.. برضه أكدله إنه مربوط، وإن «فلان بن فلان» جاره اللعين عامله عمل مربوط في رجل قرموط في المحيط الموزنيقي مثلاً.. أي هبل وخلاص.. المهم تداري فضيحة الراجل أدام مراته أو الناس اللي معاه، وتأكدله الوهم اللي بيستخبي وراه، وبعديها أديله الكوباية إياها، بس المرة دي فيها قرص فياجرا على شوية أعشاب ياخدهم قبل ما ينام مع مراته بساعة، المهم أكدله إن الكوباية دي فيها فك العمل اللعين.. والغريبة إن الراجل ممكن يكون أخذ قبل كده كذا نوع من أنواع المنشطات ويمكن نفسها، بس ما جابتش نتيجة معاه بسبب حالته النفسية وضياح ثقته بنفسه.. بس المرة دي بتجيب نتيجة لأنني أكدتلته بالإيحاء إنه طبيعي.. يومين ويرجلي شايل مراته وداخل علي زي الأسد.

- يا سلام.. فعلاً يا أخي العلم لا يُكبل بالبتنجان.. طب قولني عيش بالنسبة للحالات اللي عيانة بجد؟

- شوف.. لو جالي مريض وانا أكدت إن مرضه عضوي باتصل فوراً بأي دكتور متخصص من أصدقائي اللي متعاقد معاهم، وأعرض عليه الحالة، وأستخدم الأدوية اللي يقولني عليها بنفس الطريقة.. مع العسل والأعشاب والإيحاء.. ومع اقتناع المريض بقدراتي الخرافية الخارقة وبركاتي وكراماتي، بيستجيب أسرع للشفاء وطاقته النفسية بتقاوم المرض أسهل وبيشفى.

- طب والأحلام والأمنيات.. بتحققها ازاي.. برضه بالعسل؟! - لا.. بالوهم.. يعني لما الفاشل أو الكسول اللي جايلي بيثق إن معاه قوة خارقة هتساعده.. بيتحمس أسرع وتتولد جواه طاقة أمل بتوازي الإحباط اللي بتعملهوه البلد.. ساعتها ينفذ نصايحي اللي برضه باقدمهاله في صورة عبثية زي مثلاً: «هتروح ٥ شغلانات واحدة منهم اللي هيتكتبلك فيها المجد، ولازم تحارب علشانها»، يقوم الراجل يخرج من عندي ويرشق في أي شغلانة تقابله، ويموت نفسه لحد ما ينجح فيها، بس طبعاً مش دايمًا الطريقة دي بتنجح لأن فيه ناس مُدمنة فشل وعازية الفرصة تيجيلها وهي قاعدة على القهوة.

- يا سلام يا أخي دا اللي يعيش ياما يشوف.. طب قولني بقه.. بالنسبة للموضوع بتاعي إزاي هتقدر تخليني أقابل وأتكلم مع شخصيات تاريخية زي كليوباترا مثلاً؟ بس وحياة أبوك إوعى تقولي بالوهم وخذ بالك أنا جامعي زيك.

- هههه.. لا مش بالوهم.. بالفعل.. ولو مش مصدق اطلب أمنية وهاوريك.

- بس معيش رقمها.

- هي مين دي؟

- أمنية.

- إحنا هنهرج! يا عم اطلب أي أمنية وخلصني ورايا زباين، دول ما كانواش ٦٠٠ جنية عمي اللي هتشتريني بيهم طول اليوم!

- طب ما تشخّطش .. عايز أتكلّم مع كليوباترا .. الأنثى الرائعة
اللي خلّت أنطونيو باع روما علشانها .. يلاً بقّه ورّيني
هتخليني أكلمها إزاي يا عبقرى .

- بس اشمعنى كليوباترا؟ دي كانت ست عنيفة ومشغولة علطول
بالحروب، طب إيه رأيك في سندريلاً؟ أهى دي اللي كانت
أنثى بجد، وبرضه وقّعت الأمير وخلّته يحفى وراها .
- والله فكرة .. ده حتى يقولوا إن سندريلاً كانت أجمل ..
طب يلاً ورّيني هتعرّفني عليها إزاي؟

- هاوريك .. بس ياريت تحكيلى حكايتها بالتفصيل لأنى زي
ما انت شايف راجل عملى، ومعلوماتى عن السّات اللي
من النوع ده سطحية جداً .

- ماشى هاحكيلك .. بس برضه مش فاهم هتعرّفني عليها
إزاي وانت لسه معترف إن ملكش كرامات؟!!

- يا سيدي ولا كرامات ولا زفت .. الموضوع أبسط مما
تتخيل .. وهيعتمد المرّة دي على الخبرات مش الكرامات ..
وعلشان أوضّحك أكثر، بص على الأجندة دي .

- إيه دي؟ أجندة سحرية؟!!

- لا .. دي أجندة فيها كذا ألف حالة .. جمعتهم على مدار
عشرين سنة .. كل واحدة منهم كان ليها حكاية ومشكلة،
منهم اللي عالجتها، ومنهم اللي فشلت معاها، بس اللي
هينفعك إنى كنت باكتب مشكلتهم ومُلخص حياتهم ..

دكتور نفسي بقّه .. هههه .. كمان كنت باخد أرقام تلفوناتهم
وعناوينهم .. ولأن التاريخ بيعيد نفسه، يبقى أكيد هنلاقي
قصة منهم تشبه القصة التاريخية بتاعتك، وما تنساش
إن المنطق بيقول إن تشابه الأحداث بياكّد أحياناً تشابه
الصفات والشخصيات .. وتكرار الخطوات بيأدّي لتكرار
النتائج .. يبقى وارد جداً لو لقينا شخصية مرت بنفس ظروف
الشخصية بتاعتك، أكيد هتشابه معاها في معظم الصفات
وطريقة التفكير، في الحالة دي لو سألتها هتبقى إجابتها
أقرب للشخصية الأصلية .. إلهى هيّ التاريخية بتاعتك .

- يا ابن اللدينا .. إيه الفكرة العبقرية دي! فعلاً التاريخ بيعيد
نفسه، وتشابه الظروف ممكن يأكّد تشابه الصفات .. طب
يلاً بسرعة شوفلي واحدة تشبه سندريلاً .. بس أهم حاجة
تكون مُرّة زيها .

- طب احكيلى حكايتها بالتفصيل وانا هاشوفلك قصة تشبها
بإذن الله .

١ سندريلاً الغريزة

- كان ياما كان يا سعد يا...
- إيه يا ابني هوّ انا باقولك احكي لي علشان أنام.. يا عم لخص
عندي زباين.
- هو انت علطول عصبي كده يا بهلول.. قصدي يا دكتور،
طب اسمع يا سيدي.. سندريلاً في الأصل قصة أسطورية
لبنت اسمها «رودبس».. المفروض إنها اتولدت في اليونان
سنة ٥٦٠ قبل الميلاد، يعني تقريباً من جيل الفنانة صباح..
رودبس كانت بنت طيبة ورومانسية، عاشت مع مرات أبوها
اللي اتجوزها بعد موت أمها.. الست دي كان ليها بتتين
هُمَّ «جيني» و«كاترين»، وكانت مرات أبوها بتعاملها زي
الخدامة الفلبينية، عاشت معاهم في تعاسة لسنين طويلة

لحد ما الملك بتاعهم قرر يعمل حفلة كبيرة علشان يختار عروسة لابنه الأمير الوسيم.

طبعا مرات الأب أخذت بناتها الاتنين وسابت رودبس إल्ली هي سنديلا في البيت بحجة إن ما عندهاش فستان تحضر به الحفلة.

لكن فجأة بتظهر الساحرة اللي بتديها الفستان التحفة، والجزمة البلور، والعربية المسحورة اللي هتوديها الحفلة، علشان تبهر الأمير، بشرط إنها ترجع قبل الساعة ١٢ مساء وإلا هيروح مفعول السحر.. طبعا بينبهر الأمير ويقعد يرقص معاها لحد الساعة ما تيجي ١٢، وتجري الأميرة وتسيب وراها الجزمة البلور.. ويدور الأمير على صاحبة الجزمة (آل يعني هي الوحيدة في القرية اللي بتلبس ١٥٢). المهم.. الأمير العبيط بيلاقي سنديلا عن طريق الحراس، وبيتأكد من مقاس الجزمة بتاعتها يقوم يتجوزها علطول.

* * *

- يا سلام هي دي بقه قصة سنديلا؟ طب صدقني عندي قصة أختها بالظبط.

- وحيه دينك! طب لايمني عليها أبوس عفاريتك.

- حاضر يا سيدي (ويمسك الأجنده) سنديلا.. سنديلا..

أيوه لقيتها.. تفيدة عبد المتجلي - سنديلا الكيت كات.

- نعم يا اخويا؟! تفيدة عبد المتجلي من الكيت كات؟!!

باقولك سنديلا من اليونان تجييلي بنت عبد المتجلي من الكيت كات؟! مش باقولك دجال!

- باقولك إيه ما تخوتنيش.. هي دي القصة اللي عندي وأدي رقمها.. عايز تكلمها كلمها.. مش عايز وريني عرض كتافك.. واخلع بقه علشان الستميت جنبه بتوعك خلصوا.

- طب استنى.. هاكلمها بصفتي مين؟

- قولها إنك صحفي وجاي تديها مكافأة مادية علشان قصة كفاحها.. وانا واثق إنها على أد حالها وهتوافق تقابلك علطول.. يلا سلام.. حي حي.. إल्ली بعده يا عويس.

* * *

لم يكن الأمر بالبساطة التي يتخيلها البعض، خصوصاً مع رجل مثلي اعتاد طيلة حياته أن يُمنطق الأشياء، فكيف له اليوم أن يلغي عقله ويتبع طبيياً فاشلاً ودجالاً أحرق مثل بهلول.. ذلك الغني الذي يحاول إقناعي بأن سنديلا يمكن أن تولد مرة أخرى في جسد فتاة عادية تقطن حي إمبابة البسيط! لا لست مُضطراً إلى تصديق تلك الخزعبلات.

«ولكن ماذا سأخسر؟». تلك العبارة التي أنهى بها عم مذكور الساعي حوار القديم معي، جعلتني أعيد تفكيري مرة أخرى. نعم، ماذا سأخسر؟ وأي بديل يُغنيني عن تلك المحاولة؟ نعم سأتصل بها.. واللي يحصل يحصل.

* * *

- ألو.. الأستاذة سندريلاً؟ (قلتها واستغفرت الله عدّة مرّات؛
فلقد اغتبت لتوي سندريلاً الحقيقية).
- أيوه.. مين معاايا؟

كانت هذه اللهجة في الرد كفيّلة بأن تجعلني أنهي حياتي
الأدبية وأترجع نهائياً عن فكرة الكتابة في العموم وليس في
هذا الموضوع فقط.. نعم لست مضطراً لمواصلة هذا العبث..
فكيف يمكن لصوت يردح كهذا أن يخفي وراءه فتاة رقيقة
وجذابة تمتلك ولو رُبُع صفات سندريلاً الأسطورة؟! لا بد أن
أغلق الهاتف فوراً.. نعم سأفعل، ولكن!

- أنا يا فندم صحفي من جريدة الأهرام.

لا شك أن فضولي ورياسي كانا دافعين للتراجع عن فكرة
إغلاق الهاتف في وجهها.

- أنا يا فندم صحفي من الأهرام اسمي إيهاب وعزيز أتشرّف
بمقابلة حضرتك.

- بخصوص إيه يا عيني؟

- في الحقيقة يا هانم الشيخ بهلول رشّح سيادتك لينا علشان
تستلمي جائزة مادية من الجرنال، عن قصة كفاحك العظيمة
اللي حكلنا عنها.

- لولولولوي.. باركولي يا خلق هووووه.. هيدوني فلوس
علشان حكاية كفاحي.

سندريلاً بتزغرت.. يا لها من مهزلة أدبية!

* * *

الوقت: السادسة مساءً.

المكان: مطعم البرنس بإمبابة.

أبدأ لن تضل الطريق.. فتلك اللافتة الضخمة والتي تحمل
صورة «ناصر البرنس» وهو يشرب بفخر إلى مضغمة الأسطوري
سوف تُرشدك بسهولة إلى الشارع المنشود. فقط كل ما عنيك
هو أن تنعطف يمينا لتدهشك أفواج الحجيج الجالسين وسط
الشارع على الطاولات المترامية يمينا ويساراً، منتظرين
بخشوع ما قد يلقي عليهم بالخطأ أو بالصواب من طواجن
أو أطباق.

أغلقت العطفة عن بكرة أبيها بارزاً للذين جاءوا من كل
أحاء المعمورة، وربما من خارجها، تفودهم شهوتهم حيث
إمبراطور الكبد.. بضع دقائق نسيت فيها الهدف من الزيارة،
وجلست مذهولاً أراقب قطع الكبد والسُجق التي تتراقص
أعلى الجريلات الممتدة بعرض الواجهة.

أخذتني رائحة الملوخية والثوم إلى ذكريات طفولتي البعيدة،
حيث كانت جدتي - رحمها الله - تصنع لنا طعاماً يُصدر رائحة
كهذي.

عكس زوجتي التي جعلتني أدمن الأندومي.. سامحها الله!
قطع انسياب لعابي صوت المحمول برنة قصيرة، أدركت
منها أن صديقتي المنشودة قد وصلت، فعاودت الاتصال بها:
- أيوه مين معاايا يا فندم؟ (أنا.. بس باستعبط عليها).

- هو إيه اللي مين معااايا؟! إنت مش مديني معاد عند الزفت
البرنس!

أعوذ بالله على الردح الكيت كاتي.. منك لله يا شيخ بهلول..
آل سندريلا آل!

- أيوه أنا واقف مسيتي حضرتك عند الزفت أقصد البرنس
أهو!

- طب ما انا متلأحة وواقفة عنده، إنت فين خلصني؟
- والله العظيم يا فندم أنا واقف عند المدخل، حضرتك اللي
فين؟

- اللهم طولك يا روح.. أنا واقفة على المدخل الشمال وساندة
على الكشك بتاع اللبن.

يا للهول! يا حلاوة! يا حلولي! يا شرفتح! إيه المزة
الجامدة دي!

- هو حضرتك اللي واقفة عند المالكي ولا بسة العباية السوداء
اللي بتلمع؟!

- أيوه أنا اللي لابسة الهباية اللي بتلمع!
لقد صدقت أيها البهلول الرائع.. يا لها من امرأة مكتملة
الأنوثة، لأول مرة تخالف الحقيقة توقعاتي اليائسة.. شعر أسود
كثيف يتسلل من عقدة الإيشارب الشفاف الذي يُغطي بمكر
جزءًا من الحاجب الداكن العريض المظلل لعينيها السوداوين
الرائعتين.. أما عن القوام الفارع المتسق يا بوووي، والخصر

الرهيب المرتفع صارووخ، أما عن باقي الخريطة المشتعلة
فليس من حقي أن أبوح بكيفيني الصمت.. حقًا إنها امرأة تستحق
كل الألقاب التراثية التي أبدع فيها الرجل المصري في وصف
الأنثى: مزة، أوزة، أو كشة، فرسة، جمل... وغيرها وغيرها من
الصفات السوقية الرائعة التي صنعت خصيصًا لامرأة كهذه. أعسم
أيضًا أنه ليس من الحكمة أن أصف تلك السندريلا الكيت كاتية
الرهيبة، خصوصًا أن زوجتي تتابع بدقة ما أكتب، وتملك مؤخرًا
ماديًا كفيلاً بأن يضعني طيلة ما تبقى من حياتي في السجن،
ولكن لأن الكبت يؤثر سلبًا على صحة الرجل، فليس أمامي
إلا الفصفضة والتفريغ.. أيوه مزة، وقمرن يهبلن كمان، واللي
يملك علي أي مستند يقدمه للنيابة والله الموفق والمستعان.

* * *

- مساء الخير يا آنسة سندريلا. (يا قمر، يا تحفة، يا مصيبة،
يا سنة سوخة يا ولاااا!!).

- آنسة في عينك وعين ال... كل دي آنسة يا أعمى النظر؟! دا
أنا لو اتجوزت بدري كنت جبت عيل من دورك!
(من دوري!!).

- يا فندم والله ما أقصد أصل حضرتك شكلك صغير جدًا.
(وأمورة جدًا، وجذابة جدًا.. باموت في الجميز يا ولاااا!!).
- لا باقولك إيه.. احترم نفسك مش انا اللي يتبصبصلي.
(معقولة طب دا انتي بالذات اللي البصبصة اتعملت علشانها).

- يا فندم ومين يجروء.. هو حضرتك وش ذلك برضه؟
- أيوه كده اتعدل.. يلاً بقه هات الجائزة وخلصني ورايا
غسيل.

- غسيل؟! (عمري ما اتخيلت إني ها قابل سندريلاً اللي
وراها غسيل!! بس برضه يا بخت الغسيل). بس يا ريت
أسمع قصتك علشان أكتبها في الجرنال زي ما وعدتك،
وصدقيني مش هاعطلك.

- يعني إيه.. مش بتقول الشيخ بهلول حكها لك؟
- لأ. ما انا كنت طمعان أعرف من حضرتك تفاصيل أكثر..
صحفي جديد بقه وينوبك ثواب تقفي جنبي.

- صعبت علي.. طب اسأل وانا أجاب بس كبيرك ساعة
وهامشي.

- طب قوليلي الأول إيه موضوع أسم سندريلاً ده؟ أصل
الشيخ بهلول قالي إن اسمك الأصلي تفيده.
- أنا هاقولك يا أستاذ.. بس فين الموسجّل؟
- مُسجّل إيه؟

- الموسجّل اللي هتسجّل بيه كلامي.. ولأ هتكتب علطول؟
- هههه.. لأ.. اتفضلي احكي أصل الموبايل بتاعي بيسجّل
لو حده.

- هو بختين زي بتاعي؟ طب شوف يا سيدي بس الأول
صلّ ع النبي.

- عليه أفضل الصلاة والسلام.. اللهم صلّ على كامل النور
ولا حول ولا قوة إلا بالله.. (اتفضل يا قمر) اتفضلي يا هانم.
- في يوم من ذات الأيام كان نايم على حجري الواد «رجب
كحور» ابن أم رجب الأنتيم بتاعتي، وكنت قاعدة بافلييه،
لقيته ماسك في إيده قصة وبيقولي تصدّقي يا خلتشي إن قصة
سندريلاً دي زي بتاعتك بالظبط، قامت الولية المضروبة
أمه قالتله إزاي يا ولّه؟ قالها أهو كده، وشد من إيديها ورقة
بشطن وطلع يجري.

- نعم!! هو لسه فيه عندكو ورقة بشطن؟! ده الجنيه الورق
اتلغى من عشر سنين!

- يوه والنبي ما انا فاكرة.. باينها كانت ورقة بيريزة.. المهم..
الولية الواطية افتكرت إن سندريلاً دي واحدة من اللي مشيهم
بَطّال وقالت فرصة تشنع عليّ في الحتة، لكن ربنا نصفني
وظهر الحق، والناس عرفت إن سندريلاً دي بت جدعة
وعندها أصل.. ربك والحق أنا يومها قلبي انشرح ورُحت
مفرقة شربات ورد على الحتة كلها.. ومن ساعتها.. والناس
بتناديني سندريلاً.. سندريلاً راحت.. سندريلاً جت.. سندريلاً
راحت... (بتحرك كتفها بشكل مُثير جدّاً بنت الإيه).

(يا هوووه! اللهم اخزيك يا شيطان).

- بس أنا برضه مش فاهم.. ليه أستاذ رجب كان شايف إن
قصتك تشبه قصة سندريلاً؟

- بالراحة عليّ يا سي الأستاذ ما انا جيّالك في الكلام أهو..
أصل أنا برضه أمي ماتت وانا لسه عيّلة زي سنديلاً.. إهي
إهي إهي إهي.

- يا حول الله.. الباقية في حياتك يا هانم.

- هو إيسيه.. أنا أمي ميتة من خماشر سنة!

- مش حضرتك إلي بتعيطي!

- لأ ما انا مش باعيط على أمي!

- أمال على مين؟

- على أبويا.

(يلعن... أ...).

- طب كملي الله يرحمها ويرحمه ويرحمنا جميعاً.

- أبويا بعد ما ماتت أمي اتجوز جارتنا المعفنة أم فاطنة.. آل إيه

علشان تربييني.. جتها داهية فيها وفي بناتها.. ما تقول آمين!

- آمين.

- وحياتك.. سنة واحدة وكانت مبيّعاه اللي وراه واللي أدّامه،

لحد ما رهن المكر وباط، ومضى على نفسه كمبيلات،

ودخل السجن ومات هناك.. تخليش عندها رحمة بقّه بيته

التيمة الغلبانة.. أبداً.. وشرفك بقت تمسح بي الأرض ليل

ونهار، وتشغلني في البيت بلقمتي.. ربك الحق.. كنت

باصحى كل يوم أقول خلااااص النهارده هأنط في كرشها،

وأهي ديّتها تأبيدة واخلص، بس أرجع وأقول يا بت اعقلي،

بكره تُفرج، وعدت شهور لحد ما ربك بعث الفرج من
عنده.. ودخل علينا المعلم بيومي - أكبر تاجر صنف في
إمبابة - وقال لمرات أبويا: «لمي يا ولية بناتك العرّة وهاتيهن
بالليل في الصوان اللي على أول الشارع.. أصلي حالف
لأجوز الواد دُقدق ابني النهارده، بدل ما هو متسرح مع
النسوان كل يوم، تعالي ما تتكسفيش أنا جايب فرقة ومزيكا
ورقاصة، وكرمان لحمه وعيش.. ما تتأخريش».

الولية الواطية طبعاً ما صدّقت راحت مولعة الوابور وواحدة

جوز العوانس بتوعها محمّياهم ونازلة بيهم على الصوان..

قُتلها مش هتاخديني معاكي يا امه.. قالتلي: «جاكي مَو..

أخذك فين يا موكوسة؟! هيّ المشرحة ناقصة قُتلا.. اجري

اغسلي المواعين وانشري الغسيل.. آل أخذك آل.. خذك

ربنا.. ونزلت.

بس يا سيدي وقفت في البلكونة أنهنه واقول إنت كبير

يا رب، قادر تخسف بيها الأرض هي وبناتها البائرة، شوية

وندهت عليّ أم بُرعي بتاعة الجاز: «إنتي قاعدة بتعملي إيه

عندك يا خايبة وسايبة الصوان؟ دا كل بنات الحتة هناك!»..

قُتلها أعمل إيه يا خالة حُكم الأوي ع الضعيف.. قالتلي:

«ولا يهملك ادخلي استحمي وانا خمسة وطلعالك».. وفعلاً

ما كدّبتش خبر، مفيش رُبع ساعة ولقيتها داخلة عليّ وفي

إيديها حتة عباية خليجي إنما إيه.. تعملها بالميت خمسين

جنيه، يوووه ما هيّ دي اللي انا لابسها.. إيه رأيك فيها
والنبي مش حلوة؟

- ياااه هي لسه عندك لحد دلوقتي؟!!

- أيوه يا اخويا أصلها غالية عليّ أوي، وكل ما تدوب من حنة
باروح أرفيها عند الواد مُسعد؛ إيده تتلف في حرير. بس
والنبي لسه بحالتها.. ولّا انت شايف إيه؟

- يا فندم المهم الحشو.

- هههه.. يوه جتك إيه.. باينك ابن نكتة زي المحروس
جوزي.

- أكيد تقصدي بالمحروس الأستاذ دُقدق ابن المعلم بيومي..
مش كده؟

- اسم الله عليك ما انت نبيه أهو.. أمال مش باين عليك
يعني هههه.

- ده بس من أصلك يا قمر.

- قمر في عينك.. اتلم لاحسن أقلعلك الشبشب!
(يا بخت الشبشب).

- لأ مفيش داعي اتفضلي كملي.

- هو انا وصلت لحد فين.. أيوه افتكرت لحد ما خالتشي
أم بُرعي جابتلي العباية.. وقالتلي: «قومي البسيها»..
قُتلها ودي جبتها منين يا ولية؟ قالتلي: «وانتي مال أهلك،
رزق وجالك لحد عندك، قومي البسيها وما تخافيش مش

لطشاهها، دا الواد بُرعي جابتها له زبونة النهارده علشان
يكويها.. بس خُدي بالك ترجعيها قبل الساعة ١٢ علشان
صاحبها رقاصة وجاية تاخذها بالليل، وانتي عارفة الواد
بُرعي مجنون وممكن يدخل عليك الصوان ويفضحك»..
قُتلها ماشي.. وديني انا ربنا عوض عليّ بيكي يا أم بُرعي،
تكونيش أمي بجد وابويا اتشاقى معاكي؟ قالتلي: «بلا نبيلة!
هو أبوكي كان فيه حيل يتشاقى.. دي المرحومة أمك كانت
مخلّصة عليه أول بأول».. نزلت الشارع لقيت الواد كرم
مستيني بالتوك توك علشان يوصلني.. إلهي ربنا يشفي له
أمه ويرزقه بنت الحلال.. طول عمره عزوتي وضهري
في الحنة، محدش يجروؤ يرفع عينيه فيّ وانا راكبة معاه..
وحتى لو مش راكبة معاه.. بس هو يسمع إن حد اتعرضلي،
يقطعه حتت.. والنبي لو ما كانش أصغر مني كنت اتجوزته..
هههه.. آل أتجوزه آل.. أستغفر الله العظيم يا رب، إذا كان
راضع معايا.. ربنا يخليهولي يا رب.. نرجع لموضوعنا.. أنا
يا دوبك نزلت من التوك توك ودخلت الصوان وعينك ما
تشوف إلا النور.. الصوان اتقلب.. خمسة وخمسة عليّ..
بنت أمي صحيح، والله يا أستاذ أمي دي كانت تدخل أتخنها
فرح تجيب عاليه واطيه هههه.. الله يرحمها بقه.. المهم
باضررب بعيني كده لقيت دُقدق واقف على المرشح وعينه
هتطلع عليّ.. كان ساعتها واقف جنب الرقاصة، راح مطلع

ورقتين بعشرة وراميهم عليها وقايل: «الصوان.. وكمان
الصوان.. والمُزَز اللي داخله الصوان.. ورقصني يا جدع»..
ونزل خدني من أيدي وقعد يرقص معايا بييجي ساعتين لحد
ما ابتدئ يسخن وإيده تطول.. قُلتُه اتلم.. قالي: «ما تيجي
يا بت ننزل ورا الصوان نفرقع إزازتين بيرة».. قُلتُه فَشَّر..
هو انا وش ذلك يا متربي يا ابن الأصول؟ حد يقول كده
لبنت حتته؟ أُمّال خَلَّيت إيه للعيال اللي بتضرب كُولة تحت
كوبري الساحل!؟

حسيت ساعتها إنه اتكسف على دمه ونغششت في دماغه..
راح ساحبني من أيدي على أبوه المعلم بيومي.. وقاله:
«خلاص يا ابا.. أنا لقيت بنت الحلال».. راح المعلم مُطَلِّع
الفرد من جيبه وضارب خرطوشين في الهوا وقاله: «خد يا ض
خطيبتك واطلع على المرشح لحد ما اطلب الشيخ بدر بييجي
يكتب عليك النهارده، علي الحرام لتنام في حضنك النهارده
يا ابن الكلب».. يا نهار أبيض الساعة داخله على ١٢، مصيبة
لَلوَاد بُرعي بييجي ويفضحني علشان العباية.. أنا لازم أجري
دلوقتي.. ده الكلام اللي كان بيدور في عقل بالي ساعتها -
بس ربك كريم - أنا لسه يا دوب هاخذ ديلي في سناني وأقول
يا فكيك واسيب فردة الصندل وكده يعني زي سندريلا.. لقيت
الأسطى جابر الكهربائي مسك المكرفون وقال: «يا جماعة
الصوت شوية.. كل سنة وانتو طيبين.. سمعت في الراديو

دلوقتي إن التوقيت الصيفي رجع تاني.. يعني الساعة بقت
١١ مش ١٢.. والتحية دي جاية من المعلم مدبولي خال
العريس ربنا يفك سجنه وييمسي علي...».

- خلاص خلاص إنتي هتكلمي الفرح كله!!
- مش انت اللي بتقولي احكي بالتفصيل.. وبعدين خلاص
ما الحكاية خلصت، الشيخ بدر كتب الكتاب وعلا الجواب
وبيقت حرم المعلم دُقدق وخدني على بيته حطني هناك
ومشي.

- مش فاهم.. يعني إيه حطك هناك ومشي؟ وبعدين وشك
ليه اتغير فجأة كده؟! واضح إنك مش سعيدة معاه.

- والنبي يا سي الأستاذات الجائزة وتوكل.. الله لا يسياك،
أنا مش ناقصة حد يقلب عليّ المواجه!

- لأ.. أتوكل ازاي؟! دا هوّ ده الموضوع اللي انا جاي علشانه..
أرجوكي احكي لي عن علاقتكم ببعض.. وصدّقيني هافيدك
وانشرك مشكلتك وأحلها لك كمان.

- بتكلم جد! يعني انت ممكن تساعدني وتحللي مشكلتي؟
- طبعا دا انا متخصص في حل المشاكل، وبالذات العويص
منها، اتفضلي أنا سامعك.. وشغلّلك الموسجّل أبو خطين
كمان أي خدمة.

- شوف يا اخويا.. أنا كنت فاكرة إن العيشة مع مرات ابويا
أوسخ سجن ممكن الواحدة تدخله، لكن لما عشت في

بيت دُقدق فهمت إن مش كل الحيطان بتستر.. فيه حيطان
بتعري.. وبيت جوزي بحيطانه الذهب ممكن يبقى سجن
لو ما رجعتش آخر الليل خدني في حضنه وطبطب عليّ..
دُقدق يا أستاذ ما اتجوزنيش غير أسبوعين اتنين، ومن يوميه
ما شفتوش، وحتى لو شفته.. برضه كأنني ما شفتوش.. أهني
حاجة بترجع آخر الليل تتطوح.. طعمها حشيش، وريحتها
عرق نسوان.. وانا لا طائلة ابقى بني آدمة زي مخاليق ربنا،
ولا طائلة أرجع جارية زي ما كنت في بيت مرات ابويا..
باقضي النهار ما بين بيتي وبيت أمه، غسيل ومسح وكنس
وتهزيء، وآخر الليل أرمي جتتي على السرير واروح في
النوم لحد ما اسمع صوت الباب بيتفتح، أجري على المطبخ
أحضر له العشا وانا ونصيبي، يا إما ينام وهو بيتعشى واسحبه
على جوه أغير له هدومه واتلأح جنبه، يا إما يكون فايق شوية
ويسحبني على السرير ياخذ ببقية فلوسه وبعد كده يدني
ضهره وهاتك يا شخير، حتى البوسة اللي كان هيموت عليها
يوم الصوان بقي يستخسرها فيّ.. وطبعاً لو فتحت بقي بأي
كلمة يبقى الباب يفوت جمل.. بس أفتح بقي ازاي؟ وهو
انا بقي لي متوى غير هنا! هيبه.. أهني أيام بنقضها.. والنبي
يا أستاذ ادني بقه الجائزة خليني أمشي.. أنا ما عايش في
حيل أحكي ولا اتكلم.. ينوبك ثواب فيّ خليني ارجع
أكمل غسيلي.

- اممم!! أنا متأسف يا مدام تفيدة! واضح اني فعلاً قلبت
عليكي المواجه، وأعتقد اني لازم امشي، بس أرجو كي
اقبلي المبلغ البسيط ده هدية من الجرنال.
- وماله، أهو يتفع اشترى بيه مكنسة للبلاط ومسحوق لملاية
السرير اللي دابت.

* * *

أكثر من أسبوع وانا ساكت مش عارف أتكلّم من ساعة
ما سبيت سندريلاً ومشيت.. حاسس إنني مخبوط على دماغني..
نفوس جديدة وعالم جديد أول مرّة أدخله.. ناس تيان من برّه
إنها عايشة وأتاريها من جوه ميتة ومدفونة من سنين ومحدث
حاسس بيها.. عمري ما تخيلت إن أي سندريلاً ممكن حياتها
تبقى كده! خصوصاً مع أمير اتعذب علشان يوصلها.
تفيدة للأسف ما جاوبتش على السؤال.. تفيدة طرحت أسئلة
جديدة.. أنا بجد مش عارف أفكر! لازم أرجع لبهلول.

عودة إلى بهلول

- الله يسامحك يا شيخ بهلول.. قصدي يا دكتور.
- لا أرجوك خليني الشيخ بهلول.. الشيطان هنا ليها ودان..
ويعدين وشك أصفر كده ليه؟ إنت عملت إيه مع سندريلاً؟
- اسألني هي اللي عملت إيه معايا! دي دمرت حياتي وجابتلي
اكتتاب مُزمن، ويا ريتها جاوبت على السؤال.. بالعكس..
دي حملتني بأسئلة تانية جديدة، هو أنا كنت ناقص! بيع الكتب
- إزاي بس احكي لي.. مش احنا اتفقنا انك هتسألها إزاي
قدرت توقع الأمير في حُبها.. قصدي جوزها يعني.
- يا باشا أسأل مين؟ دي ما بتعرفش تُفك الخط من أصله..
تُقولي أسألها! آل إيه «شافني طالعة على المسرح بالعباية
السودة راح واخذني وقعدنا نرقص.. وتعالى نضرب
إزازتين بيرة ورا الصوان وهي دي يا ابا اللي هتجوزها»..
أنا مال أهلي بكل الكلام والهري ده؟!
- هههه.. واضح إن خبرتك ضعيفة في المجال ده يا أستاذ..
الموضوع غاية في الوضوح والبساطة.. الراجل اتحرك

بشكل غريزي لَمَّا شاف تفيدة بأنوثتها وجسمها المُثير،
بدليل إنه قعد يرقص معاها وطلب منها ينزلوا ورا
الصوان.. وأكيد انت فاهم ليه.. ولَمَّا رفضت قرر يتجوزها
لنفس السبب وبنفس المُحرك.. يعني البنت جاوبتك على
السؤال ببساطة.. الراجل بيحب في السّات جسمهم
وأنوثتهم، والمحرك الأول والرئيسي عنده هو الغريزة..
وده بيتوافق مع كل النظريات العلمية الحديثة.. يعني
عندك مثلاً الكاتبة «شيرى أرجوف» بتأكد ده في كتابها
الشهير «Why Men Love Bitches»، كمان أستاذنا الكبير
«جون غراي» بعد ما كسّر الدنيا بنظرياته عن الاختلاف
بين الجنسين وافترض إن تجاهل الاختلاف ده هو سر
انهيار العلاقة بينهم.. رجع واعترف في كتابه الأخير
«Mars and Venus in the Bedroom» إن الغريزة هي
المُحرك الأول والأساسي للراجل ناحية المرأة عموماً،
وافترض إن أوضة النوم هي المكان اللي بتبتدي أو بتنتهي
فيه كل المشاكل الزوجية.

- يا نهار ازرق!! دا انت طلعت دكتور بجد! إيه يا باشا الكلام
الكبير ده، ومين الناس دول، إنجليزي ده يا مُرسي! أتاريني
باشتغل طور شجي في الجرنال وانا مش فاهم.. عندك حق..
سندريلاً أثبتتلي إن الراجل مش عايز حاجة من الست غير
جسمها. يااه دا احنا كرجالة شوية رمم ومحدث واخذ باله!

- هههه.. برضه غلط.. أنا قلت المُحرك الأول والرئيسي
مش المُحرك الوحيد! ولمّا تسأل ستات غيرها هتأكد
إن فيه محركات تانية.. كمان فيه استثناءات للقاعدة دي،
وبالذات عند الراجل الرومانسي اللي ممكن تلاقي عنده
المشاعر بتسبق الغريزة، بس دي نسبة قليلة، لكن موجودة،
بس مش هتفرق معاك لأنك هنا بتدور على القاعدة مش
الاستثناء.. ولأيه؟

- أيوه بس احنا كده بنشوه التاريخ لمّا نقول ان الأمير اتحرك
لسندريلا بشكل غريزي، لأن المعروف إنه حبها من أول نظرة.
- يا سلام! حبها ازاي من أول نظرة؟! ده على أساس انه
اكتشف شخصيتها وتفكيرها وخفة دمها من أول لحظة؟
يا أستاذ ده عبث، لأن النظرة الأولى هي اكتشاف الشكل
والجسم وساعتها اللي بتتحرك هي الغريزة.

- عندك حق. طب بالمرّة بقه، طالما حضرتك طلعت فاهم
أوي كده، قولّي تفيدة المفروض تعمل إيه مع جوزها اللي
بيتعامل معاها بشكل حيواني؟ يعني يبشدها على السرير
وبعد كده يديها ضهره ويشخر وكده.. أكيد مرّت عليك
حالات كتير زي دي.

- أيوه أيوه فهمت.. الموضوع ده فعلاً مُنتشر جداً.. ودي
من أكثر شكاوى السيدات عموماً، وده غالباً بيكون بسبب
جهل الراجل بطبيعة الست، وفي نفس الوقت تقصير من

المتخصصين في توصيل المعلومة الصحيحة له.. يعني
أنا مثلاً كراجل المفروض أفهم إن المشاعر هي المُحرك
الأول لغريزة المرأة وده عكسي كراجل تماماً.. أنا ممكن
في لحظة أوصل لقمة الإثارة وأدخل في الموضوع علطول،
لكن هيّ محتاجة كلام ناعم ومشاعر ومُقدّمات ومداعبة
وملاطفة علشان يتولد جواها الاستعداد والرغبة، والدليل
على كده إنها لا يمكن تقدر تمارس الجنس بدون حب..
إنما أنا أو حضرتك ممكن نمارسه مع أي واحدة وفي أي
وقت؛ من باب الاستمتاع أحياناً، أو من باب التخلص من
الرغبة وخلاص، ودي طبيعة بشرية مش كرم منها ولا دناوة
مننا، لأن زي ما اتفقنا الغريزة هيّ المُحرك الأول للراجل،
والمشاعر هيّ المُحرك الرئيسي للمرأة.. فاهم كلامي؟

- أيوه طبعاً فاهم، بالأمانة الحتة دي جت في فيلم «سهر الليالي»
لما «جيهان فاضل» قامت متترفة بعد ما «خالد أبو النجا»
إداها ضهره بعد السيكو سيكو.. صح؟

- اسم الله عليك.. دودة أفلام يا أستاذ إيهاب.. يا ريت كل
الكتاب والمثقفين زيك كده.

- الله يكرمك ده من أصلك يا دوك.

- طيب يبقى كده اتفقنا إن الست محتاجة على الأقل 5 دقائق
مداعبة وتجهيز.. تاني حاجة لازم أي راجل يفهم إن
الخلايا الحسية متوزعة على جسم الست كله، يعني

ممکن یثیرها من أي حتة، یعنی من شعرها هتحنس بیه،
من صوابعها هتحنس بیه، حتی ودانها هتحنس بیه، یعنی
المفروض يتعامل مع خريطة جسمها بشكل مهذب،
ویفهم کمان إن الكلام الرقيق یثیرها، لأن المُحرك عندها
هو «حاسة السمع»، زي ما الرجل یحركه شکلها ولبسها
ومكياجها والمُحرك عنده هو «حاسة البصر». أما بالنسبة
لكلام تفيده عن تجاهل جوزها لیها بعد انتهاء اللقاء
واللي عبّرت عنه بجملة «بیديني ضهره» فدي من أهم
الملاحظات على الرجل الشرقي عمومًا، والسّت هنا
بتحنس إن الرجل یبلّخصها في مجرد جسم، یاخذ منه
اللي هو عاوزه وبعد كده یرمیه.. وساعتها الست بتكره
اللقاء جدًّا وتبقى شایلة همه، مع إن الرجل لو فكر شویة
هیفهم إنها بتحقق ٩٠٪ من احتیاجها قبل وبعد اللقاء مش
أثناء اللقاء زیه، بس مین یسمع ومین یفهم!

- كلام جمیل بس انا لاحظت جملة كده في كلام سنديلاً
قالتها بحرقه أوي، بس ما فهمتش تقصد إیه.
- إیه هی؟
- قالتلی: «حتى البوسة اللي كان هیموت علیها يوم الصوان
بقى یستخسرها فی» للدرجة دي موضوع البوسة مأثر
فیها؟!
- طبعا دي البوسة دي من أهم الحاجات اللي بتحنس الست

بحب جوزها، علشان كده بیسموها «رسول الغرام».. بس
الغریبة إن مفهوم البوسة عند الست مختلف تمامًا عن
مفهومها عند الرجل!
- بمعنی؟

- بمعنی إنها عند الرجل لیها هدف.. علشان كده بتقل قیستها
عنده بعد الجواز، لأنه في الأغلب كان یعملها قبل الجواز
للتأثیر على المرأة وإثارتهأ تمهید لخطوات تانية.. طبعا
انت فاهم؟

- أيوه أيوه فاهم.. یعنی زي ما بتقول الفنانة «بوسي» في
قصیدتها الشهيرة «حط إیده یاه»: «بیقولی هاتي بوسة
یا مصیبتی ویا دي الحوسة».. صح؟

- أيوا.. واضح إن الفنانة بتاعتك دي فهمت بخبرتها
إن الرجل ناوي بیوسها علشان یستدرجها للطلوع على
السطوح، لأنها أكید صاحبة قصيدة «حط النقط على
الحروف قبل ما نطلع سواع الرُوف»! هههه.. مش كده؟
- لا یا دكتور مش بوسي دي.. التانية بوسي سمیر.. بنت
خالته!

- هههه واضح إن العيلة كلها نفس التریبة.. بس الشاهد من
الموضوع إن البوسة حالة من المشاعر والخیال بالنسبة
للمرأة، بدلیل إنها بتغمّض عینیها ساعتها علشان تعیش
الإحساس.. وفي نفس الوقت تلاقي الرجل مفرج عینی

علشان يشوف مدى تأثيره عليها وإمتى هتنهار، لكن برضه
ما نقدرش ننكر إن الراجل الرومانسي بيحب البوسة زي
الست بالطبط.

- والله يا دكتور إحنا بجد ذئاب بشرية، والبنات يا عيني مش
عارفين يرضونا ازاي.. يعني أنا مرّة جاتلي رسالة على الباب
بتاعي في المجلة من بنت طيبة أوي بتقولي:

أستاذ إيهاب،

أنا اسمي «ب - و - س - ن - ي» من إسكندرية،
وخطيبي أبيع أوي، وكان دايمًا يطلب يبوسني أيام
الخطوبة، وأنا طبعًا كنت بارفض علشان ما يقولش
عليّ كده ولّا كده.. المشكلة بقه إن دُخلتنا بعد بُكره
ومش عارفة لَمّا يبجي يبوسني هاعمل إيه.. أقصد
يعني أقفل بُقي واعمل غشيمة؟! بس خايفة يقول
عليّ باردة ويطفش.. ولّا أستعرض مواهبي وافتح
بُقي وأشغل اللسان وكده؟ ولّا هيقول عليّ خبرة
ويطلّقني.. بصراحة مش عارفة أعمل إيه!

- هههه.. رسالة حقيقية ومنطقية فعلاً.. وانت ردّيت عليها
قلت إيه؟

- طبعًا قُلتها اقلّي بقك واعملي غشيمة وهو هيفرح أوي ويفتكر
إنه واخذ قُطة مغمضة، وبالطبع هيحاول يعلمك إزاي تبوسي..
خليه يدربك يومين تلاتة وبعد كده ابقني استعرضي كل خبراتك
السافلة أقصد السابقة لحد ما تلاقيه بيقولك: «إيه رأيك شوفتي

علّمتك ازاي».. ساعتها هزي راسك بخجل وقُوليله: «بس بقه
علشان باتكسف يا محمود».

- نصيحة فعلاً هاييلة.. بس يا ترى هيّ عملت بيها؟
- للأسف أيوه! بس المشكلة إنه ما طلّعش اسمه محمود!
راح ضاربها بالألم وقالها مين محمود ده يا فاجرة وبعد
كده طلّقها.

- هههه.. جمهورك تحفة زيّك.. طبّ خلّينا نرجع لموضوعنا..
شوف.. البوسة عند الست ليها وقت وليها مكان، وأجمل
وقت ليها لَمّا جوزها يبوسها وهو رايح الشغل أو وهو
راجع، وكمان لَمّا ينتهي اللقاء بينهم على السرير، وتالت
حالة هي بوسة الامتنان اللي بتعبّر عن شكر الراجل وتقديره
لمراته، أما بقه عن أجمل تلات أماكن بتحبه يبوسها فيهم:
«شفافها، ورقبتها، وإيديها».. وعلى فكرة بتكره جدّا البوسة
بطعم السجاير، علشان كده دايمًا نطلب من الراجل يبطلّ
سجاير قبل اللقاء بساعتين أو على الأقل يغسل سنانه..
ونفس الكلام للست اللي بتبقى واكله طبيخ وريحتها بصل
أو توم، ساعتها الراجل بيقرّف وممكن ما يبوسهاش خالص
بعد كده.

- أيوه صحيح فكّرتني بالدكتورة منال.

- مين الدكتورة منال؟

- دي واحدة صاحبة مراتي.. صيدلانية.. قالت لجوزها

٢
شجرة الدر
التقدير

- شوف يا سيدي...
هي اسمها الحقيقي «فاطمة»، وكان أبوها الله يرحمه
الخليفة المقتدر في بغداد.. من صغرها كانت بتحب
مصر وبتحلم تحكمها، علشان كده أبوها جوزها للسلطان
الصالح الأيوبي علشان لما يموت تورثه وتحكم مصر
(شغل على كبير).
السلطان الصالح كان فعلاً راجل صالح ومحترم، وكان
بيحب الفرسان «المماليك» - الأتراك - علشان كده إداهم
سُلطات واسعة في البلد، واستعان بيهم في القضاء على
الحملة الصليبية، لكن للأسف مات الملك الصالح في
أثناء نفس المعركة وقبل ما يفرح بالنصر، واتولى الحكم

بعده ابنه «توران شاه»، حاول توران إنه يتخلص من فرسان المماليك اللي كبر نفوذهم في البلد بعد هزيمتهم للصليبيين، لكن اللي حصل هو العكس.. قدروا يتخلصوا منه ويعينوا بداله شجرة الدر - مرات الرئيس بتاعهم - وبعد أيام معدودة اختارت الملكة القوية واحد من أمراء المماليك اللي هو «عز الدين أيبك التركماني»، علشان يبقى جوزها، وراحت مسمياه فوراً «الملك المعز».

مع الوقت، ومع سلطة وتحكم وجبروت شجرة الدر ابتدى أيبك يتخنيق ويدور على زوجة ثانية، وفعلاً اتجوز في السر واحدة من بنات الأيوبيين وخلف منها ابنه «نور».

عرفت شجرة الدر وقررت التخلص منه، وفعلاً تم اغتياله وهو بيستحمي.. لكن ربك يمهل ولا يمهمل.. وصل الخبير لأم نور مراته الثانية اللي استعانت بالأمير «سيف الدين قطز» قائد جيوش أيبك، واتفقت معاه يسلمها شجرة الدر انتقاماً لصديقه.. وفعلاً دخلت عليها المغطس مع شوية نسوان وهاتك يا ضرب بالقباقيب لحد ما جابوا أجلها وفلسعت (يعني ماتت).

* * *

- إيه رأيك في الولية المفترية دي بقه؟ عندك واحدة بالجبروت ده؟

- ياااه.. دول مفيش أكثر منهم.. أي ست دلوقتي بقت مستقوية

على جوزها، وخصوصاً بعد ما نزلوا الشغل وبقى معاهم فلوس وسلطة.

- والله عندك حق.. طب يلاً اديني المفيد.. تعرف واحدة منهم؟

- اتفضل يا صديقي.. ده رقم الصول مجاهد.. راجل بلدياتي وزبي العسل، بيخدم في سجن القناطر للنساء.. كلمه انت بس وقوله إنك من طرفي وهو هيساعدك علطول.

- هيساعدني ازاي يعني؟! هيسجني؟!!

- يا سيدي افهم.. الصول مجاهد عنده في السجن عشرات الستات اللي من النوع ده.. وأفتك إنه مرة حكالي على

مجينة عندهم اسمها «الحاجة ذرية» قصتها تشبه إلى حد كبير قصة شجرة الدر.. إنت كلمه بس وهو هيجيبك

تصريح زيارة ويخليك تقابلها، وابقى إديها قرشين وقولها إنك صحفي وبتعمل تحقيق وكده يعني، واسألها السؤال

بتاعنا.. يلاً بقه اخلع وريا شغل.

سجن النساء بالقناطر

باب خشبي من الطراز الكتيب، يحتضن بقسوة باب حديدي أكثر كآبة، يحتضنهما معاً سور حجري مهيب وعتيق عجزت صفحة النيل الزرقاء المقابلة له عن التخفيف من حدة مشهده.. مزيج من مشاعر الرهبة والانقباض تتتابك بمجرد أن تُغلق خلفك تلك البوابة الحديدية بصوتها الصدى الحزين.

الآن أنت داخل السجن، و عليك أولاً أن تمر بغرفة التحرش الذاتي، والمُطلق عليها مجازاً «غرفة التفتيش الذاتي»، وللعلم.. مجرد دخولك لتلك الغرفة كفيل بأن يُنسيك للحظات أنك مجرد زائر، وكفيل أيضاً بأن يُنسيك للأبد أنك مجرد إنسان، ستغيب عن مُخيلتك فجأة كل معالم الحياة من شوارع وأبنية وربما من ذكريات، لذا فعليك من آنٍ لآخر أن تُذكر نفسك: أنت ضيف، ضيف مؤقت، ضيف سيعاود الرحيل بعد ساعتين أو أقل إلى حيث جاء.. ضيف لا تنسى... لذا فلست مُضطراً أبداً لأن تتجرد من ملابسك الحياتية لترتدي ذلك الكفن الرسمي المُخصص للنزلاء.

أما عنهن؛ أولئك النسوة اللاتي ترتدين الأكفان البيضاء، فستلمح في أعينهن نظرة مستغيثة ومتعطشة للحرية.. أبداً لن تنساها ما حييت.

الحاجة دُرية واحدة منهن، تحمل نفس الخصائص والأمنيات، ترتدي نفس الكفن الأبيض، فقط كل ما يُميزها هو الرقم الأزرق والمكتوب بالكُوبيا على رداؤها البالي، «١١٩»، نعم هو رقمها الذي أخبرني به الصول مجاهد.

سيده ممتلئة القوام إلى درجة الترهُّل، ربما تجاوزت العقد الخامس من عمرها لتقترب من السادس، مع ذلك فهي ما زالت تحتفظ بنظرة القوة والقسوة في عينيها الجاحظتين.. أشرت إليها بابن سامة فردتها بأخرى لتفصح عن ظلمة فمها الذي ودَّع الأسنان منذ زمن سحيق، فلم تبقى فيه إلا واحدة مكسوة بالمعدن الفضي.

لم يكن بالأمر اليسير أن أصفح ثم أتحدث إلى امرأة قتلت زوجها ثم مثلت بجثته.. هو ولا شك أمر يحتاج إلى شجاعة تركتها خلف الباب الحديدي ولم أعد أمتلك منها إلا بقايا إرادة تُجبرني على بدء الحديث.

- أهلاً يا حاجة دُرية.

- أهلاً بيك يا حبيبي.

قالتها بصوت ذكوري يفوق في غلظته صوت أعتى الرجال لتقضي على ما تبقى بداخلي من شجاعة.

- أنا متأسف! كان بودي أزورك في مكان وظروف أحسن من كده!

- يا باشا ولا يهَمَّك.. كفاية اني اتشرفت بيك.

- يا فندم الشرف لي.. وان شاء الله ربنا يفك سجنك ويهون عليك الأيام الحاية.

- آمين يا رب.. قادر على كل شيء.. وكله عنده بحساب.

- هو حضرتك فاضلك كام سنة؟

- وحياتك بطلت أعد.. أهى تأبيدة وفات منها عشر سنين، احسبها انت بقه.

- كله ببعدي بإذن الله.. بس واضح إن حضرتك واخدة وضعت هنا في السجن علشان جاية من غير حارس ولا كلبشات!

- أهه.. أهه.. أهه.. أصل محسوبتك ولا مؤاخدة نوباتجية؟

- أيوه.. يعني سجينة قديمة وباشتغل مساعدة للشاويشات.. يعني أفتش على الزنازين، أوزع الجراية، البطاطين، أسكن الوارد... وكده يعني.

- أيوه فهمت.. يعني بيستعينوا بحضرتك زي ما الشرطة بتستعين بالبلطجية بره.

- قطع لسانك.. بلطجية في عينك.. راجل لسانه زفر!

- أنا متأسف.. والله ما أقصد.. أنا بس باضرب لحضرتك مثل.

- ضربة في قلبك.. لأ.. باقولك إيه من أولها.. اقف معوج واتكلم عديل لاحسن عليّ الطلاق أشقك نصين وابتدي فيك التأبيدة من أولها.. آل وانا اللي كنت فاكراك محترم وجاي تاخذ بخاطري!

- يا فندم هدي أعصابك (أنا إيه اللي كان سحيني من لساني بس!) طب حضرتك بتدخني؟

- معاك دُخان؟

- أيوه طبعًا.. اتفضلي.

- شدت العلبة كلها!

- تصدق بالله يا خضرة.. أهى انعلبة دي اللي هتشفعلك عندي وتخليني أحترمك من تاني.

- يااه! للدرجة دي السجاير حاجة مهمة عندكو؟!

- أمّا... دي يا باشا العملة هنا.. بالسوجارة تشتري البطانية والجراية والباكية والشوايشة، والمأمور كمان لو حبيت هههه.. أصل احنا ما بنعملش حاجة هنا بالفلوس غير البعزاة على الكانتين والكلام الفارغ.

- سبحان الله! كل مكان ولهُ ناسه وعُملته.. بس قوليلي حضرتك: يعني إيه تسكني الوارد وتشتري الجراية والباكية، أصل بصراحة المصطلحات دي جديدة عليّ، ومهم أري أكتب عنها في الجرنال عندي؟

- ليه هو أنت ما دخلتش سجن قبل كده؟ هههه.. طب اكتب

عندك: أسكن الوارد يعني آخذ النزيلات المستجدة وأدخلها العنابر.. مااشي؟ والجراية اللي همّ التلات ترغفة اللي بيظفحهم كل سجين يومياً.. أما بقّه الباكية فدي حكاية لوحدها وما ينفعش أحكيها لك.

- ليه بس ي فندم؟! هي سر حربي يعني؟! طب إيه رأيك في قاروصة سجائر كمان؟

- هههه.. طب ما انت صايع أهو وعامل حسابك، أمال كنت لابس وش العبيط ليه؟

وأخذت تحكي وأنا أستمع في ذهول وصمت:

- شرف يا عينيا، السجن عندنا زي الدنيا عندكو بالظبط.. يعني ناس وناس.. أغنيا وفقرا.. أسياد وعبيد.. والعبيد بقّه، واللي

انا كنت واحده منهم، همّ المساجين الغلابة.. يعني المرة اللي اتحكم عليها في قضية آداب أو نصب أو سرقة عبيطة.

- يعني إيه سرقة عبيطة؟

- يعني ولا مؤاخذة سرقة غسيل، موبایل، أو حتى شقة

مفروشة، والعبيد دول ملهمش ضهر يحميهم في السجن، ولا فلوس تسندهم، علشان كده بيلبسوا الكستور وياكلوا

الجراية ويناموا في النمرة.. أما الهوانم بقّه اللي همّ الأسياد - يجعل كلامنا خفيف عليهم - همّ الحرامية

الكبار، يعني اللي سرقت بنك، أو أموال عامة، أو اتهموها بالفساد الإداري.. والنسوان دي يا باشا بيبقى وراها

ضهر كبير برّه وجوّه، وفلوس كتييير تقدر تشتري بيها كل حاجة في السجن.

والواحدة منهم تلاقىها ماشية في الحوش بتلمع زي بتوع السيماء.. إي شي أحمر وأخضر وأزرق، وإي شي ذهب

وأصاغات. كباب وكفتة واكل من برّه وأكل مخصوص.. وطبعاً لا طوابير ولا اصطباجة ولا خدمة.. هههه..

آل خدمة آل! دا احنا اللي بنخدمها! وشرفك يا باشا عشرة خماشر جارية مننا ما بتقدر تلاحق على طلباتها، مع إنها

بتبقى نايمة ومأنتخة طول النهار في المستشفى - اللي هو بيتها يعني - شفت بقّه حكاية الباكية.. مش لدمتك حكاية

تديني إعدام؟ هههه.

- عندك حق.. هي فعلاً حكاية غريبة.. سبحان الله الفساد والمحسوبية موجودين حتى في السجن!

- يا باشا الفساد والمحسوبية موجودين في الدم... هههه. في الدم؟! عندك حق! مفيش أي أمل في البلد دي.

- إيه يا أستاذ؟ إنت مالك قلبتها نكد ليه كده؟! طب وعهد الله لأفرفشك.. شايف الشباك الصغير اللي في العنبر اللي

هناك ده؟

- أيوه شايفه.. ماله؟

- ده اللي كانت بتبص منه «سعاد حسني» على «عادل إمام» في فيلم «حُب في الزنزانة».. أصله اتصوّر هنا.. آه والنعمة

الشريفة.. أنا ما حضر توش.. الكدب خيبة.. بس الحرير هنا
بيتخانقوا كل يوم مع بعض علشان يبصوا منه على سجن
الرجالة.. هههه آل يعني هيلاقوا عادل إمام تاني فيهم..
وكل واحدة بتتخيل إن الطقطف هيجي من سجن الرجالة
بالجراية فيفتحوها يلاقوا جواب غرامي من أي شنب..
زي الفيلم يعني.. بس والله ليهم حق... وهي الواحدة
مننا فاضلها إيه غير الأحلام؟ لا جوز ولا عيل ولا بيت
ولا حتى مستقبل، ويوم ما بيجيلها إفراج استثنائي بتخرج
تلاقي العار مستنيها.. لا حد يبشغلها، ولا حد يبخط عليها،
وزي ما بيتقفل عليها باب الزنزانة هنا من المغرب وترمي
في الحكاري لحد ما تتخمد، برضه بتترمي في أوضة بعد
ما تخرج وتنام من المغرب.. يعني محصلة بعضها:
- يااه! دا واضح إن حضرتك بقيتي خبيرة بالسجن واللي فيه،
حتى في مشاعر النزيلات!

- ١٠ سنين يا باشا، اتغير عليّ ١١ مأمور و ٤٠٠ ظابط و ٣٠٠٠
نزيلة.. أعرفهم بالاسم، وأعرف حكاية كل واحدة... دفنت
منهم ناس، وودّعت منهم ناس.. دخلت أوضة التأديب
١٢٣ مرة، وقطعت سرايين إيدي ٧ مرّات، وحاولت أهرب
مرتين: مرّة منهم سلّمت نفسي في نص الطريق من اليأس،
ومرّة منهم مسكوني.. أعرف يا باشا كل حاجة عن السجن
ده.. أعرف عدد زنازينه، والشقوق اللي فيهم شق شق، ربيت

نص العيال اللي اتولدت هنا، لدرجة إن كلهم لحد دلوقتي
بيقولولي يا اما.. يااه يا باشا! ده انا بقيت حتة من السجن
والسجن بقه حتة مني!
- مش عارف.. برغم كل اللي بتحكّيه لكن حاسس إنك سعيدة
بوجودك هنا ومش ندمانة.
- وشرفك يا أستاذ ما ندمانة.. ولو الزمن رجع بيّ تاني برضه
هاقتل جوزي وادخل فيه السجن.
- للدرجة دي كان راجل سيّء؟!
- إلا سيّء! دا كان راجل ما تقلعوش ولا مؤاخذة من رجلك.

- إزاي يعني؟ احكي لي.

- طب هات سيجارة.

- يا ستي ما انتي أخذتي القاروصة كلها!
- يعني مش مدكّن سيجارة كده ولا كده؟
- هههه.. وشرفك أبدًا.

- هههه.. والنبي انت راجل محترم ودخلت دماغني، طب
اسمع يا فندي، أنا هاحكيلك حكايتي كلها ومن غير سجاير.
شوف.. أنا من ١٥ سنة دخل عليّ «زينهم» بهدومه المقطعة
وشكله المبهدل، وباس على إيدي علشان أشغله عندي في
المدبغة.. قلت يا بت حطيه في أي داهية ياكل عيش وأهو
برضه تاخدي فيه ثواب.. وكنت وقتها أكبر معلمة في الحتة،
وكان صيتي جايب من اسطبل عتتر لحد البساتين، وكان

أتخنها شنب يترعش لما يقف أدامي .. المهم .. عدت الأيام
وابتدي زينهم يوزيني مجدعته لحد ما اتعلقت بيه، وجت
الفاس في الراس واتجوزته .. وشرفك يا أستاذ كان نص
معلمين الحتة يحلموا بالتراب اللي بامشي عليه .. بس أنا
من خيبي قنت بلاش أتجوز واحد منهم بدل ما يتحكّم فيّ،
وقلت آخذ المدهول زينهم أمشييه في ضلي وأهو ضل زينهم
ولا ضل حيطه هههه .. إنت ما بتضحكش ليه؟ ولأ أقولك
استنى اضحك في الآخر .. ست شهور والقُط المغمّض
بقي عايز يتحكّم فيّ وفي المدبغة ويمشيني على هواه، لكن
على مير، وشرفك خليته يمشي عني إيده ورجله. مرّة على
التانية ما قدرش يستحمل راح طفشان، ورجعلي بعد شهرين
ساحب في إيده البت «نحمدو» الجربوعة اللي كانت شغالة
عندي وطفشت بعديه بكام يوم وأنا ما كنتش واخدة بالي
إنهم مظبطين مع بعض .. قال إيه المحروس اتجوزها عليّ ..
مش بس كده دي كمان جبلة منه، وبطنها أدامها مترين ..
تخيّل يا أستاذ بقه أنا المعلمة ذرية على سن ورُمح أرملة
المعلم رضوان اللي كان بينيم الحتة كلها من الضهر يتجوز
عليّ البت اللي كانت بتغسلي رجلي! ربك والحق .. الدم
جري في عروقي رُحت ساحبة المقص ومدّياه في كرشه
نزّله ميت .. واتدوّرت بالمقص على الصايعة بتاعته رُحت
مطيرلها عنيتها الجوز .. وقعدت على الكرسي رَجَل على

رَجَل وفي إيدي الشيشة لحد ما الحكومة جت وخذتني ..
إيه رأيك بقه؟ ما يستاهلش أقتله؟
- طبعًا يستاهل .. هوّ فيه حد عاقل يتجوز حضرتك؟! أقصد
يتجوز على حضرتك؟! ليه ناقصك إيه يعني ما انتي أهوه
ست رقيقة وحنونة وكُلك أنوثة!
- شكلك بتتريق .. وده مش حلو علشانك ... أنا دمي ينفور
بسرعة!
- لا يا فندم .. أتريق ازاي؟! هوّ العُمر بعزاة؟!
- أيوه كده اتعدل ويلاً بقه هات ٢٠٠ جنيه سلف واخلع
علشان الزيارة خلصت .. بس قولّي الأول إيت هتنزل
إمتي القصة بتاعتي في الجرنال زي ما الصول مجاهد قالي؟
- ياذن الله الأسبوع الجاي .. بس مش هينفع أبعثالك، إنتي
ممكن تنزليها من ع النّت، أكيد عندكو هنا ساير .. مش كده؟
- ساير؟! بت يا لوالا احظ هاتيلي المقص اللي شايله عندك
بسرعة!
طبعًا أنا سمعت كلمة المقص رُحت واخدها جري على برّه
وانا باصرُخ: اقتلوها قبل أن تتكاثر! اقتلوها قبل أن تتكاثر!

عودة الى بهلول

- إيه يا عم الولية دي اللي بعنتي ليها؟! بجد الله يسامحك!
بجد بجد لن أنسى لك هذا الموقف يا دكتور بهلول! أنا
أبهدل البهدلة دي!

- هههه.. إيه بس اللي حصل؟

- بقه دي شجرة الدر.. قول شجرة الصبار.. شجرة الزقوم..
دي المفروض تتعدم ٥٠ مرة.. مش تاخذ تأبيدة! وبعدين
فيه واحد تهين جوزها كده؟! ولما يحاول يسترد شخصيته
تقوم تمسح بكرامته الأرض وفي الآخر تقتله.. أعوذ بالله..
وتقول دي اللي هتجاويني على السؤال! تجاوب على إيه
يا راجل هي بتعرف تتكلم غير بالمقص!

- هههههه.. كفاية.. هتموتني من الضحك.. بس على فكرة
هي برضه جاوبت على السؤال يا حدق.

- نعم!

- أيوه.. «التقدير».. هي دي الإجابة، وده الاحتياج الثاني
للراجل بعد الغريزة، واللي عجزت ذرية إنها توفره لجوزها

فاضطر يدور عليه بره، بدليل إنه اختار إنسانة بسيطة تمامًا
وعكس مراته في كل حاجة علشان يتجوزها وتردله كرامته
وتحسسه برجولته.. مش كده ولا إيه؟

- يااه تصدق صح.. لتاني مرة تأكدلي إنك دكتور وتأكدني
إني... ولا بلاش. علشان كده إيت كنت مصمم نبتدي
بشجرة الدر يا لثيم!

- شوف يا صديقي.. ربنا سبحانه وتعالى خلق آدم في الجنة
قبل حواء بفترة علشان يفهم ويتعلم قبلها، وبالتالي يسبقها
في كل حاجة.. علشان لما تتخلق من ضلعه، وضلعه
بالذات علشان تربطها بيه علاقة الجزء بالكل، أو احتياج
الطفلة للأب، فتبتدي تسأله وتتعلم منه وتكون وراه مش
أدأمه، وبكده تحققله المتعة الفطرية الثانية اللي هي
«التقدير»، أو «القوام» بالتعبير القرآني.. علشان كده
الراجل ما يحبش الست اللي أقوى أو أنجح منه، وزى
ما بيقول دكتور «غراي» إن الراجل بيعشق دور الخبير،
يعني يحب يتكلم ومراته تفتح بقها من الإعجاب.. يحب
إنها تسأله وتتعلم منه، وده اللي بتعمله الستات المحترفة
علشان تحسس الراجل إنه قوي وجذاب وما حصلش
حتى في الجنس.. يعني بتمثل دور الجارية علشان تأسره
وتحوله لعبد.

- أيوه أيوه.. حضرتك تقصد يعني زي ما بتقول الفنانة سميرة

سعيد «تؤمر واقولك أمرك.. تؤمرني يا مالك عمري.. تحلم
وتفوق من حلمك.. وانت بتنفذ أمري».. مش كده؟
- مش ممكن يا أستاذ إيهاب! إنت كمان نابغة في الأغاني؟!
يا بخت جرنالك بيك!
- أخجلتم تواضعنا يا دوك.

- حتى آدم وحواء لَمَّا نزلوا الأرض وعاشوا في الغابة وتكاثروا،
ففضل شعور «القوامة» ده متأصل جوّه الراجل على امتداد
النسل.. يعني كان يفرح أوي وهو راجع من الصيد شايل
غزاة وشايف في عينيها نظرة الإعجاب والتقدير.. النظرة
اللي كانت بتهون عليه كل التعب اللي شافه طول اليوم بين
الخوف والحر.. الإحساس ده بالتحديد هو اللي خلّيتك
علشانه تقابل شجرة الدُر بتاعتنا.

- بس الإحساس ده تقريبًا اتلغى يا دكتور بعد ما السّت نزلت
الشغل واعتمدت على نفسها، زي ذرية وغيرها في كل
المستويات.

- هايل! ابتديت تفكّر.. مش بس كده.. دي ابتدت كمان السّت
تحمي نفسها بنفسها، إما عن طريق ممارسة الرياضة أو
بالآلات اللي بتشيلها في شنطتها، وإما عن طريق الشُرطة..
يعني الراجل كمان فقد شعوره ومتعته بحمايتها، علشان كده
تلاقي دايماً الخلافات الزوجية والطلاق أكثر مع الزوجة
اللي عندها اكتفاء ذاتي.. سواء كانت غنية بالوراثة أو ناجحة

أو بتشتغل.. يعني مش محتاجة للراجل، وبالتالي مش
محققاله جانب التقدير والقوامة اللي بنقول عليه.

- أيوه أيوه.. زي فيلم «مراتي مدير عام» كده، بتاع «شادية»
و«صلاح ذو الفقار»؟

- أبوس إيدك كفاية أمثلة سينمائية خليني أكمل.
- أنا متأسف يا باشا! بس خلي بالك، إنت اندمجت أوي
وبقيت فرحان بشخصية الدكتور.. وانا برضه جدع
ومحققلك القوامة والتقدير وباسمع أهو.
- هههه.. عندك حق.. بس برضه خليني أكمل.

- اتفضل.. بس ياريت حضرتك تديني النصائح دي في نُقط
وانا أبتدي أكتب.. إيه رأيك؟

- هايل.. ابتديت تبقى إيجابى وتتعلم.. طب يلاً اكتب
هاديك ١٠ نُقط مكثفة، بس اكتب في الأول إن الراجل
لَمَّا بيتجوز ست أعلى منه في أي حاجة شخصيته بتتغير
ويبقى أكثر حساسية، كمان احتياجاته بتتغير، والسّت
الذكية هي اللي تفهم كده، وتحاول تلغي الإحساس ده
جواه.. والموضوع بسيط:

١- الراجل ما يحبش النقد أو النصيحة وبالذات أدام الناس،
والسّت الشاطرة هي اللي تنصح من غير ما تجرح،
وما تحسسوش إنها بتنصحه بشكل مباشر، وما تنتقدوش
مهما حصل، لكن تديله أمثلة والجِدق يفهم.

- لا.. بس عامل نايم.. أصل بصراحة بازهق من الكتابة..
 ممكن تسجلهملي على سي دي؟
 - ممكن أغنيهملك كمان لو حبييت.. يلاً بقه شوف الدور
 على مين تعبتني معاك.
 - لا.. إنت اختار يا دكتور... ما أنت فاهم كل حاجة، وعارف
 إيه الاحتياج التالت يا لثيم!
 - طب خلاص نتكلم عن جوليت.
 - أيوه فهمت.. يبقى هندخل على المشاعر.. أحلى كلام.
 - ما تستعجلش أوي يمكن تكتشف عند جوليت حاجات
 غير المشاعر.
 - طب اسمع أصل الحكاية.

٣
رامي وجانيت
الاستقلالية والهدف

- شوف يا باشا.. روميو وجوليت أصلًا مش قصة حقيقية..
 دي مسرحية كتبها وليم شكسبير، وفي الحقيقة هي مسرحية
 مُبهجة جدًا.

- مُبهجة ازاي؟ هتخليني أضحك يعني؟
 - أمّااااا! دا انت هتضحك ضحك! اسمع يا باشا.
 روميو وجوليت بيتقابلوا لأول مرة في حفلة تنكرية، ويحبوا
 بعض من غير ما تعرف جوليت إنه من عيلة «متيغو»، ومن
 غير ما يعرف روميو إنها من عيلة «كابوليت»؛ أكثر عيلتين
 بيكرهوا بعض في مدينة فيرونا الإيطالية كلها.. حاجة كده
 زي موضوع التار عندنا في الصعيد.. علشان كده قرروا
 هما الاتنين يتجوزوا في السر.. حاجة كده زي الجواز

العُرْفِي عندنا في الكُلِّيَّات.. المهم ما طوّلش عليك البت
والواد خدوا بعضهم وطلعوا على القسيس بتاع المدينة
يضربوا ورقتين.

- وطبعًا القسيس زي المحامي عندنا!

- أيوا.. عليك نور.. زي المحامي عندنا، لكن بصراحة
القسيس كان متردد في الأول إنه يجوّزهم، لكن أقنعوه إن
جوازهم ممكن يصلح العيلتين على بعض، وفعلاً الراجل
اقتنع ورَحَّب بالفكرة وجوّزهم علطول، بس للأسف المعلم
«تبيالت» ابن عم جوليت عرف الخبر راح واخذ ديله في
سنانه وطلع على روميو: «قوم يا روميو بارزني».

طبعًا روميو عايز يصلح الموضوع مش يقلبها خناقة، راح
جارر ناعم وخلع من المبارزة، مين بقّه ساعتها اللي كان
واقف؟ «مركشيو» أنتيم روميو.. مركشيو الدم جري في
عروقه وما عجبوش انسحاب روميو، راح داخل على تبيالت
وطلب المبارزة، بس للأسف واضح إنه ما كانش فطران
كويس، راح واخذله ضربة في رقبتة جابته الأرض وفيّص..
قوم إيه.. روميو سخنان ومطلع سيفه وقتل تبيالت وهاتك
يا فكيك.. ركب حصانه وسافر على مدينة بعيدة اسمها
«مانتا».. بعد كام يوم دخل عليها الحاج الكبير- أبو جوليت-
وفي إيده «باريس».. عريس أبيضاني وحليوة وعنده شقة..
قالها هتجوزيه الأسبوع الجاي ورجلك فوق رقبتك، راحت

جارية على القسيس وقالتله الحقني هيجوّزوني «باريس»
وانا متجوّزة أصلاً! يا فضيحتي يا فضيحتي! اتصرف! اعمل
أي حاجة! هنروح في الكلابوش كلنا!

الراجل قعد يعصر في دماغه ونفي الآخر قالها: «لقيتها.. إنتي
هتشربي المحلول ده هيخليكي تنامي وأي حد هيشرفك
هيفتكرك ميتة، نكون إحنا بعتنا لروميو بييجي ياخذك
ونشوفلكم عقد عمل في أي دولة عربية ونخلص». وفعلاً
بعث الرسول لروميو علشان يحكيه موضوع المحلول..
بس للأسف الرسول مات وهو في الطريق، وفي نفس
اليوم ماتت أم روميو. ورجع روميو لقي «باريس» واقف
جنب جوليت، على أساس إنها ميتة ما يعرفش موضوع
المحلول، راح مطلع سيفه وقتله... كده وصلنا كام ميت
لحد دلوقتي يا عم بهلول؟

- والله ما انا عارف! دا إيه القصة المأندلة دي؟! هي دي
المُبَهْجَة؟! دامش فاضل في المسرحية غير روميو وجوليت
والقسيس وانا وانت!

- اصبر.. إنت لسه سُفّت حاجة.. وحياتك ما هيفضل في
المسرح غير الجمهور... المهم.. وقف روميو جنب
جوليت يجيبها يمين يجيبها شمال.. أبداً.. افكرها
فلسعت هي كمان، راح مطلع إزازة سم الفيران من جيبه
وشرب نُصّها.

- استنى استنى .. هوّ كان عامل حسابيه وجايب السم معاه؟!!

دا على كده بقّه شكسبير له أصول هندية!

- أيوه .. هوّ انت ما تعرفش إن أبو شكسبير كان واخذ بنت
أخت رج كابور؟

- مش باقولك انت خفة، انجز بقّه في أم القصة النكدية
بتاعتك دي!

- صحيت جوليت لقت روميو ميّت جنبها، راحت شاربة نص
إزازه السم اللي كان سايهلها (صايغ) وفلسعت هيّ كمان،
وفي آخر مشهد بتظهر العيلتين جنب الجثث والقسيس
بيقولهم «آدي آخره الخلافات» وبصالحهم على بعض ..
وتوبة تونة خلصت المسرحية.

- ياه ع النكد .. تصدق إنك أفلتني وانا بقّه هاعمل معاك واجب
وأديك قصة أكاب منها .. خُد الرقم ده كلمه وابقى ادعيلي.

- رقم مين؟

- رقم جانيت.

- مين جانيت؟

- مرات رامي.

- هههه .. تقصد رامي وجانيت .. إيشي خيال يا ناس .. هيّ
فعلاً القصة دي موجودة في الحقيقة؟

- أيوه موجودة في الحقيقة .. بس أبوس إيدك لو اتقفشت
وانت رايحلها ما تقولش إنني أديتك الرقم!

- ليه إن شاء الله؟! هي مسجونة برضه زي الحاجة دُرية؟

- ياريت .. دي ناشطة سياسية ومعتصمة في التحرير من يوم
التنحي.

- بتكلم جد؟! يعني بقالها سنة مُعتصمة؟ طب ودي عرفتها
مين؟ إنت ليك في اسياسة؟

- أبداً .. أصل انا جاتلي من شهر كده واحدة ست محترمة،
وقالتلي إن جانيت (بنت أخوها) معتصمة في خيمة في

التحرير ورافضة ترجع البيت، وكل اللي طالع عليها:
«مش هامشي إلا لَمَّا مُبارك يمشي» .. وأي حد يقولها إنه

اتنحي واتسجن كمان .. تبصله وتضحك، فطبعاً الولية
جايا لي على أساس إن بنت أخوها اتجنت أو حد عاملها

بيع الكتب
عيش مع الكتب
ok-spring.com

عمل.

- طب وانت عملت إيه معاهها؟

- أبداً .. أخذت منها رقم البنت واتصلت بيها، راحت سألاني
سؤال غريب، ولمّا جاوبتها عليه قفلت السكة في وشي

وما بقيتش ترد تاني.

- سؤال إيه؟

- سألتني: «إنت أيام ٢٥ يناير نزلت التحرير ولا مصطفى
محمود؟».

- هههه .. خلاص عرفت الإجابة ما تكملش .. هو انت منهم
يا بهلول!!

- والمصحف ما كنت أقصد، أنا فعلاً كنت بالصدفة في
المهندسين يوم ٢٥ يناير، وصلّيت الظهر في مصطفى
محمود. وبعد كده رجعت على البلد قفلت عليّ الباب لحد
ما الدنيا هدّيت . يعني لا لي في الظهر ولا في الطحين!
- حزب كتبة يعني؟

- يا عم أنا حزب السرير.. طول عمري باتفرّج واسقّف للي
يكسب وآخر الليل بادعي ربنا يجيب العواقب سليمة.
- طب اديني نمرتها.. بس على فكرة أنا فرحان فيك أوي إنك
طلعت ما بتفهمش في السياسة.. أخيراً حاجة ما بتفهمش
فيها!

* * *

طبعاً لأنني تورجي قديم كان طبيعي أجاب صح على كل
الأسئلة اللي سأنتهالي جانيت في الموبايل.. مش بس كده،
دا انا اضطريت أكذب واقولها إني باكتب في باب السياسة في
المجلة، وإني محتاج أقابلها وأعمل معاها ريبورتاج بصفتها
الوحيدة اللي لسه معتصمة في الميدان، وبالفعل رحّبت
بالفكرة.

ميدان التحرير في ٢٤ يناير ٢٠١٢

النهارده لَمَّا دخلت الميدان بعريتي الجديدة وركنتها في أي
حُتة، لمحت في المرايا صورة راجل بيدلة ونضارة سُودا وكارنيه
نقابة مختوم بختم النسر.. تقريباً كان أنا!

بس اللي استغربتلهُ أوي إن الميدان ما خدنيش بالحُضن زي
كل مرّة.. يظهر ما عرفنيش وانا بالنضارة.. أكيد.. أصل صورتي
اللي كانت مرسومة على حيطان المتحف المصري يوم جمعة
الغضب وانا بارمي طوبة على «المُدْرَعة» كانت عبارة عن شاب
شعره منكوش ولا بس كوفية وتيشيرت أبيض عليه دم طارق ابن
عمي اللي دهسته «المُدْرَعة» يومها.

ياااه!! الميدان اتغيّر أوي!! فين الناس والدبابات؟ فين اليُفط
اللي كانت على العواميد أَدَام جامع عمر مكرم؟ فين الزلظ
اللي كان على الأرض بيحوّط نُقط الدم؟ فين بتاع الشاي وبتاع
الكُشري وبتاع البطاطا اللي باعوا في الـ ١٨ يوم أكثر من اللي
باعوه طول حياتهم؟ فين المستشفى الميداني اللي كانت في
الأصل شركة سياحة؟ فين الخيم وريحة الغاز وصور الشُّهدا؟

فين لجان التفتيش اللي كان عاملها الشباب؟ والواد اللي كان
دايمًا يعتذرلي كل ما يبجي يفتشني؟ والله العظيم واحشني
ابن الإيه! سمعت إنه مات من الفرحة لَمَّا سمع إن مبارك اتنحي!
الله يرحمه! أكيد هو بيضه شهيد.. شهيد الفرحة هههه.. ياااه!
يعني ما كانش يعيش كمان يومين علشان يحتفل معانا بالحرية..
يلاً بقه الله يرحمنا جميعًا!!

أيوه لقيتها.. أكيد هي دي المجنونة اللي خارجة من الخيمة
جنب الهيلتون.. هو لسه هيلتون ولا غيروه.. أكيد غيروه.. هو
فيه إيه يعني في السيدان ما تغيرش!!؟

- إزي حضرتك.. أنا اللي كلمتك في الموبايل.

- أستاذ إيهاب مش كده؟ أهلاً بيك.. نورت بيتي المتواضع.
- بيتك؟!

- أيوه بيتي.. ما هي الخيمة دي بيتي من أول يوم في الثورة.
- ماشي بس الثورة خلصت ومبارك اتنحي.

- هههه.. هو انت من اللي بيقولوا إن مبارك اتنحي؟

- هو حضرتك شايفة حاجة تانية؟ ما هو فعلاً اتنحي،
واتسجن كمان، بدليل إني جايلك النهارده علشان نعمل
حوار عن احتفالية بكرة، إلهي كل مصر هتعتبرها أول عيد
لثورة يناير.

- هههه.. يا حبيبي افهم! مبارك دخل يغير البدلة اللي اتوسخت
في يناير وهيرجع ثاني!

- يا آنسة إنتي ليه عايزة تشككيني فيكي؟! ما انتي عاقلة أهوه
وزي الفل ومستحيل هاصدق إنك بتتعاطي حاجة.
- هههه.. أتعاطي حاجة! الله يسامحك.. طب هاسألك سؤال.
- اتفضلني.

- هو النهارده كام في الشهر؟

- النهارده ٢٤ يناير ٢٠١٢.

- لا يا عبيط! النهارده ١٣ فبراير ٢٠١١.. يعني اليوم الـ ١٩
لثورة.

- تقصدي ثاني يوم التنحي؟

- أيواااان ثاني يوم الوهم.

- وهم!! طب باقول لحضرتك إيه؟ ما تسيبك من الجوده
وتعالني نتكلم في المهم.

- ماشي يا سيدي نتكلم في المهم.. اتفضل.

- شوفي يا ستي.. أنا نفسي أعمل ريبورتاج عن قصص الحب
اللي قامت في الميدان أثناء الثورة، بمناسبة - زي ما قُلتك -
العيد الأول ليها، تعرفي أي قصص أو مواقف طريفة عن
الموضوع ده؟

- مواقف طريفة؟! بقه هي دي المواضيع اللي بتقدموها
دلوقتي في البرامج والجرأيد؟! بجد ربنا يقويكوا!

- يا ستي ما تفكيها شوية.. الناس برضه محتاجة تفرح بعد
كمية الضغوط اللي عاشتها طول السنة اللي فاتت.

- والله عندك حق.. تعالى نهيس شوية بمناسبة عيد الثورة
اللي بتقول عليها.. اسأل يا أستاذ وانا ها حكيك على كل
حاجة بتحلم بيها.

- أهو ده الكلام يا آنسة جانيت يا غسل.. احكي لي مبدأيا عن
قصتك مع رامي.. إزاي اتعرفتوا؟ إزاي حبيتوا بعض وكده
يعني؟

- هههه.. حاضر يلا نهيس.. شوف يا سيدي.. أنا كنت طيبية
امتياز ومتطوعة في المستشفى الميداني، جالي رامي يوم
«موقعة الجمل» وكانوا الشباب شايلينه بجرح خطير في
صدره.. كان غرقان في دمه وما ابتدأش يفوق غير بعد
5 ساعات لما نقلناه دم.. هو يا دوبك فتح عينيه وراج نازل
من على السرير يجري على بره.. في الأول افكرته خايف،
لكن اكتشفت بعد كده إنه بيجري وهو فاكر إن المعركة
لسه شغالة.. وما رضيش يرجع السرير تاني غير لما أخذته
وسندته لحد مكان المعركة، وشاف الشباب فوق العماير
وتحتها بيحموا الميدان، والبلطجية متربطين في محطة
مترو الأنفاق اللي كنا عاملنها حبس مؤقت ليهم، قعدنا
ندردش شوية وحسيت من كلامه إنه مستغرب إنني مسيحية
وموجودة في الميدان، ولما سألته: إنت مستغرب ليه، طب
ما الميدان فيه كثير مسيحيين غيري ورجال دين كمان..
حلقلي إنه لسه ما قابلش ولا واحد مننا، وقالني بمُنتهى

الفرحة: «أنا خلاص اطمَنت إن الثورة هتنجح طالما كلنا
إيد واحدة وهدف واحد».. أنا بصراحة ما كتش مصدقاه في
الأول، وكنت حاسة إنه بيجاملني.. هههه.. علشان روحه في
إيدي.. بس لما لقيت الكلام فعلاً خارج من قلبه اطمَنت،
وسألته بمُنتهى الصراحة: إنت ازاي مبسوط إننا معاكو في
الميدان؟ ضحك وقالني: «تقصدي يعني علشان أنا مربى
دقني وكده يعني؟ يا ستي دي دقن صغيرة ما تخوفش؟».
قلتله أنا آسفة! بس معلوماتي إنكو بتكرهونا.. ضحك تاني
وقالني: «لا والله أنا مش من الناس دي، بس بيني وبينك أبويا
الحاج برهومي الله يسامحه واحد منهم».. قلتله إوعى يكون
أبوك هو الشيخ البرهومي اللي دايمًا يطلع على الفضائيات يلعن
فينا.. قالني: «للأسف هو! بس ربنا إن شاء الله هيهديه ويفهم إن
الإيمان والكُفر حاجة بيحددها ربنا مش هو ولا غيره».. قلتله
ولا يهملك يا رامي ما انا وانت في الهوا سوا.. قالني: «إزاي؟».
قلتله أصل بابا برضه موظف كبير في الحكومة، ومن
الناس اللي نزلوا امبارح مصطفى محمود علشان يعتذروا
لمبارك.. قالني: «سبحان الله! أبوكي من بتوع المهندسين،
يعني ضد الثورة.. وأبويا من الناس اللي بيكفروا الثوار
ويعتبروهم خرجوا على الحاكم! ويشاء ربنا غصب عنهم
إننا نخرج من ظهورهم وننزل نطالب بالحرية ونرفض
جيلهم اللي اتربى على الذل والمهانة».

يومين بالظبط وقام رامي رغم إن جرحه كان لسه ما التأمش، ونزل مكانه في لجان التفتيش وخذ معاه الخوذة اللي كانت محسّسني إنه فعلاً جندي وفي ميدان معركة، وابتدينا نتكلم على الموبايل من وقت للتاني وبعد كده اتنقل للاعتصام أذاه نادي هليوبوليس في العروبة، واتقطعت أخباره لحد اليوم اللي بتسمّوه «يوم التنحي».. واتفض الميدان بعد الاحتفال الكبير اللي اتعمل بالليل، وصحيت الصبح ما لقيتش غير خيمتي وخيمة تانية جنبها، استنيت لحد ما لقيت اللي خارج منها.. طلع رامي.. بصينا لبعض ووقعنا على روحنا من الضحك.. قالي: «إنتي لسه هنا ليه؟». قتلته لنفس السب اللي مخليك لسه هنا.. بعديها جالنا تلفونات كثير من أهلنا وأصدقائنا يتهمونا إننا مجانين، ويطلبوا إننا نرجع بيوتنا، بس أنا ورامي كنا بنضحك من جؤانا عليهم.. فضلنا على كده حوالي شهر والناس فاكرانا مجانين، لحد ما ابتدت قيادات كبيرة تيجي وتتكلم معانا علشان نفض اعتصامنا، وأنا ورامي برضه مصممين إننا مش هنمشي غير لَمَّا مبارك يتنحي.. صمدنا أدام الدبابات اللي كانت بتحاول تشيل الخيمتين، لكن ما قدرناش نصمد أدام البلطجية اللي كانوا بيطلعوا علينا كل ساعة.. وفي النهاية اضطررنا نستسلم ونرفع الراية البيضاء ونسيب الميدان...

شهرين تاني ما سمعتش عن رامي حاجة، وفجأة اتصل بيّ

علشان أنضم لحزب ثوري شبابي بيأسسه علشان ينافس في البرلمان، وأقنعني إننا لازم نمشي في اتجاهين في وقت واحد: نضال وثورة من ناحية، وسياسة من ناحية تانية.. أنا بصراحة اقتنعت وشفت إن ده أسلم حل، خصوصاً لَمَّا عرفت إن أبو رامي بيأسس حزب كبير اسمه «الأحرار»، ومحدثر هيعرف ينافس غير الإخوان ورموز النظام القديم.. كمان اللي حمّسني أكثر إنني عرفت إن أعضاء البرلمان المنتخب هيفتاروا ١٠٠ شخصية يكتبوا الدستور، يعني لازم نكون بين أعضاء البرلمان علشان نختار اللي هيفتاروا دستور بلادنا لأول مرة.. وفعلاً ابتدينا نجمع أصوات ونعمل دعايا، بس للأسف التمويل كان ذاتي وضعيف جداً، وقدراتنا على الحشد كانت ضعيفة بالمقارنة بالقوى الإسلامية اللي كان ليها شعبية رهيبه في القرى والأقاليم والأحياء الشعبية، وطبعاً أكلت البرلمان بالكامل، ورفضت تدعّم الأحزاب الشبابية اللي زينا، واحنا طبعاً بالمقارنة بيهم كنا صفر، يعني لا قنوات ولا فلوس ولا حتى جوامع.. لكن الجميل في التجربة إنها قرّبتني أنا ورامي من بعضنا، واكتشفنا مع الوقت إننا بنحب بعض بجد.. رامي كان خجول، علشان كده أنا اللي ابتديت واعترفله بإعجابي وحبي، ساعتها اكتشفت إنه مش بس خجول لكن أعصابه ضعيفة، لأنه وقع على الأرض من الخضة، وقالي: «إزاي؟! بس أنتي

مسيحية وانا مسلم».. أنا ساعتها ضحكت وقتلته يا عم سييك ما هي الثورة وحدث كل المصريين ولأ تكونش انت اللي ما بتحبنيش يا واد.. قالي: «إزاي وانتي بقيتي الحاجة الوحيدة في حياتي اللي تستاهل أعيش علشانها».. قُلتله يا سلام يا سلام ما انت بتعرف تقول كلام حلوا أهو أمال عاملي فيها شيخ ليه؟

قالي: «اتلمي يا بت.. دا الشيوخ أجدهم ناس تقول كلام حلوا، وبعدين هو مين أصلاً اللي قالك إني شيخ، دا انا يا دوب باصلي الخمس فروض بالعافية ههه».

ما اعرفش أنا ليه حبيت رامي أوي كده، وما اعرفش برضه ليه حبني بالسرعة دي، بس يمكن اشتراكنا في استقلالية الفكر وتوحيد الهدف والإيمان بقضية عادلة هو اللي قربنا بأسرع مما نتخيل، وخلصنا نحس إننا في غربة ملناش فيها غير بعض.. علشان كده ما كانش أدمننا غير إننا نتجوز، وفعلاً أخذت رامي من إيده ووديته أعرفه على بابا اللي كان هيموت من الصدمة.. طبعاً حضرتك متخيل إن بابا كان هيموت من الصدمة علشان موضوع اختلاف الديانة! أنا برضه كنت فاكرة زيك كده في الأول، رغم إني عارفة إن بابا كمسيحي كاثوليكي ما بتفرقش معاه الحاجات دي، لكن اللي اكتشفته واللي جنني أنا ورامي إنه كان رافض علشان انتماء رامي لشباب الثورة، وزى ما قُلتلك إن بابا في الوقت

ده كان مُنضم لحركة «أسفين يا ريس» إلكي كانت بتتعامل مع الثوار على إنهم أعداء وخونة للوطن، سُفت أد إيه الاختلاف السياسي بقى أصعب من الاختلاف العقيدي وفَرَّق كل المصريين عن بعض!

رفض بابا، واستمر على رفضه لفترة، وبالتحديد بعد ما قُلتله إني هتجوز رامي مهما حصل، حتى لو اضطررت أعمل كده من وراك.. ساعتها خاف من الفضيحة واستسلم، وقالي: «أنا هسييك تخوضي التجربة وواثق إنك هتندمي».. وفعلاً اتجوزنا أنا ورامي في حفلة بسيطة عملوها أصحابنا وما حضرهاش من عيلتي وعيلته غير عمتي وابنها «جوزيف» اللي سُفت وقتها في عينيه نظرة لرامي ما فهمتهاش غير يوم ما قبضوا على رامي وسجنوه.. جوزيف كان من نفس عقلية بابا، ومنتمي زيُه لنظام مبارك، كمان بابا هو اللي كان مريبه ووعدته إنه هيتجوزني.. بس أنا طبعاً ما كنتش طايقاه، وزاد كُرهِي لُه أكثر بعد موقفه من الثورة، بعدها فهمت إنه هو اللي بلغ عن رامي علشان يزيحه من طريقه ومن طريق مصر كلها.. بعد أيام حاولت أزور رامي في السجن لكن منعوني... وابتدت تطلع إشاعات إنه أضرب عن الطعام لحد ما مات في السجن.. بس انا ما كنتش مصدقة.

رامي اتقبض عليه يوم ٢٠ أكتوبر؛ يعني قبل أحداث ماسبيرو

بأسبوع - الوقفة الاحتجاجية اللي كنت أنا وهو من الشباب اللي دعوا ليها - ونزلت يومئذ وشفت أعلى أصحابي يموتوا أدام عيننا، وزادت قناعاتي إننا في اليوم ١٩ للثورة، لكن أغرب حاجة في الموضوع إن ناس كثير جلفولي إنهم شافوا رامي وهو حاض «مينادانيال» في أحد لحضاته . والأغرب - كده إنني ما شفتوش لا يومئذ ولا في أي يوم ثاني، وكأنه شبح ظهر واختفى .. وكرر الموقف ده ثاني يوم ١٩ نوفمبر في أحداث محمد محمود، وشافوا رامي وهو يبصرخ في وش قناص العيون وبيقوله «حرام عليك! دول شباب بلدك!» وخذ أحمد حرارة بأحوتة سيكل علشان يسعف جنبه. واختفى بعديها، وقالوا أكيد اتقبض عليه، وبرضه شفتوش غم إنني كنت معاهم! وفي ١٦ ديسمبر اتكرر الموضوع لتألت مرة، بس انا المرة دي اللي شفته بعيني وهو بيحاول يوقف نزيه الشيخ «عماد عفت» أدام مجلس الوزراء.. لكن زحمة الناس منعتني من الوصول ليه وبرضه اختفى.

حاولت أزوره ثاني في السجن قالولي ده هرب، لقيت عليه البلد كلها، وسألت في كل المستشفيات والأقسام ومحدث دلني .. قلت يبقى مفيش فايدة، وأخذت خيمتي وجيت على الميدان، وكلتي ثقة إنني هاشوفه هنا، أصل رامي زي حالاتي، حالف ما هيرجع بيته غير بعد التنحي... آدي يا سيدي الحكاية كلها.

- يا سلااام.. بقه اختفى، وبعد كده شافوه في ماسبيرو واختفى، وبعد كده شافوه في محمد محمود واختفى، وبعد كده شفتيه في مجلس الوزراء؟! بدمتك مش الموضوع ده اتعمل في فيلم «حكايات الغريب» بتاع «محمد منير»؟! - أيوه عندك حق.. يمكن في كل مرة كنا بنشوفه هو بجده. ويمكن كنا بنشوف واحد يشبهه فنفتكر إنه رامي! أصل ملامح الناس اللي بتطالب بالحرية دايمًا بتشبه بعضها زي اللي حصل في «حكايات الغريب» بالظبط.. وزى برضه ملامح العبيد.. يشبهوا بعض.. وزى ما حضرتك بتشبه الشيخ برهومي وأبويا وجوزيف ابن عمي.

نعم نعم!! دي شتيمة بقه ولأيه؟

- يا أخي شتيمة ازاي؟ دا انا باقولك تشبه أبويا، معقول هاشتم أبويا؟! دا انت حتى عندك نفس نظرة الثقة بتاعته.. هو حضرتك قُلتلي بتشتغل إيه؟

- ما انا قُلتك باشتغل صحفي في كام جرنال، وباقدم كذا برنامج في الفضائيات.

- طب تسمحلي أتوقع إنك اشتغلت كل الشغلانات دي بعد الثورة علطول؟

- أيوه فعلاً.. بس عرفتي ازاي؟!!

- ما هو طبعي إن واحد له مواهبك وأفكارك يبقى لازم تفتح له كل الجرايد والقنوات بعد الثورة!

- لا، إنتي المرّة دي بتتريقي بجد... لا يا آنسة مش انا اللي ينفع حد يشتريني ولا يزايد على وطنيتي.. أنا حتى لما اتعينت صحفي في عهد مبارك كنت باكتب مقالات ضده وضد نظامه وياما ناديت بإسقاطه.

- معقرنة؟! طب ونيه محدش قبض عليك وقتها هههه.. شوف يا صديقي، إنت وغيرك من الكومبارس اللي كانوا يمثّلوا دور المعارضة، واللي كان النظام نفسه بيدفعلهم تمن معارضتهم الصورية، وييمول جرايدهم وأحزابهم الكرتونية، ما تستحقوش غير الإعدام؛ لأنكم ضحكتموا على الشعب وأقنعتموه إن فيه معارضة. في الوقت اللي كان أي حد يعارض بجد ويكتب أو يقول حقايق كان بيترمي في السجن! أرجوك نضف بدلتك علشان اتملت ثياب من كلامي، والحق بسرعة وديها لاندري علشان تقابل بيها الصبح أسيادك وتديهم التقرير اللي كتبه عني!

- تقرير؟! صدّقيني إنتي فاهماني غلط، طب أقسم بالله إنني كنت من أوائل الناس اللي نزلوا في ٢٥ يناير، والصورة دي أكبر دليل على كلامي.

- ودي صورة مين إن شاء الله؟

- دي صورتي جنب رائل غنيم وعبد الرحمن يوسف وبلال فضل ومحمد دياب.. كنا واقفين أدام «دار الحكمة» اللي في القصر العيني علشان نحشد الناس يوم ٢٥ يناير،

والصورة الثانية دي كمان لما أخذت رصاصة في كتفي يوم ٢٨.

- غريبة دي صور حقيقية فعلاً، إنت حيرتني معاك بجد!
- مش بس كده، دا انا اتمسكت كذا مرّة قبل الثورة علشان القضايد اللي كنت باكتبها ضد مبارك.
- بتكلم بجد؟! طب سمعني حاجتي.
- شوفي يا ستي:

حاجة تضحك ما تبكيش / شعب يموت ورئيسه يعيش
طب والمصحف والإنجيل / نفس الرئيس خامس جيل
جدي وابويا مُرورًا بيا / وابني وابنه وناس بعديا
صحيو لاقوه حاكم لوطنهم / صحيو لاقوه ساكن في بديهم
واحد بس وغيره مفيش / إحنا نموت وجنابه يعيش
قولوا ورايا يعيش الرئيس / عافية يعيش عافية يعيش

* * *

مرّة سألت تحتّمس جارنا / تعرف إيه عن جدو الرئيس؟
قالي يا هوبة بدأت تهيس / مين يا عبيط ما عاصرش الرئيس
فرعون عاصره وقارون عاصره / حتى شارون اترّبّي في عصره
واللي اترشّح مرّة في عصره / مسكه وعصره
واحد بس وغيره مفيش / إحنا نموت وجنابه يعيش
قولوا ورايا يعيش الرئيس / عافية يعيش عافية يعيش

* * *

مرّة صرخت في وسط الشارع / قلت يا رب تزيح الغمة
رد عليّ الصوت مستغرب / قالي ازاى تنزاح الغمة؟
قلت يغور / قالي كلامك كله مخالف للدستور
قلت يموت / قالي كلامك مش مطبوع
دا اللي يخلف / مش بيموت
قلت مصيبة دا لسه عياله / تبقى العزبة أكيد بقياله
يبقى نعزل ونسيبها له / إحنا نموت وولاده تعيش
قولوا ورايا يعيش الرئيس / عافية يعيش عافية يعيش
- الله! بجد رائعة! أنا مش مصدقة! إنت فعلاً كتبت دي؟! أمال
بقيت كده ازاى؟! سبحان الله! الناس دي فعلاً قادرة تخرس
أي صوت بيعارضها، وفاهمة كويس مين اللي لازم تخرسه
بالسجن، ومين اللي تقدر تخرسه بالشهرة والفلوس!
- برضه مفيش فائدة! يعني إنتي تقصدي إنهم خرسوني
بالشهرة والفلوس.. طب انا بقه هاقولك كلمتين يا حلوة
ويا ريت تخليهم حلقة في ودنك.
حضرتك انتي والشباب اللي زيّك واللي بينسبوا الثورة
لنفسهم اتغرّتوا أوي.. اتغرّتوا زيادة عن اللزوم.. افكرتم
انكم هتقدروا تغييروا التاريخ.. لكن للأسف إنتو مش
هتقدروا تعملوا أي حاجة، ولا ترجعوا عجلة الزمن لورا،
وده لسبب بسيط، لأن الشعب معانا مش معاكو.. إحنا
اللي بنحرّكه وبنوجّه أفكاره.. إحنا اللي نقدر نقوله مين

حلو ومين وحش.. إحنا الإعلام يا هانم.. كفاية بقه تمرد
خربتوا البلد! لا عاجبكم مبارك ولا الإسلاميين ولا القضاء
ولا الشرطة... حتى الشعب نفسه مش عاجبكم وبتتهموه
بالغباء! والجيش! الجيش اللي حمى الثورة وحمى مصر
كلها برضه بتشتموه! الجيش يا هانم يعني عبد الناصر، يعني
ثورة يوليو المجيدة! الجيش يعني السادات ونصر أكتوبر
العظيم! الجيش يعني مبارك والضربة الجوية وكوبري بنها
العلوي! كفاية بقه! كفاية ارحمونا شوية!
- تسقيفة عالية أوي للخطيب المفوّه والإعلامي المتمكّن
إيهاب باشا! بص يا صديقي.. أنا عمري ما أنكرت
ولا أنكرت إن جيش بلدي أعظم وأشرف جيش في الدنيا،
وعمري ما نسيت ولا هانسي إنه هوّ اللي حمى ثورتنا! بس
برضه عمري ما هاقبل إنه يحكمنا تاني.. كفاية علينا أوي
عبد الناصر والسادات ومبارك اللي خلّونا آخر دولة في
الدنيا! وإذا كان على جمال وثورة ٢٣ يوليو اللي أنقذتنا
بجد من الملكية واستبدادها فهوّ برضه صاحب نكسة ٦٧
اللي دمّرت الجيش والبلد كلها! كمان السادات صاحب
نصر أكتوبر العظيم اللي رجّعنا كرامتنا هوّ برضه صاحب
نكسة كامب ديفيد اللي هدمت الوحدة العربية وفتت الأمة
كلها! أما بقه مبارك بتاعك اللي بتسمّوه صاحب الضربة
الجوية فهوّ أكبر كذبة حصلت في تاريخنا! وكفاية عليه

أوي كوبري بنها العلوي زي ما انت قلت، بس ازاي يا أستاذ
تنسبوا نصر أكتوبر لقائد القوات الجوية اللي يا دوب نفذ
أمر التحرك اللي جأه من القيادة العليا؟! يبقى على كده
بقه من حق قائد المشاة أو البحرية ينسب النصر لنفسه!
يا أستاذ النصر ده منك الجيش كله.. ملك الشعب كله..
ملك الجندي البسيط اللي ضحى بحياته.. ملك الأم الغلبانة
والأب الطيب اللي ضحى بابنه علشان مصر.. وياريت بجد
مبارك ده كان ضربنا إحنا الضربة الجوية وحكم إسرائيل
٣٠ سنة، أكيد كان بقى حالنا أحسن بكثير!! وفي النهاية
صدقتني أنا باحب مصر أوي، وباحترم جيش بلدي جدًّا،
وتهون الدنيا كلها أدام نقطة دم تنزل من جندي واقف طول
الليل والنهار على الحدود علشان يحميني! لكن برضه مش
عايزاه يحكمننا.. عايزاه يحميننا ويحمي شرعية أي رئيس
مدني يوافق عليه الشعب.. عايزاه دايماً في صف الناس
مش في صف السُلطة مهما كانت!

- يا بنتي طب وإيه المشكلة لَمَّا يحكمونا؟ طب ما هو من
حقهم يرشحوا رئيس زيهم زي غيرهم، ولَمَّا ينجح بيخلع
البدلة الميري ويلبس البدلة الملكي ويبقى حاكم مدني.. ده
غير إن فيه دول كتير بيحكمها عسكريين ونهضوا بيها، زي
كوريا الشمالية.. أهى حكم عسكري كامل وناجح، وبلاد
تانية نُص عسكري زي تركيا برضه نهضت بحماية الجيش...

إيه المشكلة بقه؟! وبعدين اطمّني اطمّني كل كلامنا ده
ملوش أي لازمة لأنهم خلاص دعوا لانتخابات برلمانية،
وكمّان وعدوا إنهم مش هينزلوا بأي مرشح رياسي، وانا بقه
باتق في كلامهم جدًّا.
- أنا مش هازد عليك واقولك طب وانحكم العسكري في
تشاد والأرجنتين والسودان وغيرهم... ولا هاقولك إن
كل البلاد اللي بيحكمها العسكر دول نامية وعالم تالت..
مش هاقولك إن كل الدول العظمى بيحكمها رئيس مدني
وحكم مدني.. ولا هاقولك إن أي حاكم عسكري اتربى
على إنه يسمع الأمر وينفذه زي ما هو أو يدي الأمر ويصمم
على تنفيذه زي ما هو.. لكن هاقولك: «أفلح إن صدق»..
ويا ريت فعلاً ما ينزلوش بمُرشح علشان نتأكد إن وقوفهم
جنب الثورة كان لمصلحة الشعب.. بس يا خوفي ليكونوا
ناوين يجيبولنا رئيس من الشيوخ اللي باعوننا في محمد
محمود وماسيرو ومجلس الوزراء تبقى مصيبة.. بس مصيبة
ليه.. طب ما خلاص البشائر بانّت وحشدوا للاستفتاء
وخدوه بأغلبية، وكمّان سمّوها «غزوة الصناديق»، يبقى
خلاص الخطوة الجاية برلمان وبعد كده رئاسة.. ليه لأ؟
طالما التورته حلوة ولذيذة ما ياكلوهاش ليه؟
- يا اادي النيلة!! هو احنا نخلص من الجيش تمسكي في
الإسلاميين؟! مالهم بقه الإسلاميين.. مش دول اللي

شغالين في العمل الخيري من سنين؟ وشايلين عن الحكومة
أعباء الفقراء في القرى والنجوع!؟

- ماشي.. على عيني وراسي.. بتوع ربنا ويساعدوا الفقراء
بس ما يحكمونا.. هو احنا ناقصين فاشية تاني، وحكم
ديني سلطوي زي اللي حصل في أفغانستان وقبلها إيران!؟
إحنا عايزين دولة مدنية حديثة، مش حاكم يقولنا إن الملايكة
بتأيده وإن انتقاده معصية وكُفر!

- يا ستي ما تخافيش.. هُم كمان وعدوا إنهم مش هينزلوا
بمُرشح رئاسي اطمَني بَقه، ودول كمان باثق فيهم جدًا..
يعني خلاص لا الجيش هينزل بمُرشح ولا الإسلاميين،
وبكره تشوفي.

- وحياتك انت اللي بكره هتشوف!

- طب قوليلي بس عايزة مين يحكمنا.. الليبراليين بتوعك
اللي ما وراهمش شُغلة ولا مَشغلة غير الظهور في البرامج!؟
إيشي ناشط سياسي، وإيشي خبير إستراتيجي! وبعدين طب
ما هُم برُضه هيموتوا على التورثة.. ولأ إيه؟

- في دي عندك حق.. بس مين قالك إني باحلم إن الليبراليين
يحكمونا؟ أنا لسه باقولك إن معظمهم كان شغال كومبارس
مُعارض أيام النظام القديم.. أنا يا أستاذ إيهاب باحلم بدولة
مدنية يحكمها كل طوائف وأحزاب البلد، ويكون الشباب
جزء أساسي من المنظومة دي مش مجرد شاب ولأ اتنين

والباقى عواجز.. باحلم بدولة حديثة قائمة على الحريات
والمساواة، دولة تحقق مطالب ثورتنا: «عيش، حُرية، عدالة
اجتماعية».. باحلم بدولة عصرية تلحق العالم اللي سبقنا
تكنولوجياً.. باحلم بأبحاث علمية وبعثات.. ما عنديش
مانع يبنى فيها قيادات عسكرية ورموز إسلامية وليبرالية.
ما عنديش مانع يبقى فيها ناصريين وشيوعيين ويساريين.
بس مش عايزة أمن دولة تاني تكون وظيفته حماية أمن
الرئيس واعتقال كل اللي يعارضه! مش عايزة تكميم
أفواه وكبت حريات تاني! مش عايزة تكسير أقلام وقفل
قنوات! مش عايزة محاكم عسكرية! مش عايزة شُرطة
مُكبرة متجبرة! باحلم بشُرطة قوية تحمينا وتقف جنبنا
بس من غير ما تستعبدنا! باحلم بإعلام شريف يظهر الفساد
مش يحمي رجال الأعمال ومصالحهم! باحلم بقضاء نزيه
بعيد عن السياسة!!

باحلم زي أي مصري بسيط بدين وسطي من غير تطرُف
ولا تكفير ولا إقصاء ولا تمييز! باحلم بقيم وأخلاق بدون
إباحية وانحلال! باحلم ما حسَّش كمسيحية إني ضيفة
في البلد دي! باحلم نبقي إيد واحدة كلنا، بكل طوائفنا
وأحزابنا علشان ندفع مصر لأدَام؛ مصر اللي مُتنا علشانها
في التحرير! مش ده أبسط حقوقنا وحقوق الشهداء وأهليهم
يا أستاذ إيهاب!؟

- أيوه يا جانيت عندك حق، بس انا واثق إن شاء الله إن ربنا
مش هيضيعنا أبدًا، وواثق إنه هيعمي البلد دي علشان أهلها
الطيبين اللي انتي واحده منهم... بس أرجوكي تعالي معايا..
أكيد هتلاقي ليكي دور أعظم من الاعتصام هنا، صدقيني
الناس برّه محتاجينك ومصر ابتدت تقوم.
- أوعدك بس لَمَّا مبارك يتنحي ورامي يرجع!... مُشكّرة أوي
وتحياتي لكل اللي برّه!

* * *

طبعًا أنا سيببتها وانا جوايًا طاقة حماس غريبة، وكنت بافكر
أرجع المجلة وأطلب أشتغل في باب السياسة علشان أقول كل
كلام جانيت، بس للأسف افكرت إن المجلة بتاعة واحد من
رجال الأعمال الكبار وممكن يزعل جدًّا من الكلام ده، علشان
كده تراجع عن الفكرة وقلت أنا برضه باخدم الناس في الباب
بتاعي.. بس الأسوأ من كل ده إنني رجعت لقيت عربيتي اتردمت
تراب.. أوف.. يعني البدلة والعربية اتبهدلوا.. ده غير الصداق
اللي ماسك دماغني.. إيه اليوم الزفت ده!

عودة إلى بهلول

- عظيمة يا مصر.. يا أرض اللوا.. يا مهد الحضارة يا...
- الله الله.. مالك يا أستاذ مفرفش كده؟! أكيد جانيت
جاوبتلك على السؤال؟
- أبوس إيدك يا دكتور.. ما تجيليش سيرة البت دي تاني.. دي
واحده مفيش في دماغها غير السياسة.. جرعة مكثفة ودرس
خصوصي لمدة خمس ساعات متواصلة في الوطنية.. أنا
مش عارف بجد ازاي واحد زي رامي ده يحبها؟!
يعني بنت اتحدت أبوها واتمردت على الواقع وبتطالب
بحاجات مستحيلة... وبصراحة يعني مفياش أي رومانسية،
ده غير لبسها الرجالي والسيجارة اللي ما بتفارقش أيدها.
- هههه.. تسمخلي أثبتلك لتالت مرة إنك مش فاهم؟
- في دي بقه أتحداك، لأن جوليت الأصلية كانت رقيقة
ورومانسية، وروميو حبها علشان رومانسيتها الرهيبة..
يبقى دي بقه رامي حبها ليه؟

- علشان لقي عندها الحاجات اللي بيحلم بيها.. الاستقلالية
والرسالة والهدف.

- يا سلام! هي دي حاجات تغري أي راجل إنه يحب واحدة؟!
- طبعا.. إنت نسيت جملتها اللي انت لسه قايلها لي: «ما
اعرفش برضه ليه رامي حبني بالسرعة دي، بس يمكن
اشتراكنا في استقلالية الفكر وتوحيد الهدف والإيمان بقضية
عادلة هو اللي قربنا بأسرع مما نتخيل».

- أيوه صحيح هي قالتلي كده.. بس ما كنتش فاهم معنى
الجملة.. يعني حضرتك عايز تقول إن ممكن راجل يحب
واحدة علشان ليها شخصية مستقلة أو عايشة علشان هدف
ورسالة؟!

- أيوه طبعا.. الاجتياح ده منتشر جدا بين الشباب دلوقتي
والواحد منهم ساعات بينبهر بنت مفيهاش أي مميزات
أنثوية لمجرد إن عندها شخصية وليها هدف في الحياة زي
جانيت كده، ويمكن زي ما هي قالتك برضه إن الشعور ده
بيجي للبنات والولد لما بيحسوا بالغرابة سواء في بلادهم
أو خارجها.

- أفهم من كلامك ده إن «الاستقلالية والهدف» يعتبروا
الاجتياح الثالث للراجل بعد الغريزة والتقدير؟

- لا طبعا.. أنا ما قلتش إنهم بيترتبوا في أي مركز، لكن باقولك
إنهم بيكونوا أحيانا من ضمن مميزات المرأة اللي بتجذب

ليها الراجل وتمييزها عن غيرها، لكن خذ بالك إن فيه نوع
من الرجالة ممكن يكره الست لنفس الصفات دي، واللي
باعتبرها احنا مميزات، يشوفها هو عيوب.

- ياااه! ده يبقى راجل فاضي أوي.
- شفت آديك قلتها، وده معناه إن انت شخصيا بتعتبرها
مميزات.

- أيوه يا دكتور بس مش لدرجة جانيت.. يعني ممكن البنت
تكون مستقلة، لكن مش متمردة بالصورة دي.. ممكن
تكون ليها أهداف بس ما تدمر ش حياتي وحياتها علشان
الأهداف دي.

- دي وجهات نظر.. ومش هيفرق كثير رأيك
فيها.. لكن في النهاية لازم نعرف إن أي بنت بدون فكر
مستقل وهدف واضح لحياتها بتبقى مجرد جسم، والراجل
ما بيشفش فيها غير تفاصيلها بس.
- عندك حق.

زمن الأنوثة الجميل البريق والثقة بالنفس

يا سيدي سوف مين الشخصية التاريخية اللي بعدها.
طب باقولك إيه.. ما تسيبك من الشخصيات التاريخية
القديمة دي وتشوفلي حاجة تكون طرية شوية.. يعني مثلاً
واحدة من المُمثلات بتوع أيام الخمسينيات والستينيات،
زمن الأنوثة الجميل، السّات الحقيقية اللي ما كانتش بتركّب
شعر مستعار وشفاف سيلكون وعيون لينسز.. الحرير اللي
بجد مش الفوتوشوب بتوع اليومين دول.

- هههه.. تقصد يعني ليلي مراد وأسمهان والناس دول؟
- أيوا.. وسامية جمال وسعاد حسني.. يا خرابي على سعاد
حسني.. ولّا ناهد شريف.. ولّا ميرفت أمين... يا بوووي
ع النسوان يا جددع!

- عندك حق.. السّتات دي كانت غاية في الأنوثة والرّقة، ممكن فعلاً تلاقي واحدة منهم تجاوبك على السؤال، وتقولك الراجل كان بيلاقي عندهم إيه.

- بيلاقي عندهم إيه!! يا باشا كان بيلاقي عندهم كل حاجة، عود استايل أرستقراطي ابن ستين في سبعين زي كريمان وليلى مراد.. إثارة وإغراء يجنن زي هند رستم وناهد شريف.. خفة دم وشقاوة تفوق الوصف زي سعاد حسني وسامية جمال.. مياعة ودلع زي ماجدة.. رقة وهدوء زي فاتن حمامة.. طب فاكر وداد حمدي أجمل خدامة في تاريخ السينما؟ ولأ مديحة يسري وثقتها بنفسها واعتزازها بطولها، منتهى الثقة والكبرياء.. ستات يا أستاذ! ده احنا متجوزين صنادل على رأي محمد هندي.

- هههه.. وإيه بس لازمة الكلام في السياسة تاني؟!

- أيوه صحيح عندك حق هاشيل الجُملة دي من الكتاب.

- كتاب إيه؟

- لا ما تاخذش في بالك ده موضوع عائلي.. بس قولّي صحيح هيّ دي كانت طبيعة السّتات كلها في مصر في الوقت ده ولأ المُخرجين كانوا بيختاروا ستات معينين بالصفات اللي تهوس دي يعني؟

- لأ طبعاً.. السّتات كلها ما كانتش جميلة بالشكل ده، لكن في الحقيقة السّتات كلها كانت على طبيعتها.. يعني بدون

إضافات زي ما انت قلت من شوية.. ستات كانت كل حاجة فيها حقيقية، سواء في الشكل أو الطبع، والجميل فيهم إنهم ما كانوا بيلبسوا بناطيل جينز.

- هههه.. والله العظيم كنت لسه هاقولها.. فعلاً مقيش ولا واحدة منهم كانت بتلبس بناطيل جينز، كلهم إما فساتين وإما جيبات.. ياااه دا الواحد بقّه يحلم يلاقي واحدة ماشية في الشارع لابسة جيبة.. تخيل يا دكتور مقيش في مصر واحدة بتلبس جيبات غير المصيبة دي بتاعة برنامج بالألوان الطبيعية!

- أيوه تقصد نادبة حسني.. ما هو يقولوا تقريباً إنها أخت سعاد حسني.

الحاج حسني! راجل كان بيركز في شغله صحيح.

- بس برضه ما تقدرش تنكر إن عندنا فنانات جيلنا.. نبيلة

عبيد، وإلهام شاهين، ونادية الجندي، وتوابعهم من الجيل

ده زي غادة عبد الرزق، وسمية الخشاب.. ستات زي الـ...

- باقولك إيه يا دكتور خلّيني ساكت أحسن، إحنا قلنا

مش هنتكلم في السياسة.. ويلاً بقّه شوفلي أي مُرّة من

الخمسينيات.

- وليه أشوفلك؟ طب ما احنا عندنا واحدة منهم لسه موجودة

وعايشة لحد دلوقتي.

- أبوس إيدك إوعى تقولي على «اللي في بالي بالك».
- ههه.. لا واحدة غيرها.. استنى هافتح اللاب واعملك
سيرش على عنوانها...

أيوه لقيته.. الفنانة «راقية إبراهيم» من مواليد ٢٢ يونيو
١٩١٩، وتقيم حاليًا في حارة اليهود بالجمالية.. يلاً يا عم
أي خدمة وأدي عنوانها بالكامل.

- الله أكبر.. بتكلم جد، الفنانة راقية إبراهيم بتاعة فيلم
رصاصه في القلب؟ اللي قالت لعبد الوهاب: «أي ستي»..
ورد عليها: «أنا مش شايف أدامي غير صفين لولي»..
يا حظك يا ابو إيهاب هتقابل جميلة جميلات ودلوعة
دلوعات السينما المصرية.

- بس استنى ما تفرحش أوي دي أكيد دلوقتي عجّزت وداخلة
على قرن إلا شوية، يعني أكيد صفين اللولي بتوعها وقعوا.
- مش مشكلة.. كفاية أقعد أدامها واتخيلها وهي بتقول:
«أرجوك يا دكتور ستي».. يا مصيبة سودة يا ولاااا!

حارة اليهود بالجمالية

بيت رقم ١ في درب نصير حارة اليهود.. رقم البيت وشكله
الأثري كفيل يقنعك بأنه أول بيت اتبنى في التاريخ.. بلكونته
الحجرية الدايرة واللي بتطل على المعبد اليهودي (موسى بن
سيمون) بتودّيك لمكان في التاريخ ما تقدرش توصفه، لأنك
ما تعرفوش أصلاً، وده طبيعي لأن الحارة دي بالتحديد حارة
معضوب عليها بسبب اسمها ونوع الناس اللي كانوا عايشين
فيها قبل التهجير في ٤٨.

مجموعة من اليهود المصريين كانوا عايشين فيها بدون أي
اضطهاد؛ لأنهم كانوا مصريين بصرف النظر عن ديانتهم.
نجمة داود المحفورة على المعبد ومعظم البيوت اللي جنبه
هتستفزك جدًا لو كنت وطني أوي وكاره للكيان الصهيوني
(زي حالاتي).. أما بقّه لو كنت فنان وغاوي آثار (برضه زي
حالاتي) فهتعتبر إن الموضوع مش أكثر من جولة ترفيحية في
مكان سياحي، وهتحس إن وجودك هنا لحظة تاريخية مش
هتكرر في حياتك.

عيل صغير خدني من إيدي لحد البيت من غير حتى ما أسأله،
ولمجرد إني كنت باتلقت حوالي وكأن البيت ده بقى معلم
سياحي بسبب وجود الفنانة الجميلة دي جوّاه.. بس برضه
ما اعرفش ليه الولد توقع إني أنا بالذات بادور على بيت الفنانة
دي؟ يمكن علشان شعري المنكوش ولبسي الملون الغريب
اللي حسسه إني فنان؟! جايز.. لأ مش جايز ده أكيد لأنه طلب
يتصور معايا وقالني:

- هو مش حضرتك برضه الأستاذ زاهي حواس؟
أنا طبعاً ابتسمت وهزيت راسي فوق وتحت، وكلي ثقة إن
زاهي حواس ده أكيد حد جامد في البلد.

* * *

- السلام عليكم ورحمة الله وبركاته.. إزيك يا ست الكل عيش مع الكتب
والله العظيم أنا مش مصدق إني واقف أدام حضرتك.. أنا
أكيد باحلم.
- أنا ممنونالك جداً.. اتفضل يا سي محمد أفندي استريح..
الباشا على وصول.. أخذ الأوتومبيل وراح يقابل ناظر
العزبة وأكيد مش هيتأخر.
يا نهار أزرق!! محمد أفندي وأتومبيل وناظر عزبة وباشا؟!
هي الست دي لسه عايشة في الزمن بتاعهم ولا إيه؟!
- يا فندم أنا مش محمد أفندي!! وبعدين الباشوية اتلغت
من زمان!

- إنت أكيد مش موقدر حجم الكلام اللي انت بتقوله.. باشوية
إيه اللي اتلغت يا أفندي يا مجنون؟!
- طب والله العظيم اتلغت رسمي.. وما بقوش ينادوا بيها
غير اللوات بس!
- لوات؟! يعني إيه لوات؟!
- اللوات يا فندم حد كده زي «الأمير الاي» على أيامكم، ما هو
كل عصر وله بشواته يا هانم!
- يا أفندي إنت كلامك جارح وبيشير أعصابي.. بزيادة بقه
واتفضل من غير مطرود لا حسن أناديلك الخدم يرموك بره!
- يا نور النبي.. دا حضرتك في الضياع خالص.. خد إيه في
أوضة متر في متر.. يا هانم فوق!
- لاحظ إنك كده بتجرحني وأنا لا يمكن أسمحك بالإهانة
دي.. أرجوك اخرج.. إهه إهه إهه!
- هو حضرتك بتعيطي؟! طب انا متأسف! والله ما أقصد!
بس أنا فعلاً مش محمد أفندي.. أنا إيهاب أفندي.. وجاي
أعمل معاكي لقاء صحفي! صدقيني بقه أبوس إيدك!
- دلوقتي بس صدقتك.. وانا اللي كنت أعتقد إنك إنسان
نبيل وجاي علشان تصلح غلطتك وتعوضني عن الآلام
اللي سببتهالي طول الستين سنة اللي فاتوا! إذن فليكن..
بس لازم تفهم إني بقيت أمقتك.. إهه إهه!
يا ليلة مش فايتة! دي الولية شكلها مندمجة مع الآخر! وبعدين آلام

إيه اللي سببتهالها؟! دي أكيد فاكراي يوسف بك وهبي ولا حاجة..
طب وبعدين دي هاتفاهم معاها ازاي دلوقتي؟! واضح إن الحل
الوحيد إنني أوافق أبقى محمد أفندي طالما هي شايفاني كده!

- أيوه يا هاه أنا محمد أفندي. وأكيد هاطلع في الآخر ناظر
العزبة، مش مهم. بس خلاص ما ترعلش بقه وكفاية عياط.
- هاهها.. يخزي شيطانك يا أستاذ إيهاب.. على فكرة أنا
كنت باهزر معاك، ومفیش حد أصلاً اسمه محمد أفندي،
بس دي طريقتي في مقابلة أي ضيف، علشان أعيشه في
الجبر اللي متوقعه ويحلم بيه من أول لحظة، وخصوصاً
إنه جاي يقابل فنانة من الخمسينيات زي ما انت شايف.

- يا خبر ايض.. تصدّقي دخلت عدي.. وانا اللي كنت فاكرا
حضرتك ولا مؤاخذه يعني منفصلة عن الواقع وعايشة لسته
في الزمن بتاعك.. بس والله حضرتك لسه ممثلة قديرة ربنا
يديكي طولة العمر.

- ممنونة أوي يا سي إيهاب.. إنت قُلتلي بقه إنك جاي تعمل
معايا حوار!

- أيوه يا ست الكل.. عايز أتكلم مع حضرتك عن فنانات
جيلك وجمالهم وأنوثتهم وأسلوبهم الفصيح الرهيب..
هو صحيح ليه كنتوا بتكلموا فصحي؟

- مش عارفة.. بس يمكن لأننا كنا متربيين على الروايات
الغريبة المترجمة.

- أيوه عندك حق، والدليل على كده إن الجيل بتاعنا عنده اللغة
منحدرة بسبب المسلسلات المدبلجة هههه... يا ريت بقه
حضرتك تكلميني شوية عن حياتك.

- حياتي؟! يا اه! لسه فيه ناس يهتمها حياتي.. دا الفنان مننا
مجرد ما يبعد عن الكاميرا محدش بيعبره ولا يبسال عنه!
- يا فندم دا إنتو جيل العمالقة وزمن الرواد، زمن الفن
الجميل الساحر، ويشرف أي حد إنه يسمع تاريخ كفاحك
العظيم.

- أشكرك.. طب شوف يا سيدي.. أنا من مواليد المنصورة،
اتولدت ٢٢ يونيو سنة ١٩١٩ مع ثورة سعد زغلول،
وكنيت صديقة شخصية لجلالة الملك، وكان جلالته
بيحضرنلي معظم مسرحياتي، اتخرجت في المدرسة
الفرنسية بكلية الآداب، ووالدي رحمة الله عليه كان
أميرالاي في سلاح الفرسان لمدرسة الحقوق، ده غير إنه
كان من أصحاب الأطيان، وأمي كانت فرنساوية، وبتشتغل
في وزارة الحقانية اللي هي العدل دلوقتي.. غنيت لأول
مرّة في حياتي في الإذاعة الأهلية على إيد الأستاذ فريد
الرفاعي رحمة الله عليه.. ووقفت على المسرح لأول
مرّة على إيد الست بهيجة حافظ رحمة الله عليها.. أول
جوازة ليّ كانت من مهندس الصوت المرحوم مصطفى
دالي، وقعدت معاه خمس سنين لحد ما قامت ثورة يوليو

- بالعكس.. أنا شايفة إن الجيل بتاعكو فيه فنانات أجمل بكثير، يعني عندك مثلاً حنان ترك، ومنى زكي، وغادة عادل، وبشرى، ومنة شلبي، كمان عندك المطربة «عبيطة» دي كلها أنوثة.

- عبيطة؟! مين المطربة «عبيطة» دي يا فندم؟

- مش فاكرة.. تقريباً اسمها «تافهة».

- تافهة؟!!

- أيوه.. تقصدي «هيفا»؟

- أيوااان الهيفا.

- لا يا فندم من غير الألف واللام ما توذيناش في داهية..

ده اسم مش صفة!

- أيا كان.. بس هي مُرّة جداً.

- هههه.. هو حضرتك وصلتك كلمه مُرّة؟! أهلاً بيكي في

القرن الواحد والعشرين! بس على فكرة ما تتخد عيش أوي

لأن الفنانات عندنا نُصّ تكوينهم سيلكون.

- إزاي سيلكون يعني؟

- يعني شوية بوتكس على فيلر على ميزوسيربي على كرياتين،

يعني كله هاند ميد، لكن حضرتك وجيلك كنتوا طبيعي

١٠٠٪.. يعني من المصنع للمستهلك علطول من غير أي

إضافات!

- هاهاها.. عندك حق.

- طب بالمناسبة بقّه طالما اتكلّمنا عن السّتات.. كنت عايز أسأل حضرتك سؤال محيرني شوية.

- اتفضّل.

- إيه الحاجات اللي كانت بتشدّ الراجل للست على أيامكم.

- مش فاهمة!

- هاوضححك.. أنا مثلاً عملت بحث عن احتياج الراجل للمرأة،

ووصلت لإن الغريزة والتقدير أكثر حاجتين بيحتاجهم منها،

وبعد كده بتيجي حاجات تانية زي الاستقلالية والهدف،

وفي طريقي إني أوصل لباقي احتياجاته منها.. يا ترى بقّه

الترتيب ده منطقي من وجهة نظرك؟ وهل ينفع تطبيقه على

العصر بتاعك؟

- أعتقد إن الغريزة بقت رقم واحد في عصركم إنتم، لكن

على أيامنا كان الحب والمشاعر همّ رقم واحد.

- حضرتك فعلاً عندك حق.. أكيد الأولويات والميول بتترتب

حسب طبيعة كل عصر، واحنا ما شاء الله عصر الفضائيات

والكليات والأفلام الإباحية.. يعني ضروري تكون الغريزة

رقم واحد.. بس خلينا نتفق إن الحب دلوقتي بقى رقم اتنين

أو ثلاثة لحد ما تكلميني عن مفهومه عند جيلكم.

- شوف يا سيدي.. إحنا فعلاً كنا جيل الحب والعواطف

والغرام، جيل رومانسي بطبيعته، لأن المجتمع نفسه

ما كانش مادي زي دلوقتي.. كان أهم حاجة في حياتنا

الحب، البنت كانت ممكن تتجوز أي واحد فقير أو فاشل لمجرد إنها بتحبه.. كمان الراجل.. ما كانش بيقول دي غنية أو فقيرة.. كان بيمشي ورا مشاعره ويسيبها تحركه، وأكبر دليل على كده مواضيع أفلامنا ورواياتنا وحتى أغانيها، كلها كانت بتتكلم عن الحب العذري البريء.. كمان احنا كنا جيل الاحترام، جيل الفستان السواريه والملاية اللف، جيل البدلة الكاملة والطربوش والكرافتة.. مش البادي والجينز اللي بتلبسوه كلكو دلوقتي رجالة وسينات!!

- هايل.. يبقى اتفقنا إنكم جيل الرومانسية وبالتالي حضرتك أكثر واحدة ممكن تكلمني عن مفهوم الرومانسية، وبالذات عند الراجل، وخلينا نعتبرها عندنا رقم ٣.

- لأ.. سامحني يا سيد إيهاب! أنا مش مُتخصصة علشان أقدر اكلمك عن المفاهيم دي بشكل عام، لكن أعتقد إنني أقدر اتكلم عن مفهوم الحب بالنسبة لي أنا بشكل شخصي لو هيفيدك.

- أكيد طبعًا هيفيدني.. رغم إنني كنت باحلم أوصل لمفهوم الراجل عن الحب ومدى احتياجه له.. بس ملحوقه، حضرتك اتكلمني وأنا هاقيس كلامك على نفسي.. اتفضلني.. شوف.. أنا الرومانسية بالنسبة لي تعني التفاصيل الصغيرة.. يعني مثلاً: مش مهم تجييلي هدية غالية لكن يهمني أوي تكون مفاجأة، ساعتها باحس إنك مشغول بي ونفسك

تسعدني مش بتأدي واجب وخلص.. كمان يهمني أوي شكل الهدية ولفتها وطريقة تقديمها.. هيبهه.. الله يرحمك يا أستاذ عبد الوهاب! كان دايمًا يفاجئني في عيد ميلادي كل سنة ويدخل عليّ في إيده هدية أجمل من اللي قبليها.. آخر هدية جابها لي كانت الجرامفون اللي أدامك ده.. شايف أد إيه جميل؟

- الله.. جميل أوي.. كنت جايب واحد زيه السنة اللي فاتت من سوق الجمعة بتاع البساتين.. بس مش شغال ما اعرفش ليه، بس والله فكرتيني بموقف لطيف أوي حصلني مع مراتي بخصوص موضوع الهدية.. تحبي أحكيهولك؟

- لقيتها مرة بتصحيني في نص الليل وتقوللي: «تعرف يا بيبي حلمت إنك جييتلي سولتيريجن، وأنا كنت باحضنك وهاموت من الفرحة.. ما تعرفش إيه تفسير الحلم الرائع ده؟».. غمزتلها بعيني وقلتلها هتعرفي بكرة يا شقية لِمَا أرجع من الشغل.. ثاني يوم دخلت عليها والمفاجأة ورا ضهري.. راحت شدّاها بمُتتهى اللهفة.. وفتحتها بابتسامة غريبة وقالتلي: «ممكن تطلّقني يا عمري!».

- ليه هو حضرتك جييتلها إيه؟

- هاجييلها إيه يعني.. كتاب «تفسير الأحلام» لابن سيرين.. أكيد هو بيّفهم أكثر مني في تفسير الأحلام.. ولّا إيه؟!

- ما شاء الله على المفاجأة.. حضرتك غاية في الرومانسية!
- ربنا يستر أصلك يا فندم.. بس قوليلي هو انتو كلكو كده زي
مراتي بتحبوا التكرار والرغي؟! أصلها ما بتبطلش كلام.
- أيوه طبعا.. أمال نبقى ستات ازاي! أي ست بتحب التكرار
والتأكيد، يعني قوللي باحبك كذا مرة.. كل يوم.. كل ساعة..
بأبقي محتاجة أتأكد من حُبك.. بأخاف تكون ملّيت مني أو
بتفكر في واحدة ثانية غيري.. هاتلي كل يوم وردة، لكن ما
تسأنيش طول السنة وفي الآخر تجيلي عربية مثلاً.. الوردة
أجمل طالما كل يوم.. وبعدين أنا شخصياً أموت في الراجل
اللي دايمًا مرگز معايا وواخد باله من كل حاجة في: هدمي،
مكي جي، برفاني، قصة شعري... كمان بيدي إعجابه بيهم،
يعني أي مجاملة وخلص حتى ولو بالكذب، بس انتو
بقه مُشكلكم كرجالة هي «التجاهل»، يعني غالبًا تلاقي
مراتك قاعدة جنبك وانت مشغول بالنّت أو التليفجن..
فتسألك مثلاً:

- حبيبي.. بأفكر أفض شعري؟

- قصّيه.

- بس حرام.. أنا ما صدقت إنه طول.

- خليه.

- بس تعرف.. صحباتي بيقولوا إن القصير هيليق عليّ أكثر.

- قصّيه.

- حبيبي.. واضح إنك مش مرگز معايا خالص!
- خليه.

- هههه.. تصدّقي حضرتك تحفة والله!! فعلاً أنا بأعمل
كده معاها.. بس أحيانًا بيكون غضب عن الواحد.. أصل
السّات بصراحة ساعات كلامها يضايق ويجرح، ودايمًا
تعمم، يعني أبقي مثلاً لسه جايلها هدايا وتقولي: «عمرك
ما دخلت عليّ بكيس يوستفندي!».

- يا أستاذ مفيش ست بتقصد اللي بتقولُه حرقياً.. إحنا دايمًا
بتتكلم بصيغة التعميم، بس صدّقي ما بنقاش قاصدين.

- تصدّقي عندك حق! أنا أول مرّة آخذ بالي من الموضوع ده،
وكنت باستغرب لَمَّا ألاقِي بنت بتقابل صحبتها بالحُضن:
«إنتي فين يا حمارة، واحشاني يا ندلة، يا جزمة».. وتاني
يوم لَمَّا تتخاتق معاها: «لا يا ماما، لا يا حبيبي.. مع ألف
سلامة يا روح قلبي».. يعني تقريبًا بتعكس الكلام.

- سُفت بقه.. بس الراجل الذكي هو اللي يفوت أحيانًا ويترجم
نص كلامها بس.

- طب، وبالنسبة للغيرة.. كنتي تحبي إن جُوزك الأستاذ
مصطفى يغير عليك؟

- طبعا.. ده أكيد دليل على حبه واهتمامه.. وبالعكس أنا
ساعات كنت بأعمل حاجات تخليه يغير عليّ.. يعني أهزر
مع أنور وجدي مثلاً، أو زكي رستم.. وكنت أزعل أوي لو

ما اهتمش أو ما غارش.. بس جوزي الثاني «ديفيد» اللي اتجوزته في أمريكا كان بيغير عليّ زيادة عن اللزوم، يعني كان ممكن يوصل لدرجة الشك.. ودي بقّه حاجة تزعل أي ست.. إنت بتغير عليّ يعني بتحنني.. لكن بتشك فيّ، يبقى خلاص عليه العوض في الثقة والحب.

- طب تعرفي حضرتك إن أكثر حاجة برضه تضايق الراجل هو موضوع الشك ده.. يعني أنا باتجنن لَمَّا مراتي تمسك موبايلي وتقعّد تدوّر وتفتش في الماسيدجات والإن بوكس.. ليه يعني تشك فيّ؟! وليه ما تحترم مش خصوصياتي.

- لأ بلاش تبالغ.. مفيش ست بتعمل كده غير لما يكون جوزها له تصرفات مريبة أو تاريخ ومغامرات.. وواضح إن حضرتك منهم.. مش كده؟

- أعوذ بالله من غضب الله! يا فندم دا انا صلّيت الجمعة وجيت على هنا بوضوئي.

- هههه.. ماشي هافوتها، مع إن النهارده الخميس.. لكن لازم الواحدة برضه تفوت.

- معقولة النهارده الخميس؟! يا ابن اللدينا يا شيخ رضا.. تصدّقي صلي بينا الضهر ركعتين.. يلاً بقّه الله يسامحه.. بس تعرفي لغت نظري أوي اسم جوزك بتاع أمريكا.. أنا عارف إنه كان يهودي زيّك.. بس مش غريبة يبقى اسمك راقية إبراهيم وهو ديفيد؟! هههه.. طب كنتوا بتنادوا بعض ازاي!؟

- لاااا.. أنا ما اسميش راقية.. دي الست بهيجة حافظ اللي سمّنتني كده.. أنا اسمي الحقيقي «راشيل».. «راشيل أبراهام ليفي».

- يا نهار اسود!! هو انتي راشيل أبراهام؟! الفنانة اللي هاجرت أمريكا وقعدت تشتم مصر.. واللي ساعدت الكيان الصهيوني في اغتيال عالمة الذرة المصرية «سميرة موسى» اللي كانت ناوية ترجع علشان تشارك في صناعة البرنامج النووي المصري؟

- أيوه أنا راشيل، بس كل الكلام ده كذب وافترأ.. زي الكلام اللي اتقال على ليلي مراد.. قالوا برضه إنها بتموّل الجيش الإسرائيلي ومنعوها من دخول مصر وسوريا وحرقوا كل أفلامها.. إنتو كده مفيش فائدة فيكم، هتفضلوا طول عمركم عنصريين وكارهين لينا!

- على فكرة إنتي بني آدمة كدّابة! ليلي مراد ربنا أظهر براءتها والناس كلها عرفت مين اللي كان ورا الإشاعة دي، لكن حضرتك كان معروف عنصريتك من يوم إعلان دولتكم الوهمية في ٤٨! جنابك كُنتي بترفضني تمثلي في أي فيلم بيعادي إسرائيل! جنابك لعنتي مصر بعد ثورة ٢٣ يوليو وهربتني بفلوسك على أمريكا! جنابك تعمدتني تتصاحبي على عالمة «سميرة موسى»، وتستدرجها للمكان اللي الموساد اغتالها فيه! والكلام ده أكدته حفيدتك المصونة «ريتا ديفيد توماس» في جريدة «النيويورك تايمز».. أنا مش فاهم إزاي ليكي عين ترجعي مصر تاني!؟

- خلاص طالما إنت مُصمم بيقى أيوه أنا ساهمت في قتلها،
بس علشان أحميكوا من برنامج نووي كان ممكن يثير
عليكم كل الدول العظمى.

- يا سلام على طيبة قلبك! كنتي خايفة أوي على مصر.. لكن
دولتكم المسالمة من حقها تمتلك سلاح نووي لأنها أكيد
مش هتتذي حد!!

- أيوه مش هتتذي حد، بس هتحمي نفسها.

- تحمي نفسها من مين؟ هو احنا من إمتى بنعاديكوا.. ما طول
عمركو بتبتدوا بالسلام وتنتهوا بالخيانة!! وطبعًا اختارتوا
فلسطين بالذات تعيشوا فيها علشان تنفذوا مشروعكم
الوهمي «أرض الميعاد من النيل للفرات».. بس ده بعينكو
يا راشيل هانم!!

- هاهاها.. لا وحياتك هتنفذه، وابتديناه في ٦٧، ولأنت نسيت؟
- لا! حضرتك اللي نسيتي إننا رددينا ليكم الألم اتنين في ٧٣،
واستردينا أرضنا كاملة.

- ٧٣ كانت صدفة ومش هتكرر!

- لا وحياتك ٦٧ اللي كانت غلطة ومش هتكرر! وربنا يدبكي
العمر وتشوفي إن شباب الجيل ده أعظم من أي جيل قبله.
- هاهاها.. أنهو جيل ده؟! جيل المُخدرات والأفلام
الجنسية؟! ولأ جيل السبكي و«أرب جوت تلت»؟!
ما تخافش يا صديقي إحنا مسيطرين أوي!

- عندك حق ما هو ده سلاحكم الجديد اللي بتغيبوا بيه
الشباب، سلاح أسزبل وأقوى من الأسلحة النووية.. شوية
مواطنين صهاينة شايلين الجنسيات العربية وبيتحكموا في
معظم مؤسسات الدول، وعلى رأسها الإعلام، علشان
يصنعوا جيل عربي تافه وسطحي ما يقدرش يواجهكم..
لكن سبحان الله! برغم كل ده لسه بيقوم ويتفض ويطالب
بحقوقه وإن شاء الله الدور الجاي عليكم!

- يا عزيزي أنت واهم!

- إنتي اللي حقيرة وخاينة.. خاينة.. خاينة.. خاينة!

...
- إيهاب.. إيهاب.. اصحى يا بني آدم.. إنت بتحلم ولا إيه؟!
هي مين دي اللي خاينة؟ اصحى يا ابني.
- يااه يا بهلول يا أخي.. كنت باحلم.

- يا عم انت جاي تحلم عندي.. وبعدين كنت بتحلم بيايه؟
- كنت باحلم براقية زفت إبراهيم، تقريبًا نمت وانا باقرأ المجلة
اللي انت اديتهاالي.

- فعلاً ده عدد خاص عن حياتها المأندلة.

- أيوه صحيح.. واضح إنني اندمجت مع قصتها.. بس قولني
يا بهلول هي الست دي صحيح لسه عايشة؟

- يا عم عايشة ازاي دي ميتة من سنة ١٩٧٧.

- يلاً في داهية.. بس تخيل إنها قالتلي معلومات جامدة جدًا

عن السّئات بس للأسف ما لحقتش أكتب ووصلنا أنا وهي
إن المشاعر رقم ٣ عند الراجل دلوقتي، إيه رأيك؟
- وازاي بقّه يا عبقرى وصلتوا إن المشاعر هي رقم ٣ عند
الراجل؟

- وانا مالي يا عم.. هي اللي قالتلي كده.. طب والمصحف دي
كانت عايزة تخليها رقم ١ وانا اللي رفضت وقلتلها ما ينفعش
نكسر كلام الدكتور بهلول.

- يا حبيبي رقم واحد إيه وتلاتة إيه؟! إنتو كتبتوا بتفاصيلوا في
قفص طماطم!

- إيه يا دكتور؟ هو انت علطول تكسفتني كده! أنا حاسس
بصراحة إنك ابتديت تغير مني وخصوصًا بعد ما ابتديت
أفكر وأشغل دماغي.

- أغير منك؟! ماشي يا عم.. طب ممكن سيادتك تقولي
ازاي اكتشفت انت والأخت اللي ماتت من أربعين سنة إن
المشاعر رقم واحد أو تلاتة؟

- أبدًا.. الموضوع بسيط جدًا.. أنا قلتلها إن الغريزة
والتقدير دلوقتي أهم حاجتين محتاجهم الراجل، لكن
هي اعترضت وقالت إن ده بالنسبة للعصر بتاعنا، لكن
في عصرها كان بيعتبر الحب رقم واحد لأنهم كانوا في
عصر الرومانسية.

- بس الكلام ده مش حقيقي.. فترة الخمسينيات والستينيات

ما كانتش بالرومانسية اللي بتصورها الأفلام بتاعتهم،
بالعكس دي كانت فترة مادية جدًا، وكانت أهم سمة
فيها هي الطبقيّة، لأن بطبيعة الحال الشعب كان مقسوم
٣ طبقات: بشوات، وبهوات، وعوام (أفندية)، وما كانش
ينفع راجل من طبقة بسيطة يتجوّز أو يحب واحدة من
الطبقة الأعلى أو العكس، كانت تعتبر فضيحة وممكن
أهله أو أهلها يتبروا منهم.

- إزاي يا باشا؟ وهو احنا اتعلمنا الرومانسية غير منهم؟!
طب بصر كده لشخصية أو ملامح ليلي مراد، ليلي فوزي،
مريم فخر الدين، أو أي ممثلة من الجيل ده، هتعرف
يعني إيه رومانسية.. مش همّ دول رموز العصر ده ولا انا
باتكلم غلط؟! وأكيد السّئات كلها في الفترة دي كانت
بنفس الرومانسية لأن الفن هو نبض الشعوب، وطالما
الفن والفنانين بالرومانسية دي يبقى أكيد كان الشعب
برضه كده.

- طيب.. معنى كلامك إننا هنكتشف إن كل واحدة من
الفنانات اللي اتكلمت عنهم كانت عايشة حياتها للحب
والمشاعر، وأكيد كل واحدة فيهم عاشت وماتت في حضن
حبيبها؟

- طبعًا.. ما عنديش أدنى شك في ده.
- طب اسمع يا سيدي.. الأولى وحسب الترتيب بتاعك،

ليلي مراد: اتجوزت واتطلقت ٣ مرّات (أنور وجدي، وجيه أباطة، فطين عبد الوهاب).. والثانية برّضه حسب ترتيبك، ليلي فوزي: برّضه ٣ مرّات (عزيز عثمان، أنور وجدي، جلال معوض).. والثالثة، مريم فخر الدين: ٤ مرّات (فهد بلان، محمود ذو الفقار، محمد الطويل، شريف الفضالي).. أكمل بقّه ولّا كفاية كده.

- يا نهار ازرق!! معقولة كل دي جوازات وطلاقات؟! يبقى على كده ما كانش عندهم أي مشاعر!
- آديك قُلتها بلسانك.. ولو قُلتلي اسم أي فنانة في الفترة دي هاقولك إنها اتجوزت واتطلقت أكثر من مرّة، وده دليل على إن الجواز وقتها ما كانش مبني على الحُب لكن كلاً مبني على «البريق».

- البريق؟!!

- أيوه البريق.. وده من أهم الحاجات اللي ممكن تشد الرجل للست وتخليه يحس إنه بيحبها.. يعني مثلاً ليه بعض الشباب بيحبوا نجومات السينما أو المطربات؟ أو حتى المذيقات والإعلاميات؟ لأنهم بيلمعوا. بس لأن النجمات دول ليهم قيمة اجتماعية عالية فبيتجوزوا من رجال أعمال أو فنانين زيّهم وتكون النتيجة إن الرجل اللي انبهر بالنجمة دي بيكتشف جوا البيت إنها مجرد ست عادية، ويمكن أقل من العادية، بسبب مُتطلباتها الكثيرة وقوة شخصيتها اللي

بتستمدّها من نجوميتها.. فيحصل الطلاق.. وتتكرر التجربة وتموت الفنانة من غير ما تدخل ولا قصة حب حقيقية.. يعني عكس تصوورك يا أستاذ إيهاب.

- يعني حضرتك عايز تقول إن «البريق» هو اللي كان يبشده أي راجل لأيّ ست في العصر ده؟

- لا طبعاً.. هو ليه حضرتك دائماً تعمم؟! أنا باديك أمثلة، وبقولك إن ليها قواعد وليها استثناءات.. يعني قاعدة «البريق» دي موجودة أكثر في الوسط الفني والإعلامي، ومعدومة تماماً في المجتمعات العادية أو البسيطة إلا برّضه في حالات نادرة، زي مثلاً: لَمّا راجل ينهر بالمديرة بتاعته اللي بتلمع وكل الموظفين هيموتوا عليها، أو لَمّا راجل يروح نايت كلوب ويلاقي فيه مطربة جذابة وكل الموجودين هيموتوا عليها.. ساعتها بيحصل البريق ويتشد لها.

- طب نقدر نعتبر إن «البريق» رقم ٣؟

- يا ابني يا حبيبي.. ما انا قُلتك بعد الغريزة مفيش ترتيب، لكن فيه نسبة من راجل للتاني أو من ست للتانية: راجل هيشده البريق أو الثقة بالنفس زي حالة راقية إبراهيم وغيرها، وراجل تاني هتشده الاستقلالية والهدف وقوة الشخصية زي جانيت وغيرها.. ولسه هتلاقي فيه حاجات كتير بتشد الرجل للست.. بس ربنا يصبرني عليك!

- معلىش يا دكتور استحملني أصل انا بجد مصدوم في

الرومانسية.. يعني احنا لغاية دلوقتي مش لاقين ولا قصة
حُب حقيقية، ولا حُب لمجرد الحُب!
- للأسف يا أستاذ إيهاب.. أنا شخصياً مع وجهة النظر اللي
بتقول مفيش حُب للحُب، لكن كل حُب ولهُ محرّكاته
ودوافعه.

- يا دكتور بس انت كده بتدمّر تاريخ البشرية كله ومستقبلها
كمان! مش معقولة تكون المشاعر محكومة بمنطق العقل
ونظرية الدوافع والمحرّكات! ده بيتنافى مع التاريخ
الإنساني! يعني تقدر تقولّي حضرتك مثلاً: إزاي قيس
حُب ليلي ومات علشانها؟ مش معقول البدو كمان بيحبوا
علشان الدوافع والمحرّكات!

- للأسف أيوه! وانا هاخليك تسمع الحقيقة دي بودانك،
وكويس إنك اخترت قيس بالذات لأنّي أقدر أوصلك بيه.
- إزاي؟! هو لسه عايش؟!

- يا حبيبي هتجيبلي شلل!! عايش ازاي بس؟! ده ميت من
٩٠٠ سنة، أنا هاعرفك على واحد من أحفاد أحفاده: الشيخ
سُهيل العامري.

- طب وده تعرفه متين؟

- أنا ما اعرفوش شخصياً، لكن كنت قرّيت مقالة عن دوره في
سرد وكتابة تاريخ قيس وليلي، وقرّيت كمان إنه ساكن في نفس
المكان اللي عاش ومات فيه قيس: مدينة الأفلاج في الرياض.

- يا نهار... في الرياض؟! يعني عايزني أدب مشوار للسعودية
علشان أقابل حفيد قيس؟! طب والمصحف لوهاقابل قيس
نفسه ماهاسافر!

- هتسافر يا أستاذ إيهاب؛ لأنّي عارفك عنيد والفضول أجمل
حاجة في تركيبتك. بس عايزك قبل ما تتكلّم مع الشيخ سُهيل
تبقى تقرّ المقالة دي علشان ما تتأثرش بكلامه، وكمان تقدر
تجاربه في معلوماته وما تفضحناش.

- مقالة إيه دي؟

- مقالة عن قيس ومفهوم الحب في عصره، كنت كتبتها زمان
ورفضوا ينشروها لي في أي جرنال

بيع الكتب
book-spring.com
عش مع الكتب

مجنون ليلي التعوُّد والإخلاص

الحمد لله.. طرل عمري حاسن إني بني آدم محظوظ..
ودائمًا شايف إن أي حاجة حققتها في حياتي كانت مجرد توفيق
وصدفة مليش أي دخل فيها، بدليل إن تأشيرة العمرة جاتلي في
نفس الأسبوع اللي اتكلّمت فيه مع الشيخ بهلول عن مجنون
ليلي، وطبعًا كانت فرصة رائعة إني أرجع من مكة على الرياض
علشان أقابل الشيخ سهيل حفيد قيس.

ديار العامري

نعم أنا الآن في ديار ليلي.. صدّقوني إن شتّم، أو اتهموني
بالمجنون...
أجلس الآن على صخرة قيس، وعلى باب خيمته التي أصبحت
دارًا حجرية يسكنها الشيخ سهيل العامري وزوجته شهلا.

أكتب إليكم ما أرى وما أسمع منه.

حقاً أنا هنا في ديار العامري.. تتسارع أنفاسي ويخفق قلبي بشدة كلما تذكرت أن هذه الكلمات كتبت على هذه الصخرة:

أمرٌ على الديار ديار ليلي / أقبل ذا الجدار وذا الجدارا
وما حُبُّ الديار شغفن قلبي / ولكن حُبُّ من سكن الديارا
أنا هنا.. في مدينة الأفلاج.. مدينة الحُب.. تلك التي تحتضن
بلهفة قرية الخيل.. قرية العاشقين قيس وليلي.. مشهد حالم أبداً
لن أنساه.. وادٍ ساحر يلوّنه النخيل، ويحرسه جبل صخري شامخ
يُقال له جبل التوباد.

لم يكن من اليسير أن ترتقي سنع ذلك الجبل الهادي. ولكنها
تجربة تستحق المخاطرة، فعلى ارتفاع ثلاثمائة متر أو يزيد
يمكنك أن تتسلل إلى كهف ضيق يسمونه «غار المجنون» -
يقولون إنه المكان الذي كان يلتقي فيه العاشقان ليتبادلا الشعر
والهيام، وينسجا معاً خيوط الأسطورة الخالدة، بعيداً عن صخب
البادية وجمود أهلها.

من أعلى الجبل يمكنك أن ترى بوضوح البيوت الحجرية
المتراصة وكأنها حروف أشعار قيس.. كانت منذ ألف عام خياماً
تملأها القصائد والأخبار؛ أخبار العاشقين.. ساعتان أو أكثر..
صعدنا وهبطنا لنستريح في بيت الشيخ سهيل العامري؛ رجل
من أهل العشائر يزيد عمره على المائة عام، ويقال إن نسبه يعود
إلى بني عامر قبيلة قيس وليلي؛ رجل تقصده أفواج الشعراء

والزوّار من كل مكان ليسمعوا الشعر بلهجة قيس وعلى صخر
داره التي ورثها عنه.

فؤادي بين الأضلاع غريب / يُنادي من يُحب فلا يُجيبُ
أحاط به البلا فكلُّ يوم / تقارعه الصبابة والنَّحيبُ

لقد جذب البلا على قلبي / فقلبي مُذ علمتُ له جلوبُ
وإن تكن القلوبُ كمثلي قلبي / فلا كانت إذن تلك القلوبُ
بهذه الأبيات استقبلنا الشيخ الطيب الحالم.

- الله الله يا شيخ سهيل.. أحسنت والله.. روعة روعة!
- حياك الله يا خوي. جليل ما عاد يتذو ج شعر جدي قيس
هذي الأيام.

أنا طبعاً ما كنتش فاهم حاجة! بس فهمت بعد كده إن معظم
القاف عندهم بتتنطق جيم!

- بصراحة حضرتك عيشتني من أول لحظة في الجو بتاع
قيس.. يعني الغُترة اللي حضرتك لابسها مع العقال مع
الجلابية.. والله بجد حاسس إنني قاعد مع قيس نفسه،
كمان صوتك مع لحيتك.. مش ممكن... تحفة!

- هاهاها.. كلامكم زين يا مصريين، والتو تدخل علينا عمّتك
«شعلا» زوجتي المصون ومن نسب ليلي العامرية ذاتها
علشان تعيش الجو أكثر كيف ما بتجول.. هاهاها.
- الله أكبر! دي بينها هتحلو.. يلاً بقه يا شيخ سهيل اتحفني

بقصة قيس وليلى، أنا قاطع كذا ألف كيلو علشان أسمعها بصوتك.

- إيش بتجول؟! اتحفني!! والله ماني فاهمان حاجة!

- هههه.. يا عم اتحفني يعني احكي لي.

- طيب شوف.. أنا باحكيك بس ما تجاظعني.

- ماشي يا عم مش هاقاطعك.. اتفضل احكي.

- كان أبناء العمومة قيس وليلى طفلين يرعيان البهائم على سفوح الجبال.. هو قيس أجمل فتيان بني عامر وأبوه سليل الأشراف «الملوح بن مزاحم بن عدس بن ربيعة».. اتولد قيس سنة ٤٤٠ هـ / ١٦٤٥ م.. في خلافة عبد الملك بن مروان من خلفاء بني أمية.

قيس كان من صغره ذكي وفطن، اتربى على الأدب، ودرس الشعر وسير النجوم في القطيف - مهد العلم والعلماء - وكان وسيماً، أكحل العينين، طويلًا فارعًا، كثيف الرموش، تعشقه النساء، بعده بأربع سنوات فحط اتولدت ليلى ابنة عمه «المهدي بن سعد بن ربيعة بن عامر».. وكانت تسكن النجوع قرب ديار نجد.. صبية فاتنة، بيضاء اللون، ساحرة العينين، قال فيها قيس: «سحرتني ليلى بسواد عينيها وإنما السحر في سواد العيون».. قضى العاشقان صباهيهما معًا في البيد، حتى كبرت ليلى فمنعها أبوها عنه، وبقي قيس وحيدًا هائمًا في عشقه، ينشد فيها الشعر والغزل، حتى خرج على

جواده يومًا يجوب الصحراء، فإذا بليلى بين الرفاج ترعى ماشيتها، فنزل قيس وقضى معها بياض اليوم، حتى أقبل عليهم شاب يسوق غنمه يُقال له «منازل»، وكان الشاب وسيماً. فأقبلت عليه النساء حتى ليلى، فاغتاظ قيس وطلب منارته، فدبى الفتى وانصرف إلى القبيلة يروي عنهم. فذاع صيتهما، وبلغ الأمر والدها المهدي الذي طلب من قيس أن يتوقف عن مغازلة ليلى بشعره، ولكنه لم يتوقف فشكاه إلى عبد الملك بن مروان الذي أهدر دمه، ولكن ذلك لم يُثنِ قيس عن غزله وشعره. حتى صارت ليلى حديث الناس. فلم يجد أبوها إلا الهجرة، فأخذها وارتحل عن الديار قاصدًا ديارًا بعيدة... وهناك زوجها رغماً عنها إلى الأمير «ورد» من طائف بني ثقيف... وكان قيس قد خطبها من قبله فرفضه عمه - كعادة العرب لا يزوجون بناتهم لمن جهر بحبه وفضح من يُحب...

كان خبر زواج ليلى صاعقة أصابت قيس بالجنون، فكان يُغشى عليه ولا يفيق إلا بذكر ليلى، فيهرع إلى الصحراء يُطلق أشعاره الحزينة بين الجبال والوحوش... علمت ليلى بأمره، وحزنت لحاله، فمرضت مرضًا شديدًا، حتى إن زوجها «ورد» رأى أن يُطلقها ويرسلها إلى أبيها، فاشتد بها الحزن حتى ماتت في ديارها، وعلم قيس بموتها ففقد ما تبقى من عقله، وأخذ يبيت الليل على قبرها، يجثو

أمامه ويحتضنه قائلاً: «أيها القبر لقد ضمنت رفات من أحبها، وفيك دفنوا كل أمل لي في الحياة!». ثم يرحل من عند قبرها مُناجياً الأطباء والطيور، وكان وقتها يرافقه زياد ابن عمه ليهوّن عليه ويحاول أن يُعيدَه إلى دياره فما استطاع، حتى نحل جسده، ووهن عظمه، وظن من رآه أنه شبح، فكان كما قال عنه أمير الشعراء أحمد شوقي:

أرى شبحاً في الظلام / أسمع همهمة في الدجى
هو ابن الملوحة قد ذلّ الهزل / عليه ونم اضطراب الخطى
وظل على هذا الحال هائماً في الصحراء حتى وجدوه
ميتاً في وادٍ كثير الحجارة، وكان ذلك بعد موت ليلي بأقل من شهر واحد، فعادوا به وكفّنوه ودفنوه بجانب قبر ليلي... وبكت عليه نجد بأسرها، وما بقيت فتاة في الجيل إلا وخرجت عليه بالنحيب صارخة بالنذب.

هكذا مات العاشق الرقيق ذو القلب الهائم والضلوع الخفاقة!
مات العاشق الولهان صاحب المشاعر الفيّاضة والعين الذاهلة!
مات حزناً على حبيبته التي سبقته إلى القبر حسرةً عليه!
هذه يا أخي جصة المجنون.. ترى من بعده يحمل لواء الحب؟!!

- بصراحة يا شيخ سهيل مفيش!! هو فيه بني آدم يقدر يحمل لواء الحب بعد قيس؟! مستحيل! قيس ده كان راجل فاضي، لا وراه سُغلة ولا مَشغلة.

- إيش بتجول؟!!

- باقول يعني إن الشباب كلهم دلوقتي مشغولين بلقمة العيش، والواحد مننا يا دوب بيعرف يكون نفسه ويأجر شقة بالعافية علشان يتجوّز فيها! يبقى ازاي هنلاقي دلوقتي حد يحمل اللبّاء اللي حضرتك بتقول عليه ده؟!!

- يا أستاذ إيهاب أنا حاسس إنك بتسخر من جدي قيس!
- يا عم ولا باسخر ولا حاجة، بس باقول يعني إننا بنبالغ شوية في تعظيم الناس دي.. يعني بالله عليك قول لي إيه هي مقومات قيس اللي تخلينا نُحطه في مكانة الأنبياء، ونزور كهف، ونروي عنه الشعر من جيل لجيل؟

- نبالغ كيف يا أستاذ؟! والله قيس أعظم شاعر أنجبته البرية!
يا عم بالرّاحة شوية! هو مين دا اللي أعظم شاعر أنجبته البرية؟! هو يبجي إيه جنب شعراء الجاهلية «امرؤ القيس، أمية بن أبي الصلت، لبّيد بن ربيعة»، الشعراء اللي النبي (صلى الله عليه وسلم) شهد ليهم بالعبقريّة؟ ولّا يبجي إيه جنب «عمر بن أبي ربيعة، جرير، الفرزدق، الأخطل» شعراء العصر الأموي؟ يبجي إيه حضرته جنب «أبو الطيب المتنبي، أبو العلاء المعري» شعراء العصر العباسي؟ وهو فين أصلاً من «حافظ إبراهيم، الرافعي، محمود سامي البارودي، المازني، محمود شاكر، نزار، دنقل، درويش»؟ يا عم دا «هشام الجعج، ومصطفى إبراهيم» شعرهم له طعم عنه! يبقى

أعظم شاعر ليه؟! وبعدين بصراحة أشعاره ثقيلة ورخمة،
يعني انت بدمتك تفهم إيه من البيتين دول:
ويوم كظِلُّ الرَّمحِ قصرت ظلّه / بليلى فلها ني وما كُنْتُ لاهيا
بِثَمَائِنِ لاحت نازُّ ليلي وصُحبتني /

بذات الغضى تزجي المطي النواجيا

وأفهم إيه أنا بقّه من «ثمدين والغضى والمطي والنواجي»؟!
إنجليزي ده يا مُرسي؟! وبعدين جدك دا تراثه الشعري ١٢١
قصيدة كلهم عن ليلي، ولا سِمعناله قصيدة عن الوطن!
ولا حتى قصيدة عن الناس! يعني نفسي أفهم أضاف إيه
سيادته للبشرية؟! يا راجل وحّد الله!

- لا إله إلا الله محمد رسول الله.. أنا ما فيني أشرحلك، لكن
كفى بقيس إخلاصه لحبيته وموته حسرة عليها!

- حتى في دي برضه أنا مش معاك، وما اقدرش أعتبر إن قيس
عاشق مُخلص، لأنه لو كان مُخلص ليلي ما كانش فُضحها
بأشعاره، وخلا اللي ما يشتري يتفرّج عليها، لدرجة إنه
يتكلّم عليها، ويخلّي أبوها يهاجر من البلد كلها! وبعدين
يا شيخ سهيل دا كان بيوصف جسمها حته حته، والمقابلات
السرية اللي كانت بينهم، طب اسمع دي:

تعلّقتُ ليلي وهي ذاتُ ذؤابيةٍ / ولم يَبْدُ للأترابِ من نُدْيِها حَجْمُ
ده كلام؟! إنت ترضى حد يوصف جسم بتك كده؟!
وحتى بعد ما اتجوّزت بقي يطاردها بشعره ويفضحها

ويفضح جوزها! طب بدمتك فيه واحد يروح لجوز
حبيته ويقولُه:

بربِّك هل ضَمَمْتَ إِلَيْكَ لَيْلَى / قُبَيْلَ الصُّبْحِ أو قَبَّلْتَ فاها
وهل رَفَّتْ عَلَيْكَ قُرُونُ لَيْلَى / رَفِيفَ الأَقْحَوَانَةِ فِي نَدَاها
يا راجل! دا كلام يتقال لراجل محترم في وسط أهله
وعشيرته؟! وبعدين قرون إيه؟ هي ليلي كان ليها قرون؟!
- يا أخي يجصد جدايلها.

- وكمان كان ليها جدايل! يا دي المصيبة!! طب والمصحف
دي قلة أدب.. بقّه هوّ ده الحب والإخلاص؟! يقعد يطاردها
لحد ما تطلّق من جوزها وتموت من الحسرة، وبعد كده
يمشي زي المعجنون بين القبائل لحد ما أبوه كمان يموت
بحسرة، وفي الآخر يعمل إضراب عن الأكل لحد ما يموت
بين الحجارة؟! مش يبقى كده مات متحرر ولا إيه؟! يعني
مات كافر! ولا انت مش معايا حضرتك؟!
- دا إيش هذا اللي بتجوله؟! قيس مات كافر!! والله إنت
بتخربط.

- شوف يا مولانا.. أنا عارف إن مش من حقي أكفر الناس،
لكنه مات متحرر، ده غير إنني قرّيت إن أبوه أخده معاه لمكة
علشان يحج ويدعي ربنا ينسيه ليلي، لكن لما لقي الحُجاج
بيدعو له علشان ينسى ليلي رد عليهم في قصيدة طويلة آخرها
بيت مأندل يقول:

ذكرتكَ والحَجِيجُ لهم ضَجِيجُ / بِمَكَّةَ وَالْقُلُوبُ لها وَجِيبُ
يقصد عاملين دوشة وهُمَّ بيدعوهُ.. هُوَ الدعاءُ في مكة
اسمه ضجيج يا مولانا؟! وبعدين أبوه يقولهُ يا بني اتعلّق
بأستار الكعبة وادعي ربنا ينسيها لك، يقوم يتعلّق ويدعي:
«اللهم زدني لليلي حُبًّا، وبها شغفًا. ولا تُنسيني ذكرها
أبدًا».. يعني دا راجل أصلًا مستمتع بالألم، ومش عايز
ينساها حتى بعد ما اتجوزت، لأ والمصيبة الكبيرة لما يقول
في وسط الحرم:

أراني إذا صَلَّيْتُ يَمَّمْتُ نَحْوَهَا / بِوَجْهِي وَإِنْ كَانَ الْمُصَلِّي وَرَائِيَا
طب ده مش شرك كمان؟!

- لا والله يا شيخ مو شرك! هذا عشج! وبعدين هذي كناية
وما كان يجصد معناها الحرفي!

- وحتى لو ما يقصدش معناها، كفاية أوي بشاعة اللفظ!
وبعدين عشج إيه بس؟ دي هيافة وقصا! طب والله العظيم
قيس ده لو كان اتولد فقير، على أد حاله، وشقي في حياته
وحارب علشان لقمة العيش ما كانش ضيِّع عمره وعاش
الحياة التافهة دي! لكن للأسف اتولد لقي أب غني موفرهُ
كل حاجة.. يبقى ليه ما يتدلّعش ويعيش علشان يطارد واحدة
ست؟! وبعدين يا راجل افكر كلامك ليّ وانت بتوصفه:
«أكحل العينين، كثيف الرموش، هائم القلب، شارد العقل،
رقيق الروح، خفّاق الضلوع».. يا نهار ازرق يا جدعان!

بالذمة دي مواصفات راجل؟! الله يرحم القعقاع بن عمرو،
ومحمد بن مسلمة.. الله يرحم سيدنا عمر، وسيدنا خالد،
وسيدنا حمزة.. ما سمعناش في وصف واحد فيهم حرف
من وصفك لقيس بتاعك ده.. كنا بنسمع إنهم رجالة..
أسود.. وكانوا من نفس بلده وبينهم وبينه ٤٠٠ سنة بس،
طب تصدّق بالله؟

- لا إله إلا الله.

- أنا طول عمري من وانا طفل أسمع قصة مجنون ليلي وأتخيّل إنه
مات شاب، عمره بالكثير ٢٥ سنة، لكن لما عرفت إنه اتولد سنة
٤٤٠ هـ ومات ٤٩٠ هـ؛ يعني مات عنده ٥٠ سنة، ويلي ماتت
عندها ٤٦ سنة، أقول سبحان الله! القصة دي نصها متفبرك!
يعني لو مثلاً ليلي اتجوزت عندها ٢٠ سنة يبقى عاشت مع
جوزها أكثر من عشرين سنة، لأنها ماتت بعد ما اتطلّقت بسنة
واحدة، يعني الباشا قعد بيطاردها وهي متجوزة ٢٠ سنة، لحد
ما اتطلّقت وماتت! فيه أكثر من كده تخلف؟!

- أنت والله متحامل جدًّا على قيس!

- يا عم هوّ انا بيني وبينه محاكم أو عيال لا سمح الله؟!
أنا بس اللي مزعلني هو تقديسنا للناس الفاضية دي..
إحنا للأسف مش فاهمين إننا بنصنع نماذج مشوهة،
وبنورّثها لولادنا من جيل لجيل، وفي الآخر بتبقى مثل
أعلى ليهم! يا باشا اللي ضيِّع مستقبل أوطاننا نماذج

زي قيس ده: شباب عاشوا لقضية الحُب والوله ونسيوا كفاحهم وهدفهم من الحياة! شباب باعوا قضية الوطن وجريوا وراقضية الهوى! مستني إيه من شاب طول الليل بيسمع أم كلثوم أو جنات ويتقطع علشان حبيته اللي فلسعته؟ مستني إيه من شاب أقصى أحلامه يطلع في برنامج «ذا فويس» أو «ستار أكاديمي» أو «أرب جوت تلنت»، علشان لَمَّا يفوز يبقى أعظم من زويل ومجدي يعقوب ويستقبلوه في المطار استقبال الفاتحين؟

- والله ماني فهمان! بس انت اللي لازم تفهم إن الحُب له سلطان، وإنه يعلو ولا يعلو عليه. بس انت واضح إنك ما تؤمن بالحُب.

- حضرتك قوللي الأول تقصد أنهو حب؟ حُب عبد الحليم لشادية؟ ولَا حُب أحمد لمُنَى؟ حب أفلام السنينيات والسبعينيات اللي عمره ما دخل البيت؟

- كيف ما دخل البيت؟

- يعني البطل يحب البطلة ويحارب علشانها طول الفيلم وفي الآخر تنزل الستارة وكلمة «النهاية» قبل ما يتجوزوا.. يعني حُب في الشارع.. مجرد حب واحد لواحدة.. نموذج الشاب الرُّوش والبنت اللذيذة اللي مقضيتها، لكن عمرنا سُفناهم لَمَّا اتجوزوا بقى شكلهم عامل ازاي؟ وحُبهم بقى شكله إيه؟ أبدًا.. يعني يا ترى فضل حُبهم متوهج كده،

ولَا بقوا يتخانقوا على مصروف البيت زي أي زوجين؟ يا صديقي.. القصص والحكاوي والأساطير والأفلام كلها كانت وما زالت بتسوّق لأدنى وأرخص أنواع الحب! يعني خد عندك مثلاً: حُب عمر الشريف لفاتن حمامة في فيلم «نهر الحب»؛ شاب مُنحرف بتاع بنات، بيطارد واحدة ست متجوزة وعندها طفل جميل، ومتجوزة من راجل محترم وله وضعه في المجتمع.. لكن الأم الفاضلة بتسيب ابنها وجوزها وتساfer مع عشيقها بيروت تصيع هناك، وفي الآخر تطلب من جوزها الطلاق، ولَمَّا يموت عشيقها ترجع تقولُه: «رَجَّعني أعيش خدّامة تحت رجل ابني!» يعني افكرت دلوقتي إن ليها ابن، ولَمَّا جوزها يرفض نقعد كلنا كجمهور عاطفي شتم فيه على أساس إنه زوج قاسي.. مش حضرتك تقصد الحب ده؟ ولَا تقصد حب أميرة القلوب «ديانا» اللي بقت رمز للحب والعشق في العالم كله علشان خانت جوزها وسابت ولادها واترمت في حُضن «دودي»؟ طب بالذمة فيه راجل اسمه «دودي»؟! يعني تسيب الأمير «تشارلز» وتحب «دودي»؟! ولَا علشان مصري نتحيزلُه! بلا نيلة.. دا احنا المفروض نتبرّا منه.. ولَا يمكن حضرتك بقّه تقصد الحب بتاع «العشق الممنوع»؛ مهند الولد الواطي اللي خان عمه اللي ربّاه وصرف عليه مع سمر الزوجة المنحرفة.. هي بصراحة كانت مُرّة.. بس

برضه واطية! يا شيخنا.. لو ده الحب اللي بتكلم عنه واللي
 ما عرفناش غيره على مدار الـ ١٠٠ سنة اللي فاتت، واللي
 علمهولنا إعلامنا الهادف.. يبقى أرجوك اعتبرني كافر بيه!
 لكن حاول تفهم وتصدق إني مؤمن بحب تاني خالص..
 حُب الصفات.. الحب اللي بيتولد في القلب ويحكمه
 العقل.. ما عنديش مانع أحب بنت علشان جميلة، بس
 محترمة ومتربية تعرف تصون بيتي وتخلّلي عيال يشيلوا
 اسمي.. مش أحب بنت علشان روضة ومايصة وفي الآخر
 تخوني مع صاحبي اللي موديل عربيته أحدث من موديل
 عربيتي السيات (أو الـ ٢٨ أصل أنا عندي اتنين)! الحب
 يا مولانا إن البنت تحب الولد علشان وسيم ماشي، لكن
 في الأول يكون راجل بيحترمها ويحافظ عليها ويتبنّاها
 زوجة، راجل يكافح علشان يفوز بيها، راجل يدخل البيت
 من باب مش من الفيس بوك والواتس أب والفايبر!! بلا قلة
 أدب.. (على فكرة بالنسبة للبنات إيميلي في آخر الكتاب)..
 الحب يا مولانا مهوش حب الأفلام ولا الروايات ولا حتى
 الكافيهات.. الحب حب الصفات اللي بتبني البيوت اللي
 بتصنع الأوطان.. هو ده الحب اللي لازم نورثه ونعلّمه
 لولادنا.. طب اقولك حاجة: حضرتك سمعت عن قصة
 حب طارق وبسمة؟!
 - لا والله.. مين طارق وبسمة؟

- طارق وبسمة قصة حب أعظم من «روميو وجولييت»
 و«كليوباترا وأنطونيو» و«قيس وليلى».. قصة حب حقيقية
 حصلت فعلاً.. بس محدش كتب عنها.. تعرف ليه؟
 - ليش؟
 - لأنها قصة حب زوج لزوجته.. مش عشيق لعشيقتة.
 - طب بالله جصها عليّ.. باريد أسمعها.
 - أنا هاحكيتها لك بس علشان انت عملت معايا واجب
 وحكيتلي قصة قيس وليلى.
 - أي نعم.. واحدة بواحدة والبادي أظلم.. هاهاها.
 - يااه.. دمك خفيف موت.. اسمع يا سيدي:
 بسمة الجميلة أوي كانت متخيلة إن طارق اتجوزها علشان
 جمالها، وهو كمان كان فاكر إنها اتجوزته علشان وسامته،
 بس الحياة أثبتت إن كل واحد فيهم اتجوز الثاني علشان
 حاجات تانية ما ظهرتش غير مع العشرة.
 بعد خمس سنين من جوازهم بدون أطفال رفضت بسمة إنهم
 يروحوا يكشفوا عند أي دكتور علشان يعرفوا العيب من مين،
 رفضت لأنها راحت للدكتور لوحدها ومن غير ما طارق يعرف،
 واثأكدت إنها سليمة وطبيعية، وإن العيب منه.. خافت عليه من
 الصدمة، وقالته بلاش نروح للدكتور لأن واحد فينا هينكسر
 لو عرف إنه السبب، ووافقها طارق لنفس السبب وأقسم لنفسه
 إنه مش هيروح لأنه خايف يطلع العيب منها وهي اللي تنكسر.

في السنة السادسة سافر طارق لرحلة عمل في دولة عربية، وفي نفس التوقيت اتصابت بسمة بمرض جلدي خطير دمّر بشرتها وشوّه ملامحها وجمال عينيها، وقعدت تتعالج على أمل إنها تشفى قبل رجوع طارق اللي ما يعرفش أي حاجة، لكن للأسف مفيش فايده.. هتعيش مشوّهة بقية عمرها (الدكتور اللي قال كده).. طيب هتعمل إيه في طارق اللي حبّها علشان جمالها؟! طيب هتكمل حياتها معاه ازاي؟! بس هوّ مُخلص وأكيد هيضطر يكمل حياته معاهها غصب عنه، أو من باب الشفقة على الأقل.. شعور رهيب ما كانش له أي حل غير إنها تتصل بيه وتطلب الطلاق.. من غير ما تقوله السبب، لكن سبحان الله! قبل ما تكلمه بعمل حادثة في البلد اللي بيشتغل فيها ويفقد بصره، ويرجع يعيش معاهها من غير ما يعرف أي حاجة عن مرضها اللي شوّهها، وهي كمان ترفض تقوله علشان يفضل مستمتع بجمالها اللي في خياله، ويعيشوا مع بعض أجمل سنين عمرهم، لحد ما المرض اتسلل لباقي جسم بسمة وخطف روحها، وماتت في حضن طارق... ويرجع طارق بعد ما يدفنها في وسط أهله اللي مسندينه بعكاز، لكن فجأة يطلب منهم يسوق عربيته بنفسه، فيتخضوا ويسألوه: «هيّ عينيك فتحت؟».. ويرد عليهم: أبداً أنا عمري ما كنت أعمى ولا عمري عملت حادثة! أنا رجعت أعيش جنب بسمة لما عرفت اللي صابها،

ووهمتها إني أعمى علشان ما تطلبش الطلاق أو تحس إني عايش معاه شفقة.

هي دي قصة بسمة وطارق يا شيخ سهيل، قصة حب حقيقية مش مغامرة تافهة ولا حب اتولد بسبب المستحيل.. هوّ ده الحب اللي انا مؤمن بيه وما عنديش استعداد آمن غير بيه... يا أستاذ إيهاب والله جصة روعة!! لكن إيش الورجة اللي في إيدك وبتجرا منها ليك ساعة؟
- ورقة إيه؟ إنت سُفتها؟
- أيوه سُفتها.

- بصراحة يا شيخ سهيل دي مقالة كان كاتبها واحد صاحبي اسمه بهلول عن قيس ومفهوم الحب.
- يعني كل اللي جُلته مش كلامك.. كلام صاحبيك بهلول هذا؟!

- أيوه يا شيخ سهيل.. أصله بصراحة طلب مني أقرأها قبل ما اتكلّم معاك علشان أعرف أجاريك في الكلام.. بس انا قلت اتمنظر عليك وأقرأها لك.
- هاهاها.. والله انت مسخرة يا أستاذ إيهاب!
- مسخرة؟! تصدّق انك راجل سهيل بجد.

لكن ما اقدرش أنكر إنه كان بيحب ليلي بجد وبدون دوافع
ومحركات زي ما انت بتحاول تقنعني.
- إزاي من غير دوافع ومحركات؟ دا احنا عندنا في القصة
دي ثلاثة من أهم المحركات والدوافع.
- طب وإيه هُم إن شاء الله؟
- التعود والإخلاص والمستحيل.

- عروستي!
- هاقولك: التعود اللي حصل بحكم العشرة هو الحالة
اللي اتولد فيها حب قيس وليلي.. صلة القرابة بحكم إنها
بنت عمه، والتعود بحكم تواجدهم مع بعض باستمرار..
يعني العشرة أو التعود ممكن يربط اتنين ببعضهم غصب
عنهم وبدون ما يدروا.. وده بيحصل دايمًا مع الجيران، أو
القراب، أو اللي بيبقى وشهم في وش بعض طول النهار،
أو اللي اتربوا مع بعض زي قيس وليلي كده.. وممكن
كمان يحصل مع الطلبة في الجامعة بحكم التعود والمقابلة
اليومية، أو ممكن مع الموظفين والزملاء في أماكن شغلهم.
الإخلاص بقه هو اللي بيكلل الإحساس ده وبيضخمه
ويخلينا نحس إنه حُب حقيقي، وده اللي عملته ليلي
لما حاربت علشان تتجوز قيس، واتحدت كل أهلها حتى
جوزها الأمير «ورد» اللي استسلم لرفضها وإخلاصها لقيس
واضطر يطلّقها..

عودة الى بهلول

- حمد الله ع السلامة يا أستاذ وعمرة مقبولة، يا رب تكون
اتوفقت مع الشيخ سهيل.
- الله يسلمك يا صديقي بس شفت اللي عملهُ في الشيخ
بتاعك، تخيل يجري وراي بالعكاز!
- بصراحة به حق.. أنا لو منه كنت ضربتك.. حد يا بني آدم
يطلع ورقة من جيبه ويقعد يسمعها للراجل؟! عيش مع الكتب
- يا بهلول مش انت اللي قُلتلي!
- أنا قُلتك تقراها لوحدهك علشان ما تتأثرش بالمفهوم
الرومانسي السطحي بتاع الشيخ سهيل اللي وارثه عن
جده قيس.
- بس انت عرفت منين إني قرّيت من الورقة؟ يا لثيم! واضح
ان القرين بتاعي بيحكلك كل حاجة.. بس انا بصراحة مش
فاهم هو طالع فتان كده لمين؟!
- هههه.. أكيد طالع ليّ انا.. بس ما قُلتيش: يا ترى استفدت
حاجة من تجربة قيس وليلي؟
- بصراحة أنا شايف إن قيس كان متطرف شوية في مشاعره،

أما بقّه المستحيل فهوّ اللي صنع الأسطورة كالعادة، وزى
ما حصل في معظم القصص الأسطورية: الأهل بيرفضوا
العريس.. فيبتدي يتعلّق بالبنت أكثر، ولو اتجوّزت غيره
تبقى خلاص الأسطورة وصلت لقمتها، يبتدي البطل
أو العريس يدمّر حياته بإيده، وممكن ينتحر غلشانها زي
ما حصل في قيس وليلى وروميو وجوليت وغيرهم.
- هايل يا دكتور! كلام مُقنع جدًّا! يبقى كده عرفنا دوافع
جديدة لعشق الراجل للمرأة، وهيّ: العشرة أو التعود
والإخلاص والمستحيل، وكان عندنا قبل كده الغريزة
والتقدير والاستقلالية وقوة الشخصية والبريق والثقة
بالنفس.. ي ترى لسه عند حضرتك دوافع تانية ولا نقفل
على كده وبارك الله فيما رزق؟
- أستاذ إيهاب انت ليه دايماً محسني إنك جاي تشتري
طماطم؟!
- بصراحة حاسس إني تقلت عليك زيادة، وبعدين انا كل اللي
دفعتهم ستميت جنيه، وأخذت بيهم بيحي ١٠ دوافع...
يبقى كده رضا والطمع يقل ما جمع... ولّا إيه؟
- يا سلام على ضميرك الصاحي! بجد أثبتلي إن الدنيا لسه
بخير، وانا لاجل أمانتك دي هاعترفلك انك لسه ليك في
ذمتي ١٢ جنيه.. تحب تاخذهم ولّا تاخذ بيهم شوية دوافع؟
- ليه يا دكتور هوّ الدافع كده واقف بكام؟

- يا سيدي أبوس إيدك خلّصني، عايز تقابل حد تاني ولّا اشوف
شغلي بقّه؟
- مش انت يا دكتور اللي قلت لسه ليّ فلوس؟ خلاص خلّيني
أقابل بيهم سعاد حسني.
- نعم يا خويا؟!؟!
- أقصد يعني نعيمة.
- مين نعيمة دي؟
- يا أخي.. نعيمة بتاعة حسن، إنت ما شفتش الفيلم ولّا إيه؟
- هههه.. قصدك نعيمة اللي كانت مع محرم فؤاد في فيلم
«حسن ونعيمة»!!
- أيوه يا سيدي ما انت دودة أفلام زي أيوه.
- ماشي.. بس إيه علاقة سعاد حسني بنعيمة؟ دي مجرد فنانة
مثلت الدور والمفروض إنك تقابل نعيمة نفسها!
- مستحيل.. تفتكر يا دكتور نعيمة هتبقى أمورة كده زي سعاد
حسني؟ يا خرابي ع العسل! فاكر يا دكتور لمّا كانت بتقول
لمحرم فؤاد «أني نعيمة بنت الشيخ متولي - تسلم وتتهنى
يا سي حسن».. تحفة تحفة! منتهى الجاذبية والرقّة.
- عندك حق، هيّ فعلاً عملت الدور هايل، يمكن لأنها كانت
أول مرّة تمثل فعملته بتلقائية.. بس تعرف مين اللي كان
أقوى منها في الفيلم؟ محمد توفيق.
- أيوه.. العبقرى اللي كان عامل دور «ابن صبيحة».. دا كان فعلاً

يستحق جائزة «أوسكار» على الدور ده، يا سلام على جملة
الرهيبية: «باحب التفاحة يا ولا اد- أني غزال يا محاسن - كله
سلف ودين - مع السلامة يا غرام - ومقام سيدي أبو حلاوة».
- عندك حق.. بس برضه ما قلتيش ليه عايز تقابل نعيمة؟
- أصلي بصرحة مش حاسس إننا وصلنا لغاية دلوقت لمفهوه
الرومانسية عند الراجل.. فقلت يعني يمكن نعيمة توصلنا
للإجابة دي على اعتبار إنها كانت بنت رقيقة ورومانسية
هي وحسن زي ما شُفناهم في الفيلم.

- إنت لسه برضه مصمم توصل لمفهوم حب يرضيك! بس
للأسف يا أستاذ إيهاوب حكاية حسن ونعيمة ما تدقش
كثير عن قصة قيس وليلى.. الفرق بس ان الشاعر هناك
بقي مغنواتي هنا.

- لا يا دكتور.. تفرق كثير.. الشاعر هناك كان بيطارد بنت
متجوزة، لكن المغنواتي عندنا دخل البيت من باب،
ولمّا اترفض حاول تاني وتالت وفي الآخر اتجوزها برضا
أبوها وأهلها.

- إنت برضه لسه بتتكلم عن قصة الفيلم.. لكن لو عرفت
القصة الحقيقية هتغير رأيك.

- طب وحضرتك تعرفها؟

- طبعا.

- إيه يا دكتور إنت بتذاكر من ورايا ولا إيه؟!؟

- هههه.. لا أبدا.. دي جت صدفة.. لقيتها مرّة منشورة في مجلة.
- طب ما تخكيهالي يا باشا شوّقتني.

- على فكرة هي تشبه كثير قصة الفيلم مع شوية اختلافات..
يعني مثلاً حسن في الحقيقة ما كانش رومانسي للدرجة
دي.. كان مغنواتي اسمه «حسن النمس»، عايش في
قرية جنب قرية نعيمة وييلف في الموالد والأفراح يغني
ومعاه غزيرة بياكل من وراها عيش، وطبعاً نعيمة كانت بنت
جميلة وصغيرة ومن عيلة كبيرة، وعندها أطيان، علشان كده
حسن لعب عليها لحد ما حبته، ولمّا اتقدملها وأبوها رفضه
ابتدى يغويها تاني لحد ما هربت معاه وجابت لأهلها العار
والفضيحة، وفي النهاية ابن عمها قتله ورماه في التربة.

- بتتكلمم جد؟ دي القصة مختلفة تماماً عن الفيلم! بس ليه
غيروها كده؟

- علشان يعلموا البنت اللي في القرية تخرج عن طوع أبوها
وتطالب بحريتها وحقها في الحب حتى ولو كانت بتحب
صايع زي اللي حصل في الفيلم.. وفعلاً ابتدت كل بنت
تشوف واحد تصاحبه وتهرب معاه وتفضح أهلها، وفي
الآخر تقول أصلي باحبه وأكد أهلي هيضطروا يجوزوهلي
بعد الفضيحة.

- سبحان الله!! هو الإعلام بتاعنا ده ما وراهوش حاجة غير
خراب البيوت!!؟؟

- ده حقيقي.. أصل المشكلة عندنا في المُبدعين، سواء المؤلفين أو المخرجين أو حتى الممثلين، إنهم اتربوا على مفهوم «حرية الإبداع».. يعني إبداع بدون سقف: لا دين، ولا قيم، ولا أخلاق، ولا حتى عُرف.. كل الحاجات دي بيشفوها معوقات للإبداع بتاعهم، ولَمَّا تتكلم مع حد فيهم يقولك أصلنا بنحاكي الواقع.. يعني خلاص مش لاقين في الواقع غير أقدر ما فيه! طب ما الواقع مليون حاجات حلوة ونماذج محترمة.

- عندك حق، بس يلا بَقَّه عرفني على نعيمة.

- تاني!! مش باقولك قصة الفيلم متفبركة.

- أيوه بس انت قُلتلي بلسانك إن نعيمة كانت مظلومة، وانها بنت في الحقيقة برضه كانت رقيقة ورومانسية يبقى تخليك جدع وتشوفلي واحدة زيها.

- للأسف يا إيهاب ما عنديش أي نموذج يشبه نموذج نعيمة دي ولا قصتها.

- يا دكتور علشان خاطرني! طب نموذج سعاد حسني.

- يا سيدي والله ما عندي!

- طب باقولك إيه.. جاتلي فكرة.. ما تيجي نحضّر روح أي واحدة فيهم؟

- لا طبعا.. أنا مش مقتنع بموضوع تحضير الأرواح ده.. غير إن الدخول فيه أصلاً حرام.

- يا سلام.. بَقَّه حضرتك بتعمل كل المصايب دي وفي الآخر تقولني مش مقتنع بتحضير الأرواح وإنه كمان حرام! أمال إيه الناس اللي بنسمع عنهم كل يوم والتاني بيحضروا أرواح ويكلموهم كمان؟

- يا سيدي كل ده كذب وملوش أي أصل علمي.. وبعدين ربنا سبحانه وتعالى حسم الموضوع ده لما قال في كتابه العزيز: «وَيَسْأَلُونَكَ عَنِ الرُّوحِ قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا».. يعني مهما حاولنا مش هنوصل لأي معلومة عن الروح؛ لأن ربنا اختص نفسه بالعلم ده كتحدني لكل علماء الدنيا. وكمان بيقول برضه: «اللَّهُ يَتَوَفَّى الْأَنْفُسَ حِينَ مَوْتِهَا وَالَّتِي لَمْ تَمُتْ فِي مَنَامِهَا فَيُمْسِكُ الَّتِي قَضَىٰ عَلَيْهَا الْمَوْتَ وَيُرْسِلُ الْأُخْرَىٰ إِلَىٰ أَجَلٍ مُّسَمًّى».. والآية واضحة ومعناها إن ربنا ييمسك عنده روح الإنسان اللي مات يبقى ازاى هنقدر نحضرها؟

- ونعم بالله.. طبعا مفيش حد يقدر يكذب كلام ربنا.. بس تفسر بإيه جلسات تحضير الأرواح اللي بنسمع عنها؟ يعني انت أكيد سمعت عن مدام «رافائيل».. الست بتاعة المنصورة اللي حضّرت روح الشاعر أحمد شوقي وملاها قصيدة من ألف بيت؟

- أيوه أنا سمعت عنها وعن حالات كتير زيها، بس لو رجعت لأصل الموضوع هتعرف إنه ابتدا في أوروبا على أيدي

بعض السحرة اللي قرروا يغيروا مصطلح «سحر» ويسموه «تحضير أرواح» بعد ما صدرت القوانين اللي بتجرّم السحر، وفعلاً ادّعوا إنهم حضّروا روح «تشارلز ديكنز، ودانتي، وفيكتور هوجو، وبرنارد شو»... وكان المُحير في الموضوع إنهم قدروا يخلوا الناس تسمع صوتهم وتسجلهم كمان.

- طب يعني الموضوع طلع حقيقي أهوه!

- أيوه ما هو كل الناس كانت فاكرة كده لحد ما ظهر «أحمد عز الدين البيانوني»؛ واحد من علماء حلب، وأصدر كتابه «الإيمان بالملائكة»، وقال فيه إن الموضوع مجرد تحضير لقرين الإنسان اللي مات، وشفقة خبثة بين الوسيط الروحي اللي هو الدجال وبين القرين، وبيتفق معاه إنه يقلد صوت المتوفى ويقول المعلومات اللي يعرفها عنه، فالناس يتيالها إن هي دي الروح.. واللي أكد الكلام ده كمان العالم الجليل الشيخ «عبد الحلیم محمود».. ودا بقّه عمل حاجة حلوة قوي: طلب كل الناس اللي بتدعي إنها بتحضّر أرواح وحجز لهم غرف في مكة جنب الحرم علطول، وقالهم: «إذا كتتوا بتحضّروا أرواح يبقى هتقدروا تحضّروها هنا. أما لو كتتوا بتحضّروا قرين الإنسان اللي هو في الأصل شيطان يبقى أكيد هتفشلوا؛ لأن الشياطين ممنوعة من دخول الحرم». وفعلاً فشلوا.

- خلاص يا دكتور.. أنا كده اقتنعت ومش عايز أقابل حد ثاني.

- لا يا صديقي، فيه شخصية مهمة لازم تقابلها علشان توصل لأهم نتيجة.

- مين الشخصية دي؟ وإيه هي النتيجة اللي عايزني أوصلها؟

- الشخصية المرّة دي راجل، وهو شهريار، والنتيجة إن خيانة الراجل مش دائماً مرتبطة بصفات المرأة أو إمكانياتها، لكن ممكن أحياناً تكون مرتبطة بشخصية الراجل.

- مش فاهم!

- يعني مثلاً لو راجل قابل ست عندها كل المميزات اللي اتكلّمنا عليها، يا ترى عمره ما هيخونها؟

- طبعا عمره ما هيخونها.

- بس للأسف شهريار ما قدرش يحافظ على شهرزاد رغم إنه لقي فيها كل الصفات اللي كان بيحلم بيها.

- شهريار؟! هو شهريار ما قدرش يحافظ على شهرزاد؟!!

- أنا باتكلّم عن شهريار الحقيقي مش شهريار الأسطورة.

- طب وهو فيه شهريار حقيقي؟

- أيوه.. أنا وانت ومعظم الرجالة.. كلنا شهريار، وكلنا ما بنحافظش على النعمة، دا حتى «حمادة التّحش» شهريار روض الفرج.. صديقك.. إلهي كان معاك في ثانوي ما قدرش يحافظ على النعمة.

- يا نهارك ازرق يا دكتور!! إنت عرفت حمادة التّحش منين؟! دا حتى مراتي ما تعرفش حاجة عنه!

- عرفته من قرينك يا زواوي... هههه.
- يا ابن الإيه! برضه من قريني؟! دا انا هاوّلغ فيه النهارده
علشان يبطل يفتنلك على كل حاجة كده!
- هههه.. لا مفيش داعي.. خليه شوية هينفعنا أدام.. بس
احري دلوقتي على شبرا علشان تقابل حمادة، لأنه زي
ما انت عارف ما بيقدش كثير بره السجن، وضروري
تسأله حب إيه في شهرزاد؟ ويا ترى قدر يحافظ عليها
ولا لا؟ وياريت كمان تقرأ كويس قبل ما تقابله عن أضرار
الترامادول والفياجرا والأفلام الإباحية.

- إשמعني الحاجات دي؟

- هتعرف بعدين.

- حاضر يا دكتور.

شهر يار روض الفرج الأخلاق والحكمة

- باقولك إيه يا دكتور ما تخليني الأول أحكيك شوية عن
شبرا. أصلي باحب اتكلم عنها أوي.
- ماشي بس انجز ومن غير تحيز ومبالغة.. أصل انا عارفك.
- لاااا.. لازم نتفق من الأول إني راجل شبراوي أبّا عن
«جدا».. ومُتَحَيِّز لأهلها وبيوتها وشوارعها جدًا.. أصل
مليش ذكريات غير فيها.. وما عنديش أصحاب غير منها..
وبرغم إني حاليًا وزبي ما انت عارف من سكان التجمد
الخامس اللي هو التجمع الخامس، لكن باتباهي دايمًا أدام
أي حد إني ش ش ش.. يعني «شقاوة شباب شبرا»، يعني
عاصمة جهنم على رأي أحمد السقا.
- يااااه! للدرجة دي؟! بس على كده لسه بتروح هناك؟

- طبعاً دي قمة الرفاهية إني اتمشى مع واحد من أصحابي
القدام في خلوصي، نلف على رجلينا زي زمان من شارع
شوكلاني على طوسون على التربة، نضرب ٣٠ ساندويتش
كبدة من عند «مرسيدس»، وبعد كده ننزل على الدوران
نحس بأيس كريم من عند «مدبولي قاسم»، ونعاكس
البنات الصغيرة، ولما ناكل العلكة المتينة نرجع ميتين على
روحنا من الضحك واحنا بنحكي لبعض ازاى فرتكنا العيال
السييس إخوان البنات الأمورة.. والبنات الأمورة بقه ليها
حكايات كتير معايا في شبرا معظمها كان بيتدي لما الباب
يخبط واقول مين... فترد علي بصوتها المسترجل: «افتح
يا إيهاب.. أنا سوسو».. وافتح الباب ألقياها بتهرش في
شعرها العجري المنكوش وهي بتتاوب وتقولني: «قول
لخالتي أم إيهاب أمي بتصبح عليكى وبتقولك تلاقيش
عندك كوبايتين رز ومعلقة سمنة وشوية ملح وحلة كبيرة
علشان جايلنا ضيوف النهارده».. طبعاً أنا كان بيبقى نفسي
أسألها: «طب وليه ما تستلفيش الضيوف كمان بالمرّة؟»..
بس كنت بارجع اقول يا واد برضه الجيران لبعضيهم، وكفاية
إنها أخت «منى» وعلى فكرة منى كانت مسترجلة كده زي
سوسو وهي صغيرة، بس سبحان الله في سنة واحدة بقت
زي القمر وخطفتني بصوتها المسرع علشان تاخذ لقب
«أول حب في حياتي».. يااه! منى.. زمانها دلوقتي اتجوزت

وخلّفت عيلين على الأقل.. هيبه فين أيام زمااان.. أيام
الحب.. أيام الجيرة الحقيقية.. مش دلوقتي في التجمع!!
- إيه اللي بيحصل في التجمع؟
- الاتركوم يرن.. أقول: مين؟ تقولي: «أنا رانا اللي في
الدوبلكس اللي تحتكم، ممكن من فذلك الباسوررد
بتاع الواي فاي؟».. أجري بسرعة وبفطرتي السليمة على
المطبخ.. أدور في الرفوف والأدراج.. وارجعلها بمتهى
الخجل: «أنا متأسف يا آنسة واضح إن ريهام شايلاه في أي
حته».. وتضحك ضحكتها المايعة وتقفل وهي بتقولني:
«طب لما تعرف مكانه ابعتهولي في أي شتة».. قلة أدب
ومسخرة.. لاا.. بصراحة بنات عن بنات تفرق!
- عندك حق.. بنات شبرا ليهم طابع خاص.
- مش بس البنات.. كل حاجة عندنا في شبرا ليها طابع خاص،
وبتفرق عن أي مكان تاني.. كل حاجة ليها روح وطعم
ونكهة.. كل حاجة عندنا ليها تاريخ وأصل، ما عندناش
حاجة بتنتهي ولا بتموت.. بيوت كتير لسه مسنودة بعرق
خشب من عشرين سنة، ورافضة تقع احتراماً للعشرة..
لسه عندنا السمكري والعفشجي وبتاع الروبايكي.. لسه
عندنا محل الجزار القديم اللي نص مبيعاته عضم للشورية
وعالنوتة كمان.. لسه عندنا الفرارجي اللي عايش على بيع
رجول الفراخ، والرّفيجي اللي من غير هدم كتير تفضح

أصحابها.. لسه عندنا منجد المرببة القطن اللي صامد أدام
اليانسن والهائيات والفوربد.. لسه عندنا الصرماتي اللي
يعمأك نُص نعل لجزمتك في ثانية.. لسه عندنا السّتات
الطيبين اللي نُص مطبخهم برطمانات فاضية، السّتات اللي
مخبية في دولابها كام ملاية قديمة ما استعملتهاش يمكن
تنفع في جهاز البنت اللي مخطوبة من 5 سنين!
ياااه.. ده انت فعلاً مُتحيّز جداً لشبرا مع إنها على حد علمي

حتى بيته!

- بقّه شبرا بيته يا دكتور؟! طب تصدّق إن نُص فنانيين الجيل
اللي فاتوا والجيل ده من عندنا: ماري منيب، علي الكسار،
استفان روستي، داليدا، سعاد حسني، نجيب الريحاني،
سراج منير، بليغ حمدي، محمد فؤاد، سيمون، مدحت
صالح، العدل جروب.. حتى عظماء الكتابة زي صلاح
جاهين وجمال حمدان.. كل دول كانوا من عندنا.. طب
تصدّق كمان ان شبرا دي كانت أجمل جزيرة في مصر؟
آه والله.. كانت جزيرة في وسط النيل، بس الطمي غطّاها،
لدرجة إن «محمد علي باشا» بجلالة قدره كان واخذ فيها
قصر، ومن بعده زينب بنته، ومن بعدها الخديو إسماعيل،
وغيرهم وغيرهم من البشوات والبهوات زي عمر مكرم
واللورد كوتشيز اللي لسه لحد النهارده قصورهم بأساميهم..
منها اللي اتحوّل لمستشفى ومنها اللي اتحوّل لمدرسة ومنها

اللي اتهدم.. وبمناسبة المدارس، اسمحلي اقولك بمنتهى
الفخر إن شبرا كان وما زال فيها أرقى مدارس مصر: الليسيه
فرانسيه، الفرير، النوتردام، الدون بوسكو الإيطالي، راهبات
الكرملن، راهبات الراعي الصالح، رمسيس الخاصة...
وأهم من دول كلهم مدرسة التوفيقية الثانوية للمثريين
اللي محسوبك قضى فيها أجمل ٧ سنين في عمره (أولى
ثانوي مرتين، ثانية ثانوي مرتين، تالته ثانوي ثلاث مرات)
واللي قضى معاها فيها حمادة التّحش كل حياته.. أيوه كل
حياته.. ما أكيد عفارتك بلغوك إنه لسه ما اتخرّجش منها
لحد النهارده.

- أيوه أيوه عارف.. حمادة ده معجزة!

- بس والله يا دكتور حمادة بجد ومن غير مجاملة من الشباب
اللي أفنوا حياتهم في خدمة المدرسة، اسمه لحد النهارده
محفور على حيطانها وأسوارها.. وكفاية أوي تعرف إن
حمادة أقدم من أقدم ناظر اتعين فيها؛ حمادة بعون الله اتغيّر
عليه ١٣ ناظر و١٢٢ مُدرّس وأجيال من الطلبة وهو لسه
صامد، لدرجة إن فيه طلبة كانوا معاه في سنة أولى واتخرّجوا
ودخلوا الجامعة واتعينوا مُدرّسين عنده في المدرسة وهو
لسه طالب.. تخيّل؟! علشان كده له معاملة خاصة جداً،
وهو الوحيد اللي من حقه يعاقب أي مُدرّس لو اتأخر خمس
دقايق على الحصة، وممكن كمان يذنبه ويخليه يرفع إيده في

- الله يكرمك باقولك الكلام ده هينزل في كتاب!! صنف إيه بس وكلام فارغ! دا انا بقيت مؤلف أد الدنيا.

- هههه.. والله زمان يا ابو إيهاب.. والله ليك وحشة.. فإكر أيام الشقاوة والنظ من على السور.. سمعت من البراد «شعرة» إنك بتيجي كل شهر تاكل كبدة من عند «مرسيدس» مع الشلّة القديمة.. طول عمرك أصيل.. بس ما قلتيش إيه موضوع كاتب وكتاب والحوارات دي؟

- لا.. أبدا.. أنا اتخرّجت وما لقيتش شغل، قلت أألف كتب.. أهو أحسن من القاعدة أو الخدمة في البيوت.

- يعني بقيت كسّيب على كده؟ أنا اسمع ان الكُتّاب دول بيهبشوا!

- لا والله مش للدرجة دي.. بس مستورة.. أهو باعمل كتاب كل ستين، وأطبع منه ألف نسخة، أوزّع نصهم هدايا والباقي أبيعه بالكيلو.. وأهي ماشية.

- يا معلم طب ما تسيبك من العوآ ده وتيجي تشتغل معايا هنا في النقطة.

- ألف مبروك.. إنت بقيت أمين شرطة ولآ إيه؟

- يا عم أمين إيه!! هو انا لسه اتخرّجت من المحروقة المدرسة، أنا باشتغل بلطجي ميري، زي حمدان الصعيدي بتاع شبرا الخيمة، والحمبولي بتاع الصعيد، وخنوفة بتاع مصر القديمة.. يعني أخوك بقى نار على علم زيهم كده.

- بلطجي ميري؟! إزاي يعني؟ وبعدين مين الأسماء اللي قلتها دي؟

- هاقولك.. أنا كنت باشتغل قبل ثورة يناير بلطجي حر، وبعد الثورة عيوني هنا في النقطة بمرتب وتأمين وعلاوات وعلاج على نفقة الدولة.. يعني بقيت ولا سؤاخذة موظف ميري وخادم للوطن.

- طب وإيه بقه دورك في خدمة الوطن؟

- ما انا باقولك.. قبل الثورة كنت باشتغل في انتخابات المجلس مع الحاج «رضوان» مرشح الحزب الوطني.. أهو نحيب أصوات.. يضرب بطايق.. يضرب مرشحين.. نخطفهم.. نركب يفظ ونقطع يفظ.. نمنع ناس من دخول الدواير.. ندخل ناس... وكده يعني.

- ما شاء الله.. طب وده إيه علاقته بخدمة الوطن؟

- يا باشا مش الحزب الوطني هو الوطن ولآ انا باهيس؟ أصلي أنا لا مؤاخذه ضارب نص برشامة وممكن أكون مسافر مع نفسي.

- لا.. ولا بتهيس ولا حاجة.. طب وبعد الثورة اشتغلت إيه؟

- ربك والحق.. أنا عملت إرشين حلوين أيام الثورة، لمّا كنا بنتزل مع رجالة المعلم نخنوخ نضرب العيال بتوع التحرير، وبعد كده لمّا مشي مبارك بقينا بنتزل من وقت للتاني نفرّق المظاهرات بتاعة الشباب السيس.

- يعني على كده غيرت الجهة اللي كنت بتشتغل لحسابها؟
 - لا طبعا.. لسه باشتغل لحسابهم.
 - هم لسه موجودين؟!
 - طبعا يا باشا.. مش باقولك هم الوطن.
 - والله عندك حق.. طب قوللي يا حمادة: أنا أعرف ان اسمك حمادة التّحش من أيام المدرسة، بس الواد «شعرة» قاللي انك أخذت لقب شهريار روض الفرج.. ليه اللقب ده؟
 - فيك من يكتم السر؟
 - يا عم سر إيه دي شبرا كلها مسمياك شهريار! إنت البرشامة اشتغلت ولأ إيه؟
 - آه صحيح.. ما شبرا كلها عارفة إني اتجوزت ١٠٠ حورمة.
 - يا نهارك أزرق! ميت واحدة ست! اتجوزتهم ازاي؟!
 - والمصحف زمبؤلك كده، أصل البت سنبة اللي كنت مرافقها خانتني مع واد فرفور من بتوع الخلفاوي، قمت دابحها ودخلت فيها السجن سنتين، ولما خرجت وقفت في وسط الحتة وقلت: عليّ الطلاق يا منطقة زباله لأتجوز كل يوم حورمة وادبحها الصبح.. زي شهريار كده!
 - وطبعا نفذت حلفانك.. ما انا عارفك مجنون.. بس ازاي أخذت سنتين في جريمة قتل مع العمد؟! إنت بتهيس؟!
 - يا باشا أصل القضية اتأيدت دفاع عن النفس.. ما انا الراجل بتاعهم برضه.. ولأ إيه؟

- دفاع عن النفس بعد ما دبحت واحدة ست؟! (وانا باقول البلطجية واخدين راحتهم وبيزيدوا ليه كده في البلد).. طب قوللي يا تحش، النسوان اللي اتجوزتهم بعدها كنت فعلا بتدبحهم بعد الجواز زي شهريار وزى ما حلفت؟
 - ليه يا عم؟! إنت شايفني قتال قوتلة ولأ إيه؟! أنا حيلة قتلت مرة ولأ اتنين، لكن الباقيين كنت باعاملهم بالحسنى واطلقهم لما ازهق منهم.
 - أيوااا... أهو انا جايلك علشان موضوع «أزهق منهم ده».. شوف يا حمادة يا صديقي، أنا اللي جابني ليك النهارده إني باعتبارك مثل أعلى يُحتذى بيه لكل راجل، وشايفك من زمان رمز للفحولة والرجولة والذكورة، وواتق إنك مش هتخذلني، وهتثبت لكل الدنيا وبالذات بهلول إن الراجل مش مجرد حيوان يبسعى لغرايزه، وبتحركه شهوته، وهتاكدلنا بالدليل القاطع إنك إنسان حساس وليك مشاعر ومحتاج من المرأة حاجات تانية كتير غير الرغبة، وهتاكدلنا كمان انك لو لقيت الإنسانية المكتملة هتحافظ عليها ومش هتضيّعها من إيديك أبدا.
 - معاك سو جارة؟
 - يا عم سيجارة إيه دلوقتي؟! أنا مش باكلّمك؟!
 - إيه ده؟! إنت بتكلّمني أنا؟! وعهد الله افكرتك بتقرا الجرنان!

- يا سيدي جرنال إيه! باقولك كلمني عن مشاعرك.. عن تجاربك.. عن أحاسيسك ناحية الستات اللي اتجوزتهم.
- معاك سوجارة؟

- تالاني!! يا سيدي والله العظيم باكلّمك انت.

- طب عايزني أقول إيه وانا أقول؟

- يا ابني هوّ انا باسجل معاك برنامج للتلفزيون المصري
علشان أمليّك وترد عليّ؟! أنا باقولك كلمني عن مشاعرك
ناحية أي ست اتجوزتها!

- مشاعري ناحية أي ست اتجوزتها؟! كنت باحس أول
ما اشوفها بنار بتشعلل في جتتي، وابقى نفسي...

- اسكت أبوس إيد اللي جابوك! ما تكملش.. فيه بنات هيقروا
الزفت ده.. ما عندكش أي مشاعر تانية غير الشعلة والنار
والحاجات دي؟

- يا باشا هوّ الواحد عايز إيه من المُرّة بتاعته غير الشويتين
دول!! عايزها تهشتكه وتدلّعه وتولّعه.. ولّا إيه؟

- تولّعه تاني؟! هو انت شايط كده علطول يا تحش؟!
الله يخيبك!

- إيه يا ابو إيهاب؟! أيوه شايط.. مش احنا ش ش ش.. يعني
«شقاوة شباب شبرا».. يعني عاصمة جهنم.. يبقى لازم نبقي
شايطين علطول.

- لا.. اتكلم عن نفسك... طب ما انا أهو من شبرا و مش شايط

زيك.. بالعكس، أنا شايف إن المرأة مش ممكن تتلخص
في جسد، ومستغرب جدّا إنك بتلاقي ستات توافق على
طريقتك غير الأدمية دي!

- يا معلم فكك من الشويتين بتوع الكتب دول.. أنا يوماتي
أنزل مع بتوع الآداب، أصطادلي حورمة تكون لسه جديدة،
وما اتسجنتش ولا اتسجّلت.. أضمنها واكتب التعهد..
وبعد كده آخدها نضرب ورقتين علشان يبقى شرعي..
آه.. أصلي باخاف م الحرام.. ونطلع ع الموكنة بتاعتي
نشغل فيلم ثقافي نتفرج عليه واحنا بنعمل أحلى شغل..
ولو المُرّة يعني جامدة وتستاها، أضربلها نص ونص..
هههه.. مش خسارة فيها.

- شوق يا صديقي.. أنا بصفتي راجل شبراوي قديم زيّك،
أقدر أقول إني فهمت معظم كلامك.. لكن إيه موضوع
نص ونص؟

- إيه يا كبير؟! معقولة مش فاهم! دا انت اللي معلّمنا الشقاوة!
نص ترامادول ونص فياجرا.

- أيوه فهمت.. بس أعتقد انك صحياً مش محتاج فياجرا..
بيتهيألي الفياجرا هيّ اللي محتاجالك!

- ما انا قُلتلك يا كبير.. مش كل يوم.. لكن لو المُرّة تستاهل
يبقى نحسّن الأداء.. إيه المانع؟

- أنا معاك.. هنعسّن الأداء دلوقتي لكن بعدين هتعمل إيه؟!

يعني لما تكبر شوية؟! يا حمادة دي مصيبة! المفروض إن الفياجرا دي علاج لضعف الانتصاب، والأصل إن الدكتور يكتبها بانتظام للمريض على سبيل العلاج، لكن انت ما شاء اللد.. تحش يعني.. وبعدين المشكلة إنك هتعود عليها مع الوقت، وممكن بعد كده توصل لمرحلة الفشل من غيرها.. ده غير تأثيرها السلبي على عضلة القلب، واللي أعرفه كمان إن معظم الستات مش بتحبها لأنها بتحس إن الراجل ساعتها مفتعل ومش حقيقي وبتلغي إحساسه معاها.

- يا نهار ازرق!! كل ده من الفياجرا؟! لا يا عم خلبنا نترمل بس، كفاية علينا أوي الدماغ.
- نترمل إيه يا بني آدم؟! دا الترامادول ده ألعن من الفياجرا عيش ربيع الكتب مع الكتب مليون مرة.. دا بيدمّر الجهاز العصبي ويخلّيك تتحول لبني آدم كسول جدًا، زي الحشيش بالظبط، ويمكن أسوأ.. ده غير إنه إدمان.. النهارده بتأخذ نُص، بكره مش هياثر فيك، هتضطر تأخذ حباية كاملة، وبعد كده اتنين وبعد كده ثلاثة، ويمكن أحيانًا تأخذ شريط كامل علشان تحقق نفس النتيجة.. وساعتها جسمك بيتدمّر تمامًا وبتبقى شبه معتوه.. وعلى فكرة انت من دلوقتي باين عليك بوادر العته أهوه، حتى شوف عينيك خارجة لبرّه ازاي!

- عته إيه يا برنس؟! دي البلد كلها بتتعاطاه.. إنت مش شايف شكل الشباب بقى عامل ازاي! كلهم عينيهم خارجة لبرّه..
- أيوه شايف.. شايف المؤامرة.. عقار بسيط بيستخدم في العالم كله كمسكن للألام، وييجي عندنا يتحوّل بقدره قادر لنوع من أقدر أنواع السموم والمخدرات!! بس عندهم حت.. لأنهم لما منعوا عنكم الحشيش والبانجو من سنة ٢٠٠٩ الشباب فاقوا وعملوا ثورة ٢٥ يناير.. يبقى لازم دلوقتي يسهّلوا دخول الترامادول، وكمان يسمحو بتصنيع الحشيش ومن غير أي عقوبة.

- لا يا باشا.. الحشيش مش بيتصنع.. الحشيش بيتزرع.
- ده كان رمان يا تحش أيام السادات، دلوقتي الحشيش مجرد مادة كيميائية متكوّنة من الماكسفورت والحنة والبرشام، يعني مواد كفيفة إنها تنهي عقل الشباب وجسمه في سنة.

- لا يا ريس يبقى الترامادول أرحم!
- يا حبيبي ما انا قُلتلك.. الحشيش بقى من مشتقات الترامادول.. بس الفرق إنك ممكن تشيل الترامادول في جيبك بسهولة كأى دوا وصعب حد يكشفك.
- بس يا باشا الشرطه اتغيرت أوي بعد الثورة، وبقت ظابطة البلد، وكمان دلوقتي بقت تعامل الترامادول زي المخدرات.. يعني اللي شايله من غير رويشة دلوقتي

بيتحكم عليه بالسجن والغرامة لو بيتعاطاه، وممكن يتحكم عليه بالإعدام لو ثبت إنه بيتاجر فيه.

- طب ما احنا شايفينه بعينينا مالي البلد.. قولّي بقّه سمعت كام مرّة عن تاجر ترامادول اتعدم؟

- بصراحة ولا مرّة.. بس سمعت من كام يوم انهم ظبطوا ٢ مليون قرص مع تاجر وحبسوه.

- حبسوه! طب تخيل انت بقّه.. لو كل يوم والتاني يظبطوا ٢

مليون قرص، يبقى البلد بيدخلها كام قرص سنويًا؟ مش أقل من ٢٠ مليون على الأقل. وده كله بسبب سهولة دخول مكوناته وتصنيعه باعتباره نوع من أنواع الأدوية.. بس اللي

نفسه أفهمه بجد: إنت واللي زيّك بتأخذه ليه؟
- يا باشا أديك شايف حالة البلد.. مفيش حاجة شغالة فيها غير القهاوي.. يعني نص البلد عواطلية، واديننا بناخده علشان ننسى.

- تقصد يعني إنك بتأخذه إنت واللي زيّك كنوع من أنواع التخدير الذاتي والهروب من الإحباط والفسل؟

- ولو اني مش فاهم حاجة، بس الله ينور عليك هوّ علشان كده بالظبط.. بس ان جيت للحق، أنا ساعات باخده علشان الليلة تطول مع المرّة.

- غريبة أوي.. بس انا ما اعتقدش إن عندك سرعة قذف.. وحتى لو عندك.. هوّ عمره ما كان علاج لسرعة القذف،

ده غير إن مفعوله في عد تنازلي.. يعني في خلال سنة لازم تكون بتستخدم شريط كامل أو أكثر علشان تحقق نفس النتيجة، وبعد كده خلاص هيبطل يآثر فيك.. يبقى معقولة تنتحر علشان شوية متعة زيادة ومؤقتة؟! إنت غريب أوي!

- خلاص يا عم.. جبتي المرض وأنا واقف!! عليّ الحرام من ديني ما هاحطه في بقي من النهارده.. بس اوعى تقولي بقّه الأفلام الثقافية عوا هيّ كمان!

- للأسف يا حمادة!! الأفلام دي مش بس عوا زي ما بتقول، دي هيّ أساس المصائب اللي انت فيها كلها.. هيّ اللي مخلّيك مولّع علطول.. وللأسف عمرك ما هتنطفي طول ما انت بتتفرج عليها.. حتى لو اتجوزت كل يوم ميت واحدة.. يا حمادة، الأفلام دي بتورّيك عالم افتراضي لا يمكن تلاقيه في الحقيقة، دول كلهم بني آدمين متصنعين: أعضاءهم مش طبيعية، ولا شكلهم، ولا انفعالاتهم، ده غير المونتاج والتصوير اللي بيخلّيك تحس انهم حقيقة جميلة.. وطبعًا حضرتك بتندمج وتصدّق وتحلم بست زي اللي بتشوفها في الفيلم.. بس المشكلة إنك مش هتلاقيها، ولو لقيتها هتحلم بغيرها وبغيرها، ولا يمكن هترتوي ولا تشبع، وبالتالي مش ممكن هتستمتع مع الست اللي معاك مهما كانت، لأنها ببساطة ست حقيقية مش أسطورة زي اللي بتشوفهم في

الأفلام الزفت دي، ده غير شعورك بالملل منها ورغبتك
الوهمية في التجديد.

- تصدق يا ريس عندك حق.. أنا ابتديت أزهد من صنف
الحريم كله وأعيش مع نفسي.

- أيوان.. «تعيش مع نفسك».. وطبعًا كلنا فاهمين.. يعني
انت ابتديت تدريجيًا تتجاوز عن وجود امرأة من أصله،
وتتخلص من الرغبة بنفسك، وبالطبع ابتديت تحس بالبرود
مع أي ست... هي دي النتيجة الطبيعية لمشاهدة الأفلام
دي!! أنا بجد مش فاهم ليه بيعملوا كده في شباب البلد!
وليه الأفلام دي بتدخل بسهولة بيوتنا! ملعون أبو النت!!
وملعون أبو اللي ببسهل دخولها!!

- يا باشا والله عندك حق، بس الواحد هيعمل إيه يعني عيش مع الكتب
الدماغ علطول تعبانة ومفيش حاجة بتريحها غير الكيف..
كيف المخدرات وكيف النسوان.

- يا تحش الدماغ تعبانة علشان فاضية، حاول تملها بجد
وهي تستريح.

- طب املاها بيايه؟ معاك بانجو؟

- برضه عايز مخدر ثاني! يا عم فوق بقه العمر بيجري! يا حمادة
اللي زيك خلصوا جامعة من سنين، وفتحوا بيوت وخلفوا
عيال.. إنت دُفعتك دلوقتي دكاترة ومهندسين وأساتذة
جامعة.. وما تقولييش أصل الظروف وتضحك على نفسك..

شباب ظروفهم كانت أصعب منك، وقدروا يتحدوا الواقع،
وينحتوا في الصخر، لحد ما حققوا أحلامهم.. إنت بس اللي
مستمع بدور الضحية.. وأنا بجد مش فاهم ليه ما تحاولش
تكمل تعليمك علشان تشتغل شغلانة محترمة، وربنا يرزقك
بزوجة سالحة تخلف منها كام عيل يسندوك وتفرح بيهم.

- وحياتة أبوك ما تقلبش عليّ المواجه.. ما هي كانت في أيدي

وأنا اللي ضيعتها!

- هي مين دي؟

- عفاف.

- عفاف مين؟

- عفاف صاحبة سناء أختي.. كانت معاها في معهد سنجر..
بت زي القمر.. أول مرة شفتها قلبي رقص وقلت بس هي
دي اللي عليها العين.. رححت قاطرها وهي خارجة من
المعهد، وركبت وراها المترو، وقلت أرمي بلايا عليها:

- صباح الفل يا قمر.. أنا حمادة أخو سناء.. خلاص
ما تدفعيش.. أنا قطعتك.

- متشكرة.. أنا معايا أبونيه.

- يعني التذكرة راحت ع الفاضي.. ولا يهملك فداكي
١٠٠ تذكرة.. وعهد الله أنا هالين عليّ أدفع للمترو كله..

إنتي نازلة فين؟

- جزيرة بدران.. واخويا مستنيني على المحطة.

طبعًا كانت بتهددني وهي مش عارفة مين حمادة التّحش،
بس انا ما حبّتش أخوفها وقتلتها ماشي يا جميل.. بس إيه
رأيك تزوّغي بكرة من المعهد واعزمك ع السيماء؟ قالتلي:
«ما عنديش مانع بس لي شرط».. قُلتها أوّمرى.. قالتلي:
«سنا أختك تزوّغ معاينا ونجيب اخويا يونسها».. أنا طبعًا
سمعت البقين دول والدم ضرب في نافوخي رحت رازعها
حتة ألم.. خلّا وشها بقى يجيب دم من كل حتة.
- يا نهارك ازرق!! أكيد طبعًا المتر وكله اتلم عليك، ما انا عارف
رجالة شبرا.

- وانت بتقول فيها.. وعهد الله أخوك كان هيتقطع تحت
لولا عفاف.

- بتقول مين؟ عفاف؟!

- والمصحف زمبؤلك كده.. هي اللي نجدتني من أيديهم.
- نجدتك ازاي؟

- صرخت وقالتلهم: «إوعى حد يمد إيدو على اخويا! وانتو
مالكو.. اتأخرت في المعهد وبيأدبني.. وكل واحد يخليه
في نفسه».

- يا نهار... دي بت جدعة أوي.

- إلا جدعة.. دي طلعت بميت راجل ومسحت بأخوك
الأرض بالأدب، بعد كده خدتني من أيدي زي العيل ونزلنا
من المتر وعلشان الناس تصدّق إنني أخوها بجد.. ويا دوبك

المتر واتحرّك راحت سايباني في الشارع من غير ولا كلمة
ومشيت.. لقيت دماغى ابتدت تطلّع دخان.. رحت طالع
ع الواد «كوارشي» أخذت كل التموين اللي عنده.. وعهد
الله وما ليك عليّ حلفان ٥ سرايط ما حوقوش فيّ.. قلت
ما بدّهاش بقه.. رحت داخل على البت سنا الأوضة،
صحتها من النوم وقتلتها:

- قومي ورّيني بيت عفاف صاحبك.

- إلا دي يا حمادة! أبوس إيدك.. دي بت غلبانة واللي فيها

مكفيها.. بتدرس وبتشتغل وبتصرف على أهلها كمان..

أصل ابوها عاجز واخوها صايع وعایش على قفاها.. ينوبك

فيها ثواب ابعد عنها وشلها من نافوخك.

أنا سمعت الكلمتين دول وحسيت إن جردل ميه ساعة

اتدلق عليّ وفوقني: إيه البت دي؟ جمال وعقل وجدعنة،

دي ما فيهاش غلطة!

- سنا، أنا عايز اتجوز البت دي.

- ما تنفعكش يا تحش.

- قصدك انا اللي ما انفعهاش، ما تقوليها يا بنت ابويا.. التّحش

ما ينفعش يتجوز العفاف.. صح؟!

- ما تزعلش يا اخويا.. أصل البت غلبانة ومحتاجة راجل

يصونها ويعوضها عن الشقا اللي شافته.. مش بتسلى بيها

يومين وبعد كده يرميها!

- طب جربيني المرّة دي يا سناء، وقوليلها حمادة عايزك في الحلال، وانا وعهد الله ما هأصّر رقبتك.. طب ورحمة ابويا يا سناء لأستتها وأهنيها.

وافقت عفاف عليّ بعد ما حفيت وراها شهور، بس اشترطت نقرأ الفاتحة بس لحد ما أهريبها إني اتغيّرت، وابتديت اذاكر ثاني من منازلهم وبطلت كل حاجة على إيديها.

- معقولة يعني عايز تقنعني إنك اتغيّرت وكمان بقيت مؤدب فجأة وما كنتش بتحاول معاها كده ولّا كده؟

- بصراحة هيّ مرّة.. كان اخوها مش في البيت وحاولت أبوسها راحت دالقة عليّ الشاي وهو بيغلي، من بعدديها حرّمت وقتلتها توبة من دي النوبة!

- هههه.. أخيراً جتلك اللي تعلّمك الأدب يا ابو حمادة، تصدّق إني فرحان فيك.

- أيوه يا ابو إيهاب.. كانت عايزة تعلّمني الأدب وتعمل مني بني آدم.. وانا وشرفك من أول ٣ شهور خطوبة ورّيتها إني ابتديت اتغيّر لقيتها ابتدت تحبني.. قلت بس.. هي دي اللي هاتوب على إيديها، رُحت حالف على النسوان والحشيش وقلت حد الله ما اهوّب منهم ثاني.. بس هتقول إيه بقّه.. ديل الكلب عمره ما يتعدل.

- إوعى تقوليّ انك رجعت ثاني!

- أيوه رجعت ثاني.. ورفضت النعمة اللي ربنا ادهالي!!

بس منهم لله أصحاب السوء همّ اللي فضلوا ورايا لحد ما جابوني ورا ثاني.. ورجعت ريمة لعادتها القديمة.
- خسارة!! بس هيّ ليه ما حاولتش معاك ثاني طالما كانت ابتدت تحبك زي ما بتقول؟

- حاولت مرّة واثنين وعشرة.. وكنت كل مرّة أندم وابوس رجليها علشان تسامحني.. والحق يقال.. كانت بتسامحني. لكن في الآخر ما قدرتش تستحمل، وخصوصاً بعد ما مديت إيدي عليها وضربتها.. أصل النسوان يا ابو أهاب بتصبر كثير، لكن لما تبيع.. خلاااص.. ما بتشترش ثاني.. وهيّ سامحت كثير وصبرت كثير، لكن لمّا فاض بينها استنت لحد ما خلصت المعهد وراحت واخدة ابوها واخوها وطفشت من الحتة كلها.

- طب ما حاولتش تدوّر عليها؟

- دا انا قلبت عليها البلد حتة حتة.. كأنها فص ملح وداب.
- وطبعاً حزنك عليها خلّاك رجعت أسوأ من الأول زي ما انا شايفك دلوقتي!

- أيوه يا صاحبي.. بقيت أوسخ م الأول بعد ما ضاعت عفاف!
- البقية في حياتك يا حمادة!
- حياتك الباقية يا صاحبي!

- للأسف مش حالة شاذة.. ده موجود كثير جدًا.
- إزاي بس يا دكتور؟! أنا بجد مش فاهم.. دي كارثة! إزاي
راجل يلاقي واحدة ست فيها كل المواصفات دي: عقل
وحكمة وصبر وجمال وإخلاص وأدب.. ورغم كده يخونها
ويضيعها من إيده؟! أنا واثق إن حمادة استثناء والّا بيتقى
ملوش لازمة البحث اللي بنعمله، لأننا مهما وصلنا للأسباب
اللي بتشد الرجل للست لا يمكن هنضمن إخلاصه ليها
مهما اكتملت صفاتها.. يبقى أنا ببساطة المفروض أرجع
للست صاحبة الرسالة واقولها ما تعيبش نفسك جوزك
كده كده هيخونك مهما عملتي.

- لا يا صديقي.. إحنا مش لازم نياس، وخذ بالك أنا ساعدتك
من البداية بسبب حماسك وإصرارك إنك توصل للإجابة،
لكن طريقة كلامك المحبطة دي ما تناسبش كطيب.. أنا
اتعودت إن دايمًا فيه أمل طول ما جهاز الأكسجين شغال.
- يعني حضرتك شايف بجد إن فيه أمل؟

- طبعًا فيه أمل.. وكبير كمان.. لكذا سبب، أولًا: لأنني قلت
إن فيه رجالة كثير زي حمادة.. لكن ما قلتش إن كل الرجالة
زيه.. ثانيًا: أنا ما اقدرش أعتبر إن عفاف عملت كل اللي
عليها، وبرغم كل مميزاتها لكن برضه ما اقدرش أعتبرها
نموذج المرأة اللي ممكن تحتوي الرجل أو تغيره.. لأنها
ما وصلتش لدرجة الكمال.

عودة إلى بهلول

- مالك يا إيهاب؟! شكلك حزين ليه كده؟
- أبدًا يا دكتور بهاء.. أصلي كنت بادفن صديق لي.. مات
النهارده!
- تقصد انتحر.

- أيوه انتحر.. واضح إن حضرتك وقريني بقيتوا أصحاب
وما بتخبوش على بعض حاجة.
- هههه.. إحنا أصحاب من أول يوم جيتلي فيه.. بس مش ده
المهم.. المهم إني كسبت الرهان.
- رهان إيه؟

- رهان شهر يار.. مش انت قُلتلي مستحيل أي راجل يلاقي كل
المواصفات اللي بيعجبها في واحدة ست ويضيعها أو يعرف
عليها واحدة تانية؟ طب أهو صديقك ضيع عفاف من إيده.
- عندك حق.. عفاف كان فيها كل المواصفات اللي بيحلم
بيها حمادة ورغم كده ما اقدرش يحافظ عليها.. إنت تكسب
الرهان يا دكتور.. بس أنا واثق إن حمادة حالة شاذة.

- طب وهوّ فيه امرأة مكتملة؟

- لا مفيش.. بس أي ست ذكية تقدر تكون المرأة المكتملة بالمفهوم الذكوري.. ده لو حبّت جوزها وقررت تحتفظ بيه.

- وازاي الست توصل لمرحلة الاكتمال دي؟

- لو حاصرت الراجل من أضلاعه الأربعة؟

- هوّ الراجل له أربع ضلوع بس؟ أنا أعرف إنهم ٢٤ أو ٥٨ تقريباً.. مش فاكرك بصراحة.

- يا حبيبي باقول أضلاع مش ضلوع! وبعدين جبت الأرقام دي منين؟

- مجرد معلومات عامة يعني.. بس إيه هيّ الأضلاع الأربعة دي يا دكترة؟

- الجسد، العقل، الروح، القلب.. دي أضلاع الراجل الأربعة اللي لو اختل منها ضلع بيقع من ناحيته.

- بيقع من ناحيته!! تبقى مش ضلوع أربعة.. تبقى رجول أربعة!! أيوه فهمت يبقى علشان كده «داروين» اعتبره حيوان ناطق.

- مش ممكن يا أستاذ إيهاب.. دا انت عبقرى.. إزاي وصلت للاستنتاج ده.. ضلوع أربعة بقت رجول أربعة بقت حيوان

ناطق! إنت قُلتلي كملت تعليمك لحد فين؟

- معلىش يا دكتور اعفيني من الإجابة، أصل الحاجات دي بتتنظر وانت عارف العين فلقت الحَجَر.

- ده على أساس إني هاحسدك يعني؟ يا سيدي ولا يهملك..

طب محتاج مني حاجة تانية ولأ اشوف زبايني بقّه؟

- زباينك إيه يا دكتور هوّ انت كده خلصت؟! يعني أروح أقول

لصاحبة الرسالة حاصري جوزك من رجوله الأربعة.. ده

كلام! ولَمّا يتكعبل وتجيلي مصيبة؟!

- يا حبيبي رجول إيه بس؟! إنت لسه مُصمم إنهم رجول؟!!

بقالي ساعة باقولك أضلاع!

- ماشي.. بس هيّ سألتني «ليه الرجالة بتحب الستات؟»

علشان تفهم إيه سر خيانة جوزها ليها، أقوم أقولها حاصريه

من الأضلاع الأربعة شكراً سلام عليكم؟! طب والمصحف

دي كانت تيجي تولّع في المجلة!

- يا أستاذ إيهاب، إنت بجد هتشلني.. بقّه احنا بقالنا ١٩١ صفحة

بنهري ونرغي ونقابل ستات وندخل سجون علشان في الآخر

تمسك في آخر جُملة وتقولي أضلاع وزفت!!! يا حبيبي إحنا

مش عرفنا من كل شخصية قابلناها إيه سر انجذاب الراجل

ليها؟ يبقى خلاص، ارجع للمدام بتاعتك وقولها خُدي بالك

من النُّقط دي، وحاولي تهتمي بيها في نفسك!

- أيوه كده ماشي.. يعني مفيش أضلاع.

- لا يا حبيبي طبعا فيه أضلاع، والأضلاع دي هيّ اللي بتتفرع

منها كل احتياجات الراجل اللي اتكلمت عليها حضرتك

مع كل شخصية من اللي قابلتهم.

- يا نهار ازرق!! أضلاع بيتفرّع منها احتياجات؟! بص
يا دكتور، أنا ها اعترفلك بالحقيقة: أنا ساقط ثانوية عامة..
وفي الأحياء كمان.. وبالذات في موضوع الأضلاع ده،
وعلشان ما اتعبكش وتتعبني أنا هارجع المجلة أقدم
استقالتي وأخلص!

- بس ده مش حل.. إنت لازم تتعلم.. وبعدين جاي بعد كل
البهدلة دي تقولي هارجع أقدم استقالتي؟! إنت فعلاً عايز
تشلني!

- طب باقولك إيه يا دوك.. ما تاخذ كمان ٥٠٠ جنيه وتكتبلي
الرد بتاع الولية دي واهو ينوبك ثواب فيّ وفيها!
- من غير ٥٠٠ جنيه.. أنا هاقولك رد الرسالة، بس لازم تفهمه
وكمان تسمعهمولي قبل ما تمشي.. ده شرطي.. موافق ولا لا؟
- موافق، بس أمي بتسلم عليك وبتقولك واحدة واحدة عليّ.
- هههه... ماااشي يا سيدي:

الأول لازم تفهم إن الصفقة ابتدت بين الرجل والسّت
من ساعة ما سابوا الجنة ونزلوا على الأرض وعاشوا في
الغابات، والصفقة دي كانت بتقول «تديني غريزة وأديكي
أمان»، والصفقة دي مش هُمّ اللي اختاروها بإرادتهم، لكن
الطبيعة هيّ اللي صنعتها.. يعني راجل قوي وعنيف وشجاع
يبقى أكيد هيقدر يحمي الست من الوحوش والأعداء،
وكمان يوفّر لها الأكل والشرب اللي هوّ «الأمان».. وفي

المقابل امرأة عندها الرقة والأنوثة والجاذبية والتفاصيل
الجسدية يبقى أكيد هتقدر تحقق للراجل الإشباع الجسدي
اللي هو «الغريزة».. ونجحت الصفقة وعاشوا كده لآلاف
السنين، لكن مع التطور البشري وإشباع كل واحد لاحتياجاته
ابتدت الاحتياجات دي تتطور.. يعني الراجل ابتدى يطالب
بعد الغريزة بـ «التقدير».. وبقي عايز لَمَّا يرجع من الشغل
يلاقي نظرة إعجاب في عين مراته.. بقى عايز يحس بقيمة
اللي بيعمله.. بقى عايز يحس بقدراته وإمكانياته.. بقى
عايز كلام امتنان وشكر وإعجاب وانبهار... يعني ما بقاش
مكتفي بجسمها. وهيّ كمان ابتدت تطالب بـ «الرومانسية»
بعد ما شبعت من الأمان.. يعني ما بقاش كفاية عليها الأكل
والشرب والحماية.. بقت عايزة كلام حُب وغزل جنب
العضلات والقوة.

- أيوه.. يعني الصفقة بقت «غريزة وتقدير» مقابل «أمان
وعاطفة».. بس انا كنت قرئت يا دكتور إن الست مش
محتاجة من الراجل غير الأمان بس!

- فعلاً المعلومة دي حقيقية.. شكلك كده ابتديت تذاكر من
ورايا.. المرأة فعلاً كل احتياجاتها بتصب في خانة الأمان،
سواء كان أمان عاطفي أو أمان اجتماعي أو أمان مادي..
وكلهم بياكّدوا إما قدرة الراجل على حمايتها، وإما رغبته
في الاحتفاظ بيها، يعني كلهم أمان برضه.

- طب والله العظيم السّات دي غلابة ويبرضوا بقليلهُ! لكن احنا عمرنا ما بنشبع، وكل يوم عايزين ست غير الثانية!!
- دي كمان معلومة حقيقية، لأن الرجل بطبيعته مَلُول، ودايمًا يدوّر على الحاجة اللي ناقصاه ومش موجودة في مراته، علشان كده دايمًا بنحاول نعلّم المرأة ازاى تبقى نموذج المرأة المكتملة اللي قُلتك عليه، علشان تقدر تحاصر الرجل من أضلاعه الأربعة!
- ثاني أضلاعه الأربعة!؟

- هههه.. أيوه وهاشرحهملك بالتفصيل علشان تعيد الثانوية العامة من منازلهم وتنجح في الأحياء.. اكتب عندك:
الجسد: وده نموذج «سندريلا» اللي اتكلّمنا عنه، اللي هو الاحتياج الغريزي والأول للرجل.. والرجل بطبيعته محتاج للجنس علشان يحس بالتوازن والإشباع والسعادة في نفس الوقت.. وده أهم وأقوى احتياج في شخصيته، وأكبر نقط ضعفه، علشان كده تلاحظ إن معظم الخيانات الزوجية بتبقى للأسف خيانات جسدية، وعلشان كده هتلاحظ إن ربنا أنعم على المرأة بالأنوثة والجمال والتفاصيل علشان تقدر تحقق للرجل الإشباع، وتحتويه من الضلع ده.
- ماشي.. طب والسّت اللي مش جميلة أو اللي تفاصيلها متواضعة تعمل إيه يعني؟! تسييه يخونها؟!
- سؤال مهم وفي نفس الوقت مُحير لسّات كثير.. بس اللي

لازم يفهموه إن الأنوثة «ذكاء» مش جمال ولا تفاصيل.. بدليل إن ممكن واحدة ست مش جميلة، وتفاصيلها بسيطة تخطف راجل من مراته الجميلة اللي عندها كل التفاصيل.. وده لأنها محترفة وذكية.. بتقدر تعمل تسويق هايل لبضاعتها الضعيفة الرخيصة.. يعني تقول كلام مُثير.. تلبس لبس مُثير.. تعرف تحط مكياج.. برفان.. تعرف تولّع شمع وتشغّل موسيقى.. تعرف تتدلّع وتتمايص.. وتعرف كمان تتمنّع أحيانًا لَمَّا تحب تشوّق الرجل، وتستسلم أحيانًا لَمَّا تحب تأكّد للرجل قدراته الخارقة وتحسسه برجولته.

- يا سلام!! يعني الجمال ملوش أي علاقة بالغريزة؟
لا طبعًا له علاقة كبيرة، لأنه الغلاف اللي يبشّد الرجل للست، بس ده ما بقاش صعب دلوقتي.. يعني هاتلي أي ست دميمة وودّيها عند الكوافير أو مركز تجميل هتخرج هيفاء وهبي.. يعني برضه الموضوع ذكاء.. أما بقه السّت الجميلة بالفطرة والذكية في نفس الوقت فهيّ دي المرأة شبه المكتملة.

- ماشي فهمت.. ندخل على الضلع الثاني.
- العقل: هو ده الضلع الثاني.. والمرأة من غير عقل بتبقى مجرد جسد.. والسّت العاقلة هيّ اللي تقدر تحتوي الرجل، هيّ اللي تقدر تحقّله التقدير اللي بيحلم بيه، واللي فشلت «الحاجة دُرية» في تحقيقه فاضطر يتجوّز عليها.. السّت

العاقلة هي اللي تنبهر بكل قُدراته وتبالغ في الإعجاب
 بيها.. هي اللي تنبهر بالهدية اللي جابها لها حتى لو مش
 محتاجاها.. هي اللي دايماً تصدقه لَمَّا يحكيها عن عبقرية
 وهو طفل، وازاي كان الأول في كل حاجة.. هي اللي دايماً
 تصدق إنه أفضل واحد في شُغله، وأقوى واحد في شِئته.
 وأذكى واحد في عيلته.. السّت العاقلة هي اللي لا يمكن
 تنتقد جوزها أو تقلل منه بالذات أَدَام حد.. والسّت العاقلة
 كمان هي «عفاف»، إللي تقدر تحتوي الراجل وتطور منه
 وتساعد على النجاح.. وتساعد كمان إنه يتخلص من
 عيوبه بدون ما تجرحه.. وما تنساش «راقية إبراهيم» والبريق،
 لازم السّت الذكية تبقى دايماً نجمة في عين جوزها.. يعني
 ثقة في النفس دايماً، ولو استدعى الأمر مفيش مانع تبقى
 مغرورة، وبالذات لو حطها في مقارنة مع غيرها.
 - مااشي.. ودي كمان فهمتها.. ندخل على الضلع الثالث.
 - الروح: والمرأة من غير روح تبقى مجرد جسم، أو بالكثير
 جسم له عقل، وبالتالي سهل جداً الراجل يزهاق منها ويهرب
 لأي واحدة عندها روح.. الروح يعني مشاركة وجدانية..
 يعني خفة دم ولباقة.. والسّت اللي ملهاش روح دايماً
 هتلاقي جوزها إما على القهوة وإما بيشتيت وإما بيتفرج
 على النشرة.. أما السّت اللي ليها روح فهي «جانيت»
 الحبيبة الصديقة.. هي اللي ينفع جوزها يتكلم معاها في كل

حاجة.. هي اللي ينفع جوزها يدخل معاها سينما أو مسرح
 أو يحضر معاها ندوة.. وهي اللي ممكن يروح معاها دار
 أيتام أو جمعية خيرية.. والمرأة اللي ليها روح هي المرأة
 المُستقلة اللي عندها هدف ورسالة عايشة علشانهم.. هي
 السّت اللي دايماً جوزها يتصل بيها كثير من الشغل علشان
 يتكلم معاها في أي حاجة، ولَمَّا يرجع البيت يحط راسه
 في صدرها ويقعد يحكي ويتكلم في كل حاجة.
 - اللهم طوِّلك يا روح!! ندخل على الضلع الأخير.
 - القلب: وده بقّه أجمل ما فيهم وأجمل ما فينا.. يعني: العاطفة،
 الحب، المشاعر، اللي هي بتميزنا عن كل المخنوقات..
 واللي من غيرها يتجمد البشر ويتحولوا لآلات.. «تفيدة»
 اللي هي «سندريلا الكيت كات»، اتحولت لجسم لأنها
 ما حبّتش جوزها، وكان بالنسبة ليها مجرد هروب من بيت
 مرات أبوها، علشان كده هو كمان ما حبهاش وكانت بالنسبة
 له مجرد جسد.. و«الحاجة درية» (شجرة الدر) ما حبّتش
 جوزها، لكن كان بالنسبة ليها مجرد شكل اجتماعي،
 علشان كده هو كمان ما حبهاش واتجوز عليها.. حتى
 «عفاف» برغم كل مميزاتها، لكن ما قدرتش تغير «حمادة
 التّحش»، لأنها ببساطة ما حبّتهوش.. والحب مش محتاج
 قرار ولا ينفع نعلّمه لأي ست.. الحب فطرة.. ممكن ننمّيها
 وممكن نموتها.. و«ليلي» برغم تحفظي عليها قدرت تحب

«قيس» وتحتفظ بحبه لآخر لحظة.. والسَّت اللي ليها قلب هي اللي دايمًا تتجاوز عن عيوب جوزها، وتفكر نفسها دايمًا بمميزاته، علشان تفضل تحبه علطول فبالتالي يفضل يحبها، وبكده تحققله الإشباع العاطفي اللي هو الضلع الرابع، واللي انت لسه ما آمنتش بيه يا أستاذ إيهاب.

- ماشي.. فهمت إن دي الأضلاع الأربعة للراجل.. الست بقه المفروض تعمل إيه بيهم؟ تعمل عليهم شوربة مثلاً؟! - هههه.. لا.. تحاول تنمي الأربعة جواها.. وأهم من كل ده تفهم إن أي راجل في الدنيا عنده ميول زائدة لضلع من الأربعة دول.. دايمًا يبقى نقطة ضعفه وسبب سقوطه.

- يعني تقصد مثلاً لو الست حسّت إن جوزها ميال أكثر للغريزة يبقى تلبس كل يوم «بيبي دول» وتحط مكياج وبرقان وكده؟! -

- أيوه.. ولو رومانسي يبقى تركز مع الأغاني والشمع والورود والكلام الحلو.. ولو عقلاني يبقى تهتم بثقافتها وتطوير أفكارها واهتمامتها، وتخصص جزء كبير من حياتها لمشاريعه وأحلامه.. ولو مثالي ويغلب عليه الروح يبقى تكون دايمًا صديقة جذابة وخفيفة، وتنسى معظم الوقت إنها مجرد زوجة.

- ماشي.. بس «حمادة التّحش» أثبتت إن العيب أحيانًا بيكون من الراجل، وإن الست مهما كانت مكتملة الصفات زي

ما بتقول ممكن برضه يخونها.. هنعمل إيه بقه مع النوع ده؟ والمصيبة الأكبر ليطلع جوز الولية صاحبة الرسالة من نوع حمادة!!

- برضه مفيش حل غير إن الزوجة تحاول تحتويه من كل الزوايا.. علشان تقلل من نزواته قدر الإمكان لحد ما يبجي الحل من عند ربنا!

- إزاي يبجي الحل من عند ربنا؟! -

- يعني إما إن ربنا يهديه من نفسه ويرجع لعقله، وإما إنه بيتليه في صحته أو فلوسه أو ولاده فيفوق ويعرف إن الله حق ويحافظ على النعم اللي ادهاله.

- إيه يا دكتور؟ إنت ليه بتبصلي أوي وانت بتقول الجملة الأخرانية؟! إوعى تكون بتلأح عليّ، على فكرة أنا مش من النوع ده خالص!!

- أنا ما اقصدش كده والله.. أنا بس ملاحظ إن عينيك زايغة شوية، ودايمًا تتكلّم عن السّتات الحلوة رغم إنك قُلتلي إن مراتك ست مكتملة وبتحبوا بعض كمان!

- لا طبعًا.. أنا عمري ما كانت عيني زايغة!

- يا راجل!! طب وتفيدة وعينيك اللي كانت هتطلع عليها أدام البرنس؟

- هههه.. لا يا دكتور.. ده كان مجرد تفريغ شحنات.. عادي يعني زي أي راجل.

- طب خلِّي بالك بقه يا صديقي من شُحناتك، لأن كل الرجاله اللي وقعوا في الغلط وقعوا بسبب محاولات فاشلة لتفريغ الشحنات!

- لا ما تخافش يا دكتور.. أخوك صايح قديم ولا يمكن يقع أبدًا.. أنا أهزر من بعيد لبعيد، لكن ساعة الجد أخلع فورًا. ربنا يستر.. على كل، خلِّي بالك من نفسك، ودايمًا طمّني عليك.

- يعني خلاص.. كده المأمورية انتهت ومش هينفع أجيلك تاني ولا أستشيرك!؟

- لأ ازاى!؟ أنا دايمًا تحت أمرك وفي خدمتك طالما بتسعى لخدمة الناس.

- طب آخر سؤال يا دكتور قبل ما امشي.
- اتفضل.

- دلوقتي إحنا اتكلمنا عن الحاجات اللي لازم السّت تعملها علشان تحتفظ بجوزها.. طب والراجل مفيش عليه أي مجهود علشان يحتفظ بمراته!؟

- طبعا عليه حاجات كتير لازم يعملها، بس أولًا: إحنا بنعتمد بنسبة كبيرة على عقل السّت وحكمتها ورغبتها في الحفاظ على البيت، وبنعتبرها دايمًا صمام الأمان للمجتمع كله، علشان كده دايمًا بنيجي عليها. ثانيًا: إحنا في البحث ده بنجاوب على سؤال محدد، أما بقه لو عايز تتكلم عن

احتياجات المرأة وحقوقها يبقى يا ريت تبتدي في بحث تاني.

- أيوه ونسميه «هواي وومان لوف خناشير».

- خناشير!!! ماشي.. وازا برضه هاساعدك فيه.

- إنت إنسان عظيم يا دكتور! وانا اتشرفت جدًا بيبك!

- أنا اللي اتشرفت بيبك يا أستاذ إيهاب.. دايمًا خلّيني أسمع عنك كل خير.

- حاضر يا دكتور بهاء يا جميل.. سلام.

ربيع الكتب
book-spring.com
عيش مع الكتب

٧
كريم وزينة
الرومانسية

وأنا في طريقي للمجلة جاتلي مكالمة من واحد صوته محترم
أوي، عرفت بعد كده إنه راجل أعمال كبير، طلب مني أساعد
بنته «زينة» في حل مشكلة نفسية خاصة بيها على اعتبار إنني خبير
علاقات اجتماعية ولايف كوتشينج ما حصلتش (والمصحف هو
اللي قال كده).. وقال كمان إنه متابع الباب بتاعي في المجلة من
زمان.. رغينا شوية وفهمت من كلامه إنها سابت البيت وعاشة
حالة اكتئاب صعبة جداً بعد انفصالها عن جوزها «كريم»، إللي
ما كملتش معاه شهرين.

طبعا أنا بفظتي وعبقريتي المعهودة سألته سؤالي الخبيث:
- هو موبايل حضرتك كارت ولا خط؟
رد عليّ بمتهى الثقة:

- طبعًا خط!

ودي الإجابة اللي كنت مستنيها، واللي أكدتلي إنه راجل مستريح، ومش هيفاصل معايا في الأتعاب (اللي هي الفزيتا يعني).. علشان كده قُلتا. طبعًا موافق أتابع الحالة، وسألته سؤالي الثاني اللي بيدور حوالين نفس الهدف:

- هو حضرتك ساكن فين؟

قالي إنه ساكن في حته اسمها «القطامية هايتس».. للأسف الإجابة المرة دي ما ريعتنيش، لأنني زي ما اتو عارفين حوارتجي قديم ودايس مصر حته حته، علشان كده فهمت علطول إنه يقصد مساكن الزلزال اللي في آخر المقطم.. آل يعني لَمَّا يتكلم إنجليزي ويقول «هايتس» مش هافهم! عالم غبية والله!

بس برضه في الآخر معدني الطيب ظهر وقُلتله: - مش مشكلة ساكن فين، المهم تحب نتقابل إمتى علشان نتفق؟

قالي:

- مفيش داعي نتقابل لأنني شخصية عامة، وما احبش أظهر في الصورة، بس كده كده هابعتلك النهارده السواق بمبلغ رمزي على سبيل العربون.

بصراحة الكام جملة الأخرانيين ما عجبتنيش خالص، ووغوشوني أكثر.. يعني إيه هيبعتلي السواق؟! المصيبة ليطلع عنده ميكروباظ وناوي بيعتلي السواق اللي شغال عليه! والمصيبة

الأكبر إنه معهوش فلوس وناوي يستلف الفلوس من واحد اسمه رمزي! ووارد جدًا إن رمزي يكون السواق اللي شغال على الميكروباظ! يعني الواطي هيستلف من السواق اللي شغال معاه علشان يعالج بنته! دا إيه العالم الرّمم دي؟! كل الكلام ده دار في دماغه قبر ما أسأله سؤالي الثالث واللي كنت ناوي أعتبره الأخير:

- هي بنتك سابت البيت وراحت فين؟

توقعت طبعًا إنه هيقولي عند رمزي لأن بالعقل كده إيه اللي هيجبر رمزي يسلفه مبلغ كبير زي ده بدون مقابل؟ أعوذ بالله الناس بقت تباع لحمها علشان تعالج ولادها! ربنا يعافينا! لكن في الحقيقة الإجابة المرة دي جت عكس توقعي تمامًا واكتشفت إني ظلمت الراجل، لأنه قالي:

- يا أستاذ إيهاب بنتي قافلة تلفونها وعازلة نفسها عن الناس في الجونة!

بس كده.. المسألة وضحت... الراجل عايش في مساكن الزلزال وبنته طفشانة في حته اسمها الجونة.. ومن خلال دراستي للجغرافيا أكيد الجونة دي هتبقى بعد الفيوم.. يعني أرياف.. واضح إنهم عالم بيئة وهيقرفوا اللي جابوني وبناقص أم الشغلانة دي! بس ليه التسرع؟ طب ما اعرض عليه شروطي واشوف رده: - بص يا باشا أنا من الآخر باخد ٨٠ جنيه في الجلسة الواحدة، ده جُوا القاهرة، لكن مشوار الجونة ده بعيد، يعني هاضطر

أعامله زي باقي المحافظات .. طب والمصحف الشريف
ومالك علي حلفان يا أخي أنا عندي حالة في الدقهلية ..
واحدة مجنونة وبتشد في شعرها .. باروح ليها ٣ مرات في
الشهر أشد معاها، وابنها بيديني في المرة الواحدة ١٠٠
جنيه مقفولة، ده طبعا غير أكلي وشربي ومواصلاتي .. وانا
بقه يا باشا لاجل العيش والملح اللي لسه ما أكلنا هوش مع
بعض هاعاملك زي ابن المجنونة وأخذ منك ١٠٠ جنيه
في المرة .. موافق ولأ أسيبك تفكر؟

أنا قتلته الكلمتين دول وحسيت إن الرجل صوته راح وابتدى
يغرغر وكأنه يبطلع في الروح، بس برضه بخبرتي اعتبرتها حاجة
عادية، لأن أكيد الـ ١٠٠ جنيه مبلغ مش بسيط، بس أنا ما أهلي
ما يغرغر ولأ يتحرق بجاز مش هو اللي مخلف بت مجنونة!
المهم .. في الآخر زي ما قتلتم انتهمت المكالمة على إنه
هيبتلي رمزي ومعاها الفلوس وكمان عنوان البت المجنونة ..
علشان كده اتحررت فوراً على رمسيس علشان أقابل أخونا اللي
معاها الأمانة .. الساعة ٣ بالثانية ركن جنبي أتوبيس ليموزين أسود
٨ راكب أول مرة أشوفه في حياتي، ونزل منه راجل طول بطول
لابس نضارة فضي بتبرق، واداني الظرف من غير ما يسألني حتى
أنا مين .. أنا قلت طبيعي ما هو أكيد باين علي خبير علاقات
اجتماعية (أصل أنا كنت الوحيد في رمسيس اللي لابس بنظلون
أخضر) .. أخذت الفلوس وقررت أتعامل معاها من منطلق إنني واد

ابن بلد ومتعلم الشهامة والرجولة والجدعنة، وقلت ما ينفعش
أسيب واحد زي رمزي يمشي من غير ما ينوبه من الحب جانب ..
رحت مطبق إيدي في حته بعشرة وقتله:
- شايبك يا أبو رمزي.

راح باصصلي من تحت لتحت (لأنني قصير جداً بالنسبة له)
وقالي:
- أشكرك.

ومشي .. طبعا كان واضح إنه استقل العشرة جنيه .. بس في
داهية .. وهو كان عمل إيه يعني .. دا يا دوب ساق الأتوبيس رايح
جاي .. ولأ يكونش علشان هو اللي مسلف الراجل الفلوس؟
ياقولك إيه يا أسطى (دا أنا بأسأله قبل ما يمشي): هي الجونة
دي بيركبولها إيه من دار السلام أصل عربيتي ما بتروحش
المشاوير دي وفي الغالب هاروح هناك بكرة الصبح علشان
أتعشى مع واحد صاحبي وبافكر ...
رمزي قطع كلامي وهو بيجز على سنانة:
- أنا ها عدي بكرة آخذك ...
ومشي ...

* * *

تاني يوم عدى علي رمزي .. واللي اكتشفت إن اسمه ممدوح ..
وخذني في ساعتين ونص بالليموزين من دار السلام لحد هناك.
طبعا مش هينفع أحكيلكم على اللي شفته من أول ما دخلت

الهبابة دي اللي اسمها الجونة، لأن المصنفات ساعتها ممكن تصادر الكتاب.. لكن كفاية أوي تعرفوا إن الناس هناك عايشين تحت خط الفقر.. آه والله تحت خط الفقر.. يعني الراجل هناك مثلاً لو عنده ٣ بنات بيشتري ليهم بلوزة واحدة ويقصها ٣ حنت: واحدة من بناته تلبس الكُم، وواحدة تلبس الوسط، وواحدة تلبس الرقبة.. تلاقهم يا عين أمهم ماشيين جنبه بيتكتكوا من البرد، وهو ولا فارق معاه.. حتى البنطلون! البنطلون اللي كل واحد فينا عنده ع الأقل خمسة أو ستة في دولابه، عندهم بقه يقسموه بيحجي عشر حنت، وكل بنت ونصيبيها: اللي تلبس فخد، واللي تلبس رُكبة، واللي ما يفضلهاش غير الحزام، واللي ماشية لابسة السوستة على اللحم.. والله العظيم حاجة تقطع القلب! ربنا يرزق عبیده، ويفتحها على الناس كلها قادر يا كريم! أيوه كريم!!

افتكرت أنا جاي هنا علشان موضوع كريم وزينة، أستغفر الله العظيم الواحد ضيِّع نُصَّ اليوم في الفُرجة على البنطلونات، منتهى الاستهتار! بس الحمد لله الواحد علشان نيته سليمة وخايف على لُقمة عيشه ربنا عترني في واد صايح من بتوع الأمن اتضح إنه بلدياتي من شبرا.. ياه! أحلى حاجة في الدنيا إنك تقابل واحد بلدياتك في مكان زي ده.. دلوقتي لو قابلت البت بنت الراجل اللي مشغل ممدوح أقدر أتتك عليها واقولها إني جاي هنا علشان أزور واحد صاحبي.. عادي يعني.. لي واحد صاحبي وعایش

هنا باستمرار.. إيه المشكلة؟ إن كل أصحابي كده ولاد ناس؟ المهم سلّمت عليه: ولّمّا ادبته مواصفات البنت ورقم الشاليه طلع عارفها وجابلي م الآخر، قالي:

- بص يا معلم، خد نصيحتي واحلح من المُرّة دي، أصل أبوها كل يوم والتاني بيعتلها دكتور تمسح باللي جابوه الأرض، وتبهدل أهله، وتفترج عليه الجونة كلها، وما تسيبوش غير لّمّا يعترف إنه مجنون وابن مجنونة.

أنا طبعًا باسمع الكلام ورُكي بتخبّط في بعضها.. بس ازاي أخلع؟ طب وال ٥٠٠ جنيه العربون؟! أبوها طبعًا ساعتها هيّعت رمزي، قصدي زفت ممدوح، يعلقني من قفايا وياخد الفلوس! خلاص بقه طالما كده كده هاتبهدل، يبقى أتبهدل من البت أحسن، واهو أبقى عملت اللي عليّ وأبوها ما يقاش له عين يطلب مني العربون.. بس ازاي هاقابلها وبصفتي مين؟! أصلها لو عرفت إني متخصص وجاي من طرف أبوها أكيد هتمسح بيّ الأرض.. يبقى أكيد لازم أشوفلي طريقة جديدة تدخل عليها.. وده فعلاً اللي حصل.

على حسب كلام بلدياتي بتاع الأمن إنها بتنام طول النهار وتسهر على البحر طول الليل تسكر (أستغفر الله العظيم يارب) وما ترجعش الشاليه غير وش الصبح، علشان كده حمدت ربنا إن أبوها كان حاجزلي أوضة بتطلع الشاليه بتاعها.. بالليل استنيت في الشباك لحد ما سُفتها واحدة إزازه المنكر وماشية ناحية

البلاج، بس قلت برضه الأحسن أسببها ساعة كده ولا ساعتين
تكون عملت دماغ، علشان ما تبقاش مركزة أوي وتكشفي..
وفعلاً بعد ساعة تقريباً اتسحبت ونزلت وراها، وبرغم إن الدنيا
كانت ضلمة على البحر لكن واضح إن شكلي كان مميز جداً،
يمكن لأني الوحيد اللي ما كتش حاضن بنت أو اتنين، علشان
كده لقتها مركزة معايا أوي وخذت بالها مني لما ابتديت أجري
ناحية البحر (آل يعني عايز أنتحر).. الحمد لله الخطة نجحت
ودخلت عليها بسهولة عكس ما كنت متوقّع، ولقيتها في ثانية
جريت ورايا وهي بتقولّي:

- بتعمل إيه يا مجنون؟!!

قُلتها وأنا عامل سكران:

- سيبيني خليّني أخلص من حياتي!!

نفس الحتة بتاعة فيلم غرام وانتقام بالظبط.. قالتلي وهي
بتطوّح زيني:

- ومين سمعك.. ما انا كمان نفسي أنتحر، بس للأسف باعرف

أعوم، يعني مش ممكن هاغرق مهما حاولت!

- طب ما تيجي أكتفك وأحط راسك في الميه لحد ما تغرق،

وبعد كده أسلم نفسي ويعدموني، ونبقى كده ضربنا

عصفورين بحجر واحد!

- تصدّق دي فكرة حلوة فحت! بس أقولك، اعمل معايا

واجب أحلى من كده وخليّني أنا اللي أحط راسك في الميه

لحد ما تغرق، وبعد كده أسلم نفسي ويعدموني، علشان

أبقى ضربت ٣ عصفير بحجر واحد!

- ما عنديش مانع، بس مين العصفور التالت؟

- بابي.. أصل هو السبب في جوازي من الزفت كريم، وأهي

تبقى فرصة أعمله فضيحة!

- طب ومين كريم؟

- يا أخي هو أنت سكران ولا إيه؟! باقولك متجوزاه هيبقى

مين يعني؟! جوز مامي؟!!

- خلاص ما تزعلش.. هاقولك على فكرة أجمد من الاتنين.

- ها.. قولّي!

- هخليكي تضربي ٤ عصفير بحجر واحد مش تلاتة.

- إزاي؟!!

- هتصلي بكريم وتخليه يبجي، ولما يبجي نحط راسه في

الميه لحد ما يغرق، وبعد كده نسلّم نفسنا وتعدم أنا وانتي،

ونبقى كده موّتنا تلاتة وفضحنا واحد، إيه رأيك؟

- تصدّق إنك واد جامد آخر ٣ حاجات.. أنا موافقة.. بس

عندي شرط...

- ها...

- إنت اللي تكلم كريم وتستدرجه، أصلي انا اتطلّقت منه.

- موافق.. بس عندي شرط...

- ها...

- تحكي لي قصتك مع كريم علشان أعرف أشتغله وأخليه
ييجي.

- مااااشي.. بس انا ما باعرفش أحكي.. إنت اسألني
ود جاوبك.. بس لما تلاقيني سافرت منك ابقى شيلني
ورديني اشاليه بتاعي هو رقمه ٣١٣، وما تخافش الأمن
عارف إنني بارجع كل يوم متشالة.. يعني هيفتحلك الشاليه
علطول.

- ماشي.. طب قوليلي اتعرفتي على كريم ازاي وفين؟

- كريم مين؟! أيوه افتكرت.. كريم جوزي.. قصدي اللي
كان جوزي.. باقولك إيه! روح الأوضة بتاعتي هات منها
إزازه فوديكا تاني لاحسن الإزازه اللي معايا بتودّع!

- طب احكي لي بس وانا هاطلبلك إزازه من البار.

- مااااشي.. بص يا سيدي.. أنا كنت كل يوم باسهر مع
أصحابي في مكان كده اسمه «شاتس».. تعرفه؟
تقريباً حضرت فيه مرّة عقيقة واحد صاحبي.

- عقيقة؟! طب اسمع.. أنا في يوم كده اسود مهيب لقيت
«محمد» صاحب صاحبتني «هنا» داخل علينا وفي إيد
الحيوان كريم، وكنت أول مرّة أشوفه.

- بصراحة كريم كان شكله موز وبودي بيلد وكده.. أصله
كان بيلعب كيك بوكسينج.. ومحمد جنبه كان شكله عيّل
سيس.. طبعا كل الشلة عينيهم زاغت على كريم، بس

انا شخبطت فيهم وقتلهم الواد ده م الآخر بتاعي.. المهم
قعدنا نتكلم شوية لقيت دمه خفيف موت وزى السكر،
لدرجة إنه خلانا كلنا نسخسخ على روحنا من الضحك..
طبعا علطول أخذت الأكونت بتاعه وسهرنا طول الليل
نشيت.

بس اللي عجبني أكثر وخلاني أطمئنله بسرعة إنني لقيت
بينه وبينني ١٥٠ كومن فريند.. تخيل؟! كمان كان فيه ميزة
هايلة: كان أبيح زي حالاتي ومش بيتكسف ولا ييمثل..
يعني صريح وما عندوش وقت للأفلام.. أنا كده برضه.. قالي
تيجي نسافر بكره السخنة مع بعض؟ قتلته إشطة نسافر بس
هننزل فين؟ قالي هاخذ مفتاح فيلا بتاعة ماجد السمنهاري
صاحبي.. عارفاه؟ قتلته أيوه طبعا عارفاه ورحت معاه الفيلا
دي قبل كده.. بس بلاش دي أصلي باتشائم منها، لقيت
صوته اتغير كده في الاسكايب.. فهمت علطول إنه عامل
بيغير.. قتلته باقولك إيه فكك من الجو ده.. أنا ما باحبش
حد يسألني عن أي حاجة في حياتي قبل ما أعرفه.. إشطة؟
قالي إشطة سلام.. سلام.. طبعا قبل ما أنام كانت الشلة كلها
عرفت إن زينة ظبطت كريم.. والصبح خدنا ميّتنا ودماغنا
وطلعناع الجونة.

- طلعتوا مع بعض لوحدكو! ما شاء الله! وبعدين إيه ميتكو
ودماغكو.. تقصدي يعني الركت والمضارب؟

- يا أخي إنت مبيح أوي!! ميتنا ودماغنا يعني درينكنا وحشيشنا!

- هوّ انا فهمت الأولانية علشان افهم الثانية!!

- يوووووه.. يا أخي يعني الفوديكما والحشيش.. فهمت بقّه..

إنت قفل للدرجة دي!!

- أيوه فهمت.. طب ما تقولي كده م الصُبح.. الفوديكما

والحشيش.. ما هو طبيعي أمّال هتسافروا ازاي يعني من

غير الأدوات دي.. اتفضلي كمّلي.

- بس يا سيدي، وصلنا هناك طبعًا مهدودين، وكل واحد

دخل أوضته ينام.

- أستغفر الله العظيم.. إن بعض الظنّ إثم.. تخيلي افكر تكوا

حجزتوا أوضة واحدة!

- لا طبعًا.. إزاي كنت هانام معاه في أوضة واحدة وانا لسه

ما اعرفش أخلاقه!؟

- أفندم!! طب كمّلي يا اختي!

- صحينا بالليل ونزلنا على البيتش وقعدنا نسكر ونرقص

لحد ما بقينا طينة، وراحت طالبة معايا عياط.. أصل أنا

كده لما اسكر أعيط وأقلبها نكد، قالي مالك يا زينة.. قُلتله

مفيش بس مخنوقة شوية.. قالي طب تعالي نتمشى شوية

ع البيتش علشان تفوقي.. شوية وحط إيداه على شعري

وراح بايسني بوسة إنما إيه جامدة فحت!

- فحت تاني!! هو انتي كل حياتك فحت كده!!؟

- يا أخي مش باقولك كنت سكرانة! إنت ما بتفهمش!؟ لكن

تصدّق، تاني يوم لمّا صحيت من النوم زعلت من نفسي

أوي وقعدت أعيط.

- تأنيب ضمير بقّه أكيد!

- يعني إيه!؟

- لا ما تاخذيش في بالك.. كمّلي.

- بالليل بقّه لمّا جه ياخدني تاني علشان نسهر، قُلتله باقولك

إيه يا كريم، أنا مش عارفة ازاي عملت كده امبارح، ومش

هينفع أخرج معاك تاني، علشان بصراحة باضعف ومش

باقدر أمسك نفسي، راح واخدني في حضنه وقالي صدّقيني

مش هاقول لحد، وبعدين أوعدك احنا هنفضل مع بعض

علطول.. قُلتله طب إشطة يلاً بينا.. اليوم ده بقّه سكرت

أوي، ولمّا وصلني الأوضة حلف إنه مش هيسينيني غير

لمّا اروح في النوم علشان يطمن عليّ.

- مش هيسيبك غير لمّا تروحي في النوم!؟ وطبعًا انتي سكرانة

طينة والشيطان شاطر.. وكريم أشطر من اللي جابوه!

- هههه.. تصدّق دمك سُكر!

- هههه.. تصدّقني انك حرقتي دمي.. كمّلي كمّلي.. خليّنا

نقوم ننام الفجر خلاص هياذن.

- فجر إيه!؟

- فجر إيه!! فجر الإسلام.. كمّلي يا فالحة!

- لَمَّا رجعنا القاهرة بَقَّه، حكيت لمامي اللي حصل وقُلتها
إنه ولد محترم ومهذب جدًا.

- طب دي أفهمها ازاي بقَّه؟! منين حكيتي لمامي اللي
حصل، ومنين محترم ومهذب؟! إنتي هتجنيني!

- مش باقولك أنت قفل وشكلك كده هتفوقني! اجري هاتلي
الإزاة علشان أعرف أكمل.

- حاضر.. الهبابة جاية في السكة.. كملي.

- طب هاقولك المُلخص على السريع علشان تعبت.. مامي
حكيت لبابي. وبابي سأل عليه، ولمَّا عرف إن باباه وزير

سابق وعضو مجلس شعب حالي اتأكد إنه مش طمعان
فيينا ووافق علطول.

- يا دين النبي!! وزير سابق وعضو مجلس شعب حالي؟! ده
على كده عريس لُقطة! بصراحة ليكي حق تعتبره مهذب

ومحترم! أمال مين يعني اللي هيتقال عليه مهذب ومحترم!!
- عريس لُقطة إيه! دا هوّ وأبوه كانوا بالنسبة لبابي شحّاتين!

- ليه إن شاء الله؟! أبو سيادتك بيشتغل إيه؟!!

- بابي من أكبر رجال الأعمال في مصر، بيتاجر في السلاح
والمخدرات والآثار، يعني احنا أغنى منهم ميت مرّة.

- ما شاء الله.. باباكي تاجر سلاح ومخدرات وآثار؟!
بتقولها بفخر كده وكأنه تاجر بقوليات؟! إنتي مش خايفة

حد يسمعك ويروح يقبض عليه?!!

- يا حبيبي بابي محدش يقدر يقبض عليه! ده معاه فلوس..
يعني حصانة.

- فلوس يعني حصانة!! عندك حق.. طب كملي.

- إحنا وصلنا لفين؟

- لحد الحصانة.. قصدي لحد ما أبو كي وافق عليه علطول.

- أيوه افتكرت.. بعد كده زارنا هوّ وباباه وماسته وحددنا معاد
حفلة خطوبة على الضيق.

- على الضيق ليه حضرتك؟! كنتوا خايفين من العين لا سمح
الله؟! وبعدين كان إيه المانع تعملوا حفلة محترمة في دار

زّي الأسلحة والذخيرة؟! كان هيكلفه كام يعني لو عزمتموا
ميتين فرد (هاي تي) ولّا انتو بتيجوا عند الحاجات المهمة

وتبخلوا؟!!

- يا أخي أسلحة وذخيرة إيه؟! هو احنا هنحارب؟! إحنا عملنا
رسيشن في الجي ديو ماريوت وعزما عيلتي وعيلته،

وبالليل أصحابنا حجزولنا سهرة في «التامراي» واتعشنا
وسكرنا.

- برضه سكرتوا!! ده بدل ما تحمدوا ربنا على ليلة زي دي؟!
قوليلي صحيح هوّ كريم خريج إيه؟

- كريم خريج الأكاديمية البحرية.

- وانتي؟

- لاااا.. أنا لفيت كتير.. أول جامعة دخلتها كانت «MSA»،

بعد كده اتخنقت منها وقدمت في الـ «AUC»، شوية ولقيتها
لمت شباب بيته، رُحت ناقله على الـ «MIU»، لكن لقيتها
صعبة أوي، رُحت محوولة على «FUE»، لكن في الآخر
خااa

- طب ليه ما فكّر تيش تقدمي في «MKE»؟

- دي جامعة عندنا في مصر ولا تقصد بره؟!

- لا والله في مصر.. بس هي مش جامعة أوي يعني.

- أمال إيه؟

- دي يا ستي مختصر «المعهد العالي للخدمة الاجتماعية»

بالقصر العيني!

- المعهد ده تدخله انت يا فاشل!

- أنا اللي فاشل برضه؟! دا انتي غيرتي ١٢ جامعة في ٤ سنين

وتلاقيهم في الآخر رفلدوكي!!

- هههه.. أنا يرفلونني؟! دا بابي كان قفلهم الجامعة! يا حبيبي

أنا اتخرّجت بامتياز!

- إنتي اللي اتخرّجتني بامتياز ولّا أبوكي؟! كملي كملي

يا فالحه!

- أهو انت اللي فالح! خلّصني عايز تعرف إيه تاني؟

- أبوكي بعد الخطوبة كان يسمح لكريم يزوركم عادي،

ولّا كان بيشرط عليه يبجي يوم الجمعة وكده يعني؟

- إشمعني يوم الجمعة؟!

- علشان أبوكي يكون أجازة وكريم يلاقي راجل يقعد معاه.

- تقصد مين «بالراجل»؟! حافظ على كلامك من فذلك!!

- أحافظ على كلامي ازاي يعني؟! هو انتو عندكو كلمة

«راجل» دي عيب؟! طب انا آسف! أقصد علشان يلاقي

حريم يقعد معاهم!

- اخررررس!! حريم في عينك! إحنا ما عندناش حريم في

بيتنا!

- أمال لّمّا الباب بيخبّط مين ييفتح؟ هههه.. باستخف دمي..

قوليلي بقّه كنتوا بتخرجوا مع بعض كثير؟

- طبعًا.. كل يوم.. وكنا بنسهر كمان.. مش لازم نعرف بعضينا

ولّا إيه؟

- وأبوكي ما كانش بيعترض على السهر ده؟ أكيد كان بيوصّلك

والجيران بيشوفوكوا راجعين وش الفجر!

- لااa

- بيات عندكو في البيت؟! دا واضح إن باباكي كان مُتشدد

جدّا!!

- بابي؟! وانت بتقول فيها!! ده كان مُتشدد جدّا جدّا.. تصدّق

إنه كان بيرفض إن كريم بيات معايا في أوضتي!!

- بتكلمي جدّا؟!!!!!!!

- آه والله.. كذا مرّة رفض.

- يا شيخة قولي كده.. كذا مرّة رفض.. يعني مش كل مرّة كان

بيرفض.. خضتيني الله يسامحك، كنت هاخذ فكرة غلط
 عن أبوكي.. ها وعملتوا الخطوبة فين على كده؟
 - لا ما عملناش خطوبة زي ما انت فاكر.. دا حسام ابن عمي
 عزمنا عنده في «سهل حشيش».. ولبسنا الدبلة هناك..
 دا حتى كريم ما جاش يوميهها وراحت عليه نومة وحسام
 اللي لبسهالي.
 - حسام اللي لبسك الدبلة؟
 - طب وفيها إيه؟ ما هو حسام أنتيم كريم أسلا.
 - ربنا يخليكوا لبعض.. طب بالنسبة للدخلة كريم جه
 ولأ راحت عنيه نومة برضه وحسام اللي...؟!
 - لااااا.. الدخلة دي كانت حكاية.. تعرف؟ بابا كريم كان
 عايز يعمل الفرح علطول، لكن أنا وكريم صممنا تأجيله
 للصيف علشان نعمله في السخنة، ويكون الصبح على
 البيتش، علشان نلبس أبيض في أبيض من غير حاجة في
 رجلينا.. حافيين يعني.. بس بجد كان يوم تُحفة تُحفة..
 وتعرف قضينا «الهاني مون» فين كمان؟
 - «الهاني مول».. اللي هو شهر العسل.. صح؟ مش معقول
 طبعا هتكونوا قضيتوه في راس البر أو بلطيم، أو حتى في
 جمصة.. أكيد ناس في مستواكم هيحجزوا على الأقل
 أسبوعين في مرسى مطروح!
 - اتنيل!!

- اتنيل!! يبقى أكيد في مارينا.. ما انتو عالم مفترية!!
 - مارينا دي تتفسح فيها انت واصحابك يا بيته!
 - أيوه استهيلي استهيلي.. مارينا بيته؟! طب دا انا اتمسكت
 ٣ مرات وانا باحاول أدخلها!
 - يا حبيبي دا أونكل مراد بابا كريم كان عايزنا نروح «تايلند»
 بس مامي رفضت وقالتله يا مراد باشا دا السواق بتاع زودي
 (إلي هي أنا) بيصيف في تايلند.. قالها يا هانم أصل كوكي
 (إلي هو كريم يعني) بيحب يسافرهما كل سنة.. راحت مامي
 رافعة حاجينها وردت عليه وقالتله يبقى يسافرهما لوحده!
 وكلمة منها وكلمة منه كانت الجواز هتتووظ.
 - أكيد في الآخر رسيتموا على كوكب عطارد.. مش كده؟!
 - الله.. عطارد.. ما جتش في بالي خالص!
 - ملحوقة يا زودي.. في الجواز الجاية إن شاء الله تبقي
 تروحيها.. خلصيني قضيتوه فين في الآخر؟
 - قضينا أسبوعين في «بالي أيلاند» في إندونيسيا، وأسبوعين
 في «ميكونس» في اليونان.
 - يا نور النبي!! أسبوعين في بالي وأسبوعين في ميكونس..
 دا انا لما باصيف في اسماعيلية بارجع أقطع كل أصحابي
 واتفك على اللي جابوهم!
 - إهه.. إهه..
 - إيه بتعيطي ليه يا زينة بس؟

- أبدًا.. أصلها طلبت معايا عياط.. وكمان افكرت الخاين كريم..
تخيّل لَمَّا رجعنا من «الهاني مون» كان بابي لسه بيشتب في
ديكور الفيلا بتاعتنا في «المونتم فيو» قام كريم رفض تقعد مع
مامي، وطلبت معاه نروح شاليه عمتمو في «هاسيندا باي» اللي
في سيدي عبد الرحمن.

- الله أكبر! سيدي عبد الرحمن! ما انتو عندكو مشايخ زينا
أهو.. شي الله يا سيد يا بدوي.

- هههه.. تصدّق إنك ضحككتني وانا باعيط!

- ربنا يضحكك علطول.. بس ما قُلتيش ليه بتقولي على
كريم خاين؟

- ما انا ها حكيك.. أصل في يوم كده واحنا في الشاليه لقيت
أصحابنا طَبُّوا علينا لَمَّا عرفوا اننا رجعنا من «الهاني مون»
وقالوا يعملوهلنا مفاجأة.. لكن كريم كانت طالبة معاه نوم،
قالنا انزلوا اسهروا انتو وانا هانام.. سهرنا وسكرنا ورقصنا،
والصُبح وصلوني ورجعوا ع القاهرة، لكن لَمَّا دخلت
الأوضة لقيته نايم والموبايل جنبه، بابص لقيت رسالة
على «الواتس أب»، بافتحها لقيته عامل حوار مع «سالي»
أنيمته، حوار في منتهى القذاره زي: «واحشاني يا سوسة..
وواحشني بُقك.. وعايز أشوفك ونعمل...».. واتفقوا على
معاد بالليل عندها في الشاليه اللي جنبنا، اللي هو أصلًا بتاع
صاحبها.. أنا طبعًا ما زعلتس في الأول لأنني كنت واثقة

إن كريم أَدَامَه وقت علشان يتغيّر، وهو بصراحة كان طالب
مني فرصة سنة علشان يحاول.. لكن اللي عصّني إن سالي
دي أصلًا بنت شمال وكلنا عارفينها.. ده غير انها بتكرهني
وبتغير مني موووت...

أنا يوميهما قلت انام واعمل عبيطة وتاني يوم اتسحب واطب
عليهم في الشاليه، وفعلاً دخلت لقيتهم على السرير مع
بعض، رُحت ماسحة بيهم الأرض.. كريم طبعًا قعد يستهبل
زي كل مرّة ويقول لي انتي مخك راح لفين، دي صاحبتني،
وانتي ما بقيتيش واثقة فيّ ولا في نفسك، وكلام كده عبيط..
أنا طبعًا انتهزتها فرصة وقتله خلاص يا كريم من النهارده
كل واحد حر في حياته يعمل اللي هو عايزه، وما تسألنيش
بعد كده رايحة فين ولا جاية مين.. وفعلاً اتفقنا على
كده.. بس برضه كريم طلع عيّل وما رضيش يسييني أعمل
اللي انا عايزاه.. ده غير فضايحه اللي كنت باكتشفها كل
يوم والتاني.. والمشكلة الأكبر بقّه إنه ابتدى يغير عليّ..
يعني مجرد ما شافني في الفيلا عند رامي صاحبه - مع إن
رامي صاحبنا احنا الاتنين - قلب الدنيا، وحلف ليتصل
ببابي ويحكيه.. قُلتله يا كريم هو احنا من إمتي بنفتن على
بعض.. قالي خلاص هي طلبت معايا كده.. قُلتله ماشي
وانا كمان هاتصل بأبوك واقوله على كل حاجة.. واتفقنا
نقلب التراييزة.. وفعلاً انصلت بأونكل مراد، وبصراحة

زعل جدًا وقاله يا كريم ابعثلي الحيوانة سالي وانا هاعرف
اتصرف معاها!! كمان كريم اتصل بابي وحكائه، لكن بابي
حاول يهديه، بس لما لقاها متعصب وعاش الدور قاله طب
يا فالح رجعلها العربية الجاجوار اللي جابتهالك في عيد
ميلادك السنة اللي فاتت!

طبعًا كريم لمّا سمع كده راح جايب ورا علطول، بس
انا بقّه كنت اتعصبت اكثر، رحت واخذة الموبايل منه
وقلت لبابي لو سمحت يا بابي ما تتدخلش في حياتي، أنا
دلوقتي بنت متجوزة وكمان ليّ جوز.. أنا أعرف أريه..
وقفلت في وشه السكة.. وحلفت على كريم لازم يطلقني
ويرمي عليّ اليمينات كلها.. ولمّا رفض يطلقني رحت
خلعاه وقتلته في داهية!

- يا سلام... حمد الله ع السلامة.. أكيد كانت رحلة جميلة..
يارب تكوني اتبسطي؟!!

- أتبسط إيه وزفت إيه؟! دا الحيوان ضيّع عليّ على الأقل
خمس رحلات مع أصحابي!

- ولا يهّمك بكرة تتعوض.. مع جوز تاني.. أو صاحب تاني..
وإيه المشكلة ما هي حياتك وانتي حرة فيها؟! وفلوس
أبوكي وهو حر فيها! إوعوا تسمحوا لحد يقيدكم بقوانين
أو أعراف أو حتى دين! الحاجات دي خانقة!

- إنت بتتريق؟! تصدّق إني غلطانة إني حكيتلك.. يلاً بقّه

وصّلني أوضتي! وعازية لمّا اصحى بكرة ما افتكرش أي
حاجة عنك ولا أشوفك تاني!

- عندك حق.. إنتي أكيد أكثر حاجة محتاجاها دلوقتي إنك
تتسيني.. وعارف إن زرار «الدليلت» أسهل أوبشن في
حياتك.

- باقولك إيه.. وحياتك انا ما عنديش دماغ اسمع نصايح من
حد.. ويلاً بقّه نروح علشان ابتديت أفوق!

- إنتي فعلاً محتاجة تفوقي.. بس مش النهارده بس.. إنتي
محتاجة تفوقي علطول.. كفاية بقّه استهتار بحياتك
وشبابك!!

- أيوااان.. إنت كده بقّه بتفوقني وش، وبعدين انت مالك
قلبتها جد ليه كده؟! ما انت كنت روش ولذيذ!

مش عارف ليه في لحظة حسيت إني خرجت عن وعيي..
وابتديت أنفعل على زينة.. مسكتها من كتفها وهزتها بمتتهى
القسوة وانا باقولها إنتي لازم تفوقي.. لازم تفوقي.. مش عارف
إيه اللي حرّكني وخلّاني انفعلت كده! يا ترى ضميري المهني
اللي اعتبر زينة حالة ودوري إني أعالجها؟! ولا يمكن حاجة
جوايا بتقولّي إن زينة لازم تفوق علشان تشوفني بجد؟!!

- زينة فوقي!! إنتي لازم تفوقي دلوقتي!
- يوه.. عايز مني إيه؟! يا أخي مش عازية أفوق! إنت مالك
بي؟! يلاً امشي من هنا!

- ما بقاش ينفع أمشي يا زينة.. أرجوكي ارجعي الشاليه
اغسلي وشك وحضري شنطتك.. أنا لازم أوصلك لابوكي
النهارده!

- توصلني لبابي؟! ليه إن شاء الله؟! بصفتك مين؟
- بصفتي بني آدم.. وشايف بني آدمه بتفرق أدامي ودوري
أنقذها!

- لا ميرسي أوي!! أنا مش محتاجة حد ينقذني! ولا محتاجة
أشوف أو أكلم حد بعد النهارده! أنا خلاص قررت أعيش
مع نفسي وافضل سكرانة طول عمري!! بلا أمشي.. مش
عايزة أشوفك انت كمان.

- بجديا ريت كان ينفع.. أنا لا يمكن اشوف جريمة زي دي عيش
واسكت، أنا هارجعك لابوكي حتى ولو غضب عنك.

- جريمة!! بس أنا ما عملتش جريمة! أنا ما اعرفش أصلاً
إذا كان اللي باعمله ده غلط ولأصح! وانا هاعرف مين
يعني؟! طب ما كل اللي حواليا بيعملوا كده، وبابي عمره
ما قالي على حاجة غلط ولا حتى مامي.. بابي دايمًا يديني
فلوس كتير علشان مش فاضي يتكلم معايا، وكأنه بيديني
رشوة علشان أسكت وما اسألوش إنت ليه دايمًا بعيد عننا..
ومامي كمان دايمًا تقولي اعلمي كل حاجة نفسك فيها،
غلط أو صح، بس لازم في الآخر تحكي لي اللي بتعمله..
وباحكيلها.. وبتفرح كأنها بتعوض شبابها اللي ما عاشتهوش

في.. كنت ساعات باحس انها بتخاف تمنعني من حاجة
غلط لاحسن أبطل أحكيلها.. كأن الهدف هو إني أحكيلها
بس.. أنا بجد تعبانة أوي! أرجوك دخلني أوضتي!
- أنا مش مصدق!! إنتي إيه اللي قلتيه ده؟! إنتي كلامك بقى
موزون جدًّا وكأنك اتبدلتي في لحظة.. ولأ يمكن انا اللي
ما كنتش فاهمك؟

- أيوه انت اللي ما كنتش فاهمني.. بس انا كنت فاهماك،
وعارفة من الأول إن بابي اللي باعتك، بس عجبتي طريقتك
الجديدة، وقلت امشي معاك يمكن تكون غير اللي بعتهم
قبل كده.. وفاهمة من أول لحظة إنك بتعاملني على إني
تافهة وفاضية وعبيطة، زي ما بابي بيعاملني بالظبط، وزي
ما فهمك عني.. صح؟

- يعني أنتي اللي كتي بتاخديني على أد عقلي!! وعلى كده
ما كنتيش سكرانة؟

- أنا باسكر بمزاجي وأفوق بمزاجي.. هههه.. خلاص
اتعودت.. طول عمري باشرب من وانا طفلة، واقولك
كمان... عارفة إنك واخذ فلوس من بابي علشان تيجي
تعالجني على أساس إني مجنونة.. وعلى فكرة ما عنديش
مانع.. ده لو تحب.. أعمل نفسي اتعالجت واكلّم بابي علشان
يديك فلوس تاني.. سُفت انا طيبة ازاي؟

- زينة.. أنا متأسف! أول مرّة أحس إني مش فاهم! واضح

إن دراسة النبي آدمين بشكل نظري مش كفاية! أرجوكي
سامحيني! أنا اتريقت عليكى كثير وقللت منك، لكن
أنا واثق دلرقتي إنك بني آدمة جميلة من جواكي! بس
نفسى أفهم انتي ليه سمحتي لنفسك وللي حواليكى إنهم
يوصلوكي للنهاية دي؟! كمان مش فاهم ازاي ابوكى يرضى
انك تصاحبى شرعى تحت مسمى الجواز!؟

- إنت عايز تقولى ان فيه حد بيختار حياته أو نهايته؟! يعني
انت شخصياً اخترت حياتك؟ أتحداك.. إحنا كلنا بيتفرض
علينا أهلنا وبيتنا وطريقة حياتنا.. فيه مننا اللي بيرفضها،
وفيه مننا اللي بيحاول يغيرها، وفيه مننا اللي بيرضى بيها
ويريح دماغه.. وانا لقيت الأسهل إنى أرضى بيها وأريح
دماغي.

- طب وأديكي رضيتي بيها.. كانت إيه النتيجة؟
- مالها النتيجة؟! حبيت واتجوزت واتطلقت، وممكن أحب
تاني، وممكن اتجوز تاني وتالت، وممكن اتطلق، وممكن
أعيش حياتي من غير حد.. إيه المشكلة؟
- بس دي مش حياة!! وليه لَمَّا انتي فاهمة كده وناضجة
للدرجة دي، ما تختاريش حد محترم وعاقل وناضج زيك
علشان على الأقل يحتويكي ويحافظ عليكى؟
- طب باقولك إيه؟ ما تيجي تضرب ورقتين انا وانت؟
- تضربهم ازاي يعني!؟

- تضربهم كده.. تده..

وقعدت تضربني على كتفي بإيديها الرقيقة لحد ما فاقت
وراحت على أوضتها، وسابتني سكران...

* * *

وكالعادة، قعدت للفجر أسمع أغنية: موعود... وتاني تاني
راجعين انا وانت تاني... ولَمَّا طلع النهار عدت عليها لقيت
باب أوضتها مفتوح، وشفتها لتاني مرة، بس وهى غرقانة في
النوم، كانت زي الملايكة، ما رضيتش أصحيتها ورجعت على
أوضتي، وحاولت انام وما عرفتش، وفي نفس التوقيت على
الساعة ٦ المغرب تقريباً شفتها وهى ماشية ناحية البحر، نزلت
جري وراها:

- مدام زينة.. مدام زينة.

- هو أنت لسه ما سافرتش؟! مش قُلتك عايزة لَمَّا اصحى

بُكره أنسى اني عرفتك!؟

- أيوه.. بس احنا لسه ما كملناش كلامنا.

- عايز نتكلم في إيه تاني؟ ما انت عرفت كل حاجة عني،

واتأكدت إنى مش مجنونة ولا مريضة نفسياً.. يعني مش

محتاجة علاجك!

- عندك حق.. طب يا ريت لو سمحتي تدي الفلوس دي

لباباكي وتعذريله! ويا ريت كمان تقبلي اعتذارى عن كل

حاجة سخيفة عملتها معاكى!

- ومين قالك انك كنت سخيّف؟! بالعكس.. أنا بقالي كثير
ما استريحتش لحد وحكيتله كل حاجة عن نفسي كده.

- بجد.. يعني انتي مش متضايقه مني؟

- أبداً.. وأكبر دليل إني عازمك النهارده على العشا.. تيجي؟
وفعلاً، اتعشنا يومئذ مع بعض، واليوم اللي بعده، واللي
بعده، واللي بعده... أسبوع كامل قضيناه مع بعض.. كل يوم
كنا بنقرب من بعض أكثر.. كل يوم كنا بنحس ببعض أكثر..
زينه كانت شفاقة أوي.. كنت شايف بسهولة الإنسان الطيب
اللي جوّاه.. وهي كمان، كانت دائماً تقولي اني طيب أوي
وحنين جداً.. اتولدت جوّانا وفي نفس التوقيت مشاعر الاحتياج،
وكأننا اتنين واقعين على الأرض من غير دراعات وكل واحد فينا
محتاج للثاني علشان يسند عليه ويقوم.. ياااه!! كانت فين زينه
من زمان؟! الواحد كان حاسس إن كل حاجة جوّاه اتجمّدت!
زينه بصدقها وحرارة مشاعرها صهرت كل الجليد اللي كان
جوّاه، زينه بشبابها وخفة دمها قتلت الشيخوخة اللي كانت
ابتدت تتسرب لملامي.. أنا حاسس اني باتولد في عينيها..
أنا تقريباً ابتديت أحبها.. أنا فعلاً بأحبها!!

- زينه.. أنا بحبك!

- وأنا كمان!

- ياااه!! علطول كده؟! وأنا كمان! دا انتي واقعة بقه.. هههه!!
طب قولي مثلاً: هافكر.. إديني فرصة... كده يعني زي أي بنت!

- هههه.. يا عم فُكك.. إحنا لسه هنا فلم.. يلاً اجري كلم
بابي.. ولأ اقولك استنى.

- إيه مالك؟! إوعي تكوني ناوية ترجعي في كلامك.

- بصراحة.. بصراحة.. أيوه.

- إنتي بتتكلمي جد ولا بتهزري؟!!

- طب اقولك بصراحة وما تزعلش؟

- لأ قولي مش هازعل.

- هو انت يعني روش ولذيذ ودماعك عاجباني.. بس خايفة
تطلع بيته وشحات ومش لاقى تاكل وتقولي نبتدي من الصفر
وكده يعني!

- طب ممكن اعرف ليه افترضتي كده؟

- لا يعني.. أصل كلامك عن بلطيم وجمصة والحاجات دي...

وكمان استغرابك من طريقة حياتي... بصراحة حاجات

تقلق.. ده غير إنك كاتب، وأكيد دخلك بسيط!

- لا يا حبيبتني اطمّني.. أنا مش بيته خالص، وأنا عمري ما رُحت

لا بلطيم ولا جمصة، ولا الحتت البيته دي.. أنا دائماً باصيف

إما في راس البر وإما في فايد.. وبالنسبة لمستوايا الاجتماعي

فحطّي في بطنك بطيخة صيفي.. أنا يا روح قلبي وبلا فخر

من عيلة كبيرة جداً، يعني أكثر من ٢٠٠ فرد، وابويا من أكبر

نجارين المسلح في البلد، وخيلاني وعمامي أقل واحد فيهم

كهربائي سلسيون أد الدنيا، وأمّي كمان من غير حسد يعني

وارثة عن ابوها نُص بيت في الخصوص ونُص بيت في المرج،
وكنا ناويين ندفع مبلغ لرئيس الحي ونفتحهم على بعض
بس اكتشفنا إن النصيين يمين، بس ممكن نسكن بينهم لو
حييتي.. إيه رأيك بقّه؟

- إيهاب.. أنا هيغمي عليّ.. الحقني!

- يا دي المصيبة!! يا حبييتي فوقتي.. والله باهزر! أعمل إيه
في نفسي بس؟! ما باعرفش اقول كلمتين جد على بعض،
ولو ما لقتش حد أتريق عليه بأتريق على نفسي! أنا كنت فاكر
انك خلاص اتعودتي على طريقتي في الكلام!

- يعني برضه الكلام الأخراني ده هزار؟

- أيوه والله العظيم باهزر.. هو أنا لو كنت بالظروف دي كنت
هاقدم ملك ازاي؟ يا ستي والله أنا ابن ناس محترمين، ومن
عيلة كويسة، ومستورين جداً.. وإن شاء الله هاقدر أعيشك
في مستوى كويس يليق بيكي وبّي.. بس سيك انتي، باموت
فيكي وانت مخصووضة!

- ياااه!! أحلى حاجة الجملة الأخيرة دي: «باموت فيكي
وانتي مخصووضة».. أنا بقّه اللي باموت في الرجل
الرومانسي الحنين بتاع الستينيات ده.

- هههه.. إنتي بجد تحفة! وأنا بقّه هاوريكي الرومانسية اللي
على أصولها.. يا هانم انتي هتجوزي فنان وكاتب.. يعني
هاوريكي حب وكلام حلو.

- آه بجد يا إيهاب.. لاحسن أنا كنت محرومة من الرومانسية
والكلام الحلو مع الحيوان كريم!

- وبعدين... مش قلنا مش هنجيب سيرة كريم تاني؟!
- الله.. باموت فيك.. أنا باحب أوي الراجل اللي يغير
عليّ.. إنت مش ممكن!! كل حاجة فيك لذيدة! رومانسي،
ودماغك جامدة، وكمان بتغير.. دا أنا هاتجوزك وش..
يلاً اطلب بابي.. خليه يجيلنا.

- طيب.. هاشحن كارت بـ ١٠ واكلمه علطول.

- مش باقولك بيثة.. يا واد يلاً كلمة مفيش وقت!

* * *

ممت زينة ورجعت على الأوضة علشان آخذ حمام وبعد كده
أبقي اطلب باباها.. ما كتتش عارف هابتديله ازاي وهاقوله إيه..
يا ترى هينفع اقولُه كل حاجة عن نفسي؟! ما اعتقدش.. لكن قبل
ما امسك الموبايل واطلبه لقيت الموبايل بيرن.. لا مش باباها..
دا حد تاني خالص.. حد ما كلّمنيش ولا كلّمته من أسبوعين.

- ألو.. أيوه يا حبيبي واحشني.. كده يا هوبة أسبوعين
ما اعرفش حاجة عنك؟

- ألو.. أيوه يا حبييتي إيه أخبارك؟ وحشتيني أوي.

- لو كنت وحشتك كنت طلبتني! بس خلاص أنا مش زعلانة..
أكيد كنت مشغول.

- آه والله يا «ريري» كنت مشغول جداً.

- الله يكون في عونك يا حبيبي.. بس يا رب تكون اتوفقت
مع الفوج الخليجي.

- فوج إيه؟ أيوه أيوه.. الفوج الخليجي.. طبعًا الحمد لله..
اتعاقدنا معاهم وهنوزع المجلة عندهم بانتظام كل شهر.
- طب الحمد لله.. ألف مبروك يا حبيبي.. والله دابمًا كنت
بادعيلك.

- ربنا يخليكي يا روجي.. بس إيه الدوشة اللي جنبك دي؟
- يا حبيبي دي شادية بتغني في التليفجن.

- هههه.. أكيد بتغني «سينا رجعت كاملة لينا»!

- لا.. دي بتغني «وخايفة لَمَّا تسافر، على البلد الغريب..
تنسى إنك فايت في بلدك حبيب».

- وبعدين.. ليه التلثيح ده؟! إنتي لسه بتشكي في؟!
- لا.. أشك فيك ازاي؟! وانت وش كده برضه! دي الأغنية
شغالة بالصدفة.

- صدفة؟! طب طمّيني «عائشة» عاملة إيه؟

- اسكت يا إيهاب.. دي ورّتني امبارح ليلة!! لحد الفجر
والحرارة مش عايزة تنزل، وعمّالة تتوجع وتقول عايزة
بابا عايزة بابا، ودكتور أسامة الله يكرمه جالها الصبح قبل
ما يروح المستشفى وأداها حقنة مضاد حيوي ٥٠٠..
تخيل؟!!

- يا حبيبة قلبي!! طب ليه ما اتصلتيش بي؟!!

- يا حبيبي يعني كنت هاقلقك ع الفاضي؟! وبعدين انت في
الغردقة وما كانش هيتفع تنزل.

- لا طبعًا كنت هانزل.. بس هيّ عاملة إيه دلوقتي؟
- الحمد لله بقت أحسن كثير، بس مش عايزة تاكل.. تاخذ
تكلّمها؟

- طبعًا.. اديهانني.

- ألو بابي.. إنت فين؟ هتيجي إمتي؟

- يا أووشة.. وحشتي بابي أوي! إنتي ليه مش بتاكلي مَم؟
- علشان عندي واوا! والدكتور اداني حوّنة!

- ألف سلامة يا عمري! إن شا الله بابا وانتي لأ.. أجيبلك إيه
معايا وانا جاي؟

- هاتلي عروسة ومرشميلو وبطوط.

- حاضر يا حبيبي.. بس انتي تاكلي كويس.. يلا اديني ماما
علشان اكلّمها.

- أيوه يا ريهام.. البنت صوتها فعلاً تعبان.. تابعي المضاد
الحيوي وطمّيني كل شوية عليها.

- حاضر يا حبيبي.. ما تقلقش نفسك انت بس وركّز في
شُغلك.

- طيب يا حبيبي.. أنا هارجع آخر الأسبوع بإذن الله.. مش
عايزة حاجة أجيبها لك؟

- هاتلي إيهاب.

- هههه.. حاضر.. هاجييهو لك.. مش عايزة حاجة تاني؟
- تيجي بالسلامة وخلي بالك من نفسك.. لا إله إلا الله.
- محمدا رسول الله.. سلام.

أيوه! هي دي المكالمة اللي كنت خايف منها! جت في توقيتها بالظبط! ساعات باحس إن ريهام مراقباني من كتر ما بتتصل في الأوقات المناسبة، ولأ يمكن هي دي الحاسة السادسة عند الزوجة؟! أكيد.. وأكيد كمان الحاسة دي معدومة عند الرجال وبالذات عندي، علشان لو كانت عندي كنت هاحس بعائشة وهي بتتألم وتنادي عليّ الفجر، أو على الأقل كنت هاحس بريهام وهي بتترعش جنبها من الخوف والقلق في نفس الوقت اللي كنت باترعش فيه جنب زينة، بس من الرغبة واللهفة!! ياااه! إيه القرف ده؟! ريحة غريبة ملت الأوضة فجأة! لازم اتصل بالهاوس كينج علشان ينضفوا الأوضة.. نضفوها وبرضه لسه الريحة زي ما هي! واضح إنني لازم آخذ حمام تاني.. ٣ مرات آخذ حمام ولسه برضه عندي نفس الشعور بالقرف! واضح إن المشكلة مش في الأوضة، وأكيد مش في.. واضح كمان إنني لازم اتكلم مع زينة شوية قبل ما اتصل بأبوها.. علشان كده لازم أروحها على الشاليه فوراً.

- زينة.. فيه حاجة لازم أعترفك بيها!

- أيوه.. هتقولي انك بيئة ومن شبرا.. خلاص مش مشكلة..

أنا حبيبتك واللي حصل حصل!

- زينة.. أنا باتكلم جد.. أنا متجوز وعندي طفلة!

- أفندم!! إنت أكيد بتهزّر!

- مش باهزّر.. أنا باتكلم جد.. أنا فعلاً متجوز.

- يا سلام!! ولسه فاكر تقولي دلوقتي؟! طب وجاي على نفسك ليه كده؟! ما كنت تستنى سنة ولأ ستين نكون خدنا على بعض!

- ما انا لو ما كانش عندي ضمير كنت هاعمل كده.

- ضمير؟! وهو ضميرك يخليك تعيشني أسبوعين في وهم وانت متجوز وعندك طفلة؟!!

- ليه بتقولي عيشتك في وهم؟! أنا فعلاً باحبك وعايز اتجوزك!
- يا سلام!! عايز تتجوزني ازاي؟! طب ومراتك؟! ولأ هتقولي إنها قرفاك في عيشتك وإنك اتجوزتها غصب عنك والكلام القارغ ده.

- بالعكس.. أنا اتجوزت ريهام عن قصة حب كبيرة.. ولسه لحد النهارده باحبها ويمكن أكثر من الأول!

- إنت هتجنني؟! إزاي بتحبها، وإزاي بتحبني وعايز تتجوزني؟!!

- زينة.. أنا مش حالة شاذة!! أنا باحبك وياحبها... رجالة كثير عندها طاقة مشاعر تقدر تستوعب أكثر من زوجة وحبية وتوفق بينهم!

- متأسفة!! أنا اللي ما اقدرش استوعب أكون زوجة تانية! ولا يمكن هاقبل أعيش مع نص بني آدم!

- يعني إيه نُص بني آدم؟! أنا هاكون كلي ليكي.. بروحي وجسمي ومشاعري.

- ده كذب!! إنت على الأقل هيكون نُص وقتك ومشاعرك لبتك ومراتك.. ده لو ما كانش أكثر، وانا مش مُضطرة أقبل ده!! ولأ تقصد يعني علشان مطلقه بيتقى أبوس إيدي وش وضهر إني لقيت واحد يتجوزني؟! لااااا.. مش انا يا إيهاب.. أنا زينة سوكارنو! وأكد انت فاهم كويس ده!

- ياااه!! فجأة رجعتي زينة سوكارنو ونسيتي الحب والجنون واللهفة؟! طب ما انتي اتجوزتي كريم مراد ابن الوزير السابق، وكان ليكي لوحدك، إيه اللي استفادتيه؟؟ خيانة وإهمال واستهتار وفي الآخر طلاق وانتي لسه في عز شبابك!! إيه المانع انك تستسلمي لمشاعرك وجنونك المرة دي كمان؟! مش يمكن تلاقي عند نُص النبي آدم ده كل حاجة محتاجاها؟! مش يمكن تلاقي في نُص مشاعره كل حب الدنيا؟! مش يمكن تلاقي في نُص وقته كل اهتمام الدنيا؟! يا زينة.. أحياناً راجل كامل وما بيساويش صفر، وأحياناً نُص راجل زي ما بتقولي لكن بيساوي مليون راجل!!

- برضه وإيه اللي يجبرني أجرب تاني وأعرض نفسي للفشل تاني؟! ما انا كده مستريحة.. وبعدين انتو ليه كلكم واخدين فكرة عن المُطلقة إنها وجبة سهلة ورخيصة؟! دي حاجة

تجنن! كل يوم يتقدملي راجل متجوز أو عجوز! هوّ انا خلاص يعني بقيت واقعة للدرجة دي! طب أقسم بالله لو قعدت طول عمري من غير جواز لا يمكن هاقبل غير واحد بالموصفات اللي انا عايزاها وبشروطي كمان! وطز فيك يا إيهاب، وطز في الحب، وطز في الرجالة كلها!! اتفضل مش عايزة أشوفك تاني!

- زينة.. بس انا بجد محتاجلك وصعب أعيش من غيرك! وانتي كمان محتاجاني.

- أنا ما اقدرش أنكر اني حبيبتك.. وما اقدرش أنكر كمان إنك ساعدتني على الخروج من أزمتي وغيّرت في حاجات كثير، بس كل ده مش مبرر إني أخون نفسي واقبل أتجوزك، أو أخون ضميري واقبل أسرقك من بتك ومراتك!! إيهاب.. أرجوك انساني وساعدني إني أنساك!! كمان اطمن عليّ.. أنا خلاص هارجع لبيت بابي وأدرس وأشتغل وأملا حياتي وابتدي من جديد كأني ما اتجوزتش أصلاً.

- زينة.. أرجوكي!!
- إيهاب.. أنا اللي بارجوك.. بلاش تخليني أكرهك! خليك ذكرى حلوة في حياتي!

- مش عارف اقولك إيه؟! بس طالما ده اختيارك يبقى خلاص.. ومش هينفع أضغط عليك أكثر من كده.. بس أرجوكي اوعديني فعلاً تعملي زي ما قلتي: تدرسي

وتشتغلي وتغيري حياتك للأحسن! يمكن تكون دي الحاجة
الوحيدة اللي هتصبرني على بُعدك، وخصوصًا لما أحس
اني كنت سبب في ده!
- إيهاب.. ممكن أطلب منك طلب؟
- اتفضللي.

- لو احتاجتك كصديق في يوم من الأيام ألاقك جنبني؟
- أنا اللي كنت هاطلب منك كده.. أرجوكي دايماً كلميني!
وثقي إني هاكون جنبك بأي صفة!
- ماااشي... سلام يا بوب!
- سلام يا أجمل زينة في الدنيا!

* * *

لم يكن الرحيل كالذهاب.. كان الرحيل عنها أشبه بخروج
الروح من الجسد الضيق حين يتوعدده العقاب.. نصف عمري
أو يزيد قضيته وأنا متكى على أحزاني، شارد في مقعد العودة،
تلاشت فيه أمام عيني كل الصور، وتبددت كل الذكريات،
إلا تلك التي قضيتها معها.. ترى أي مبرر سيدعوني للبقاء بعد
اليوم، وبعد أن تسربت من مسام جسدي طاقة الحياة؟! عفوًا
أيها الضمير الحاضر، لم يعد بإمكانني أن أستمع إليك، فلترحل
عني وتتركني لشيطاني هو أجدر منك على إبقائي حيًّا؛ فلديه
حلول! عفوًا يا من رافقتك دهرًا؛ فالיום صار لزامًا أن أتمرّد
عليك، أن أصم أذني عن نصائحك الدائمة: كن رجلًا ناجحًا،

كن زوجًا صالحًا، كن أبا عطوفًا ومُضحياً، كن... كن... كن...
كفاك وعظًا.. وأرحل طوعًا، أرحل فوزًا؛ فلن أكون إلا ما شئت..
لن أبقى أبدًا ذلك الصنم الرخامي الذي صنعته.. أنا لست هو..
أو ربما كنت هو ومللت. اليوم صرت حرًا.. حرًا بجنوني..
حرًا بأنفاسي التي تخرج بلا قيود.. بلا حدود.. من حتي أن
أعشق.. من حقي أنا أخطئ.. من حقي أن أولد من جديد في
جسد يُرضيني!!

ما كانش عندي أي مكان أرجعله غير عيادة بهلول! ده
المكان الوحيد اللي فيه كل حاجة غير منطقية، وده اللي انا
محتاجه دلوقتي محتاج لحد يقولي إني صح! محتاج لحد
يكلمني بلُغة ثانية غير لُغة العقل والفضيلة والضمير والحكمة!
محتاج لحد يوعدني بتحقيق الأحلام الصعبة المستحيلة!
محتاج لحد يُردلي زينة!

- افتح يا بهلول.. افتح أرجوك!

- أيوه مين اللي بيخبط.

- أنا إيهاب!

- إيهاب!!! أهلاً يا أستاذ... إنت ازاي عرفت بيتي؟! ده
من أهم قوانين عيادتي إن محدش يعرف عني أي حاجة
ولا حتى عنواني! بس واضح إنك قدرت بطريقتك تقنع
عويس المساعد بتاعي، ما انا عارفه واطي ومادي! بس
شرفتنى.. اتفضل اقعد.

- بهلول.. من فضلك لازم تساعدني.. أنا باغرق!
 - بتغرق؟! هههه.. لا واضح إن الموضوع كبير.. استنى أعمل
 فنجانين قهوة وآجي أسمعك.
 أكثر من ساعتين وأنا باحكي وبهلول بيهز راسه بانبهار، لدرجة
 إنني توقعت إنه هينصحنى أرجع لزينة من كتر ما كانت ملامحه
 متعاطفة معايا! لكن للأسف توقعاتي ما كانتش في محلها!
 - هايل!! ده كلام جميل وقصة رومانسية رائعة! وأعتقد إنك
 كنت محتاج لحاجة زي كده، وبالذات في التوقيت ده من
 حياتك.

- يعني انت موافق إنني أرجع لزينة واحاول معاها تاني؟
 - لا طبعا.. ولا كنت موافكك انك تسبب نفسك لمشاعرك
 بالشكل الرهيب ده.. يا صديقي الوقاية دايما بتكون خير
 من العلاج، يعني كان لازم تنسحب من تاني يوم، مش
 تدخل لنص البحر وانت شايل على كتافك زوجة وطفلة
 وفي الآخر تقولي الحقني باغرق! طب ما هو طبعا لازم
 تغرق.. بنت زي القمر واستايل ورومانسية! بس واضح
 انك نسيت تجربة «التحش» وناوي تبقى مجرد «شهريار»
 وتضيع من إيدك «شهرزاد» قصدي «عفاف» ولأ «ريهام»
 مش فاكر الواحد باينه عجز وبينسى!
 - ياااه!! حتى انت يا دكتور بتكلم بنفس لغة ضميري؟!
 كأنكم متفقين علي! ولأ الظاهر بقه إن عفاريتك حكولك

عن الخناقة اللي بتدور جوايا فحييت تعيش في دور المثالي
 وتنصحنى! لكن لا يا باشا! أنا مش جاي أخدرأيك ولا اسمع
 نصايحك، أنا جاي آديك فلوس واخذ شغل!
 - مش فاهم!! شغل إيه اللي عايزني أعملهولك؟!
 - أيوه!! إنت مش راجل واصل وليك كرامات وبتحضر
 عفاريت وأرواح وجن؟ يلا شوفهم ياخدوا كام ويغيرولي
 مشاعر زينة؟ بيتياللي سهل أوي ياثروا عليها ويقنعوها إنني
 أنسب بني آدم ليها في الدنيا!
 - متأسف يا أستاذ إيهاب!! أنا حدودي أجسام البني آدمين
 بس، لكن قلوبهم صعب، مش مسموحلي أدخلها!! ده غير
 إنني مش مقتنع أصلا بالمؤامرة دي!

- مؤامرة؟!
 - أيوه مؤامرة!! مؤامرة على ثلاثة: على زينة؛ البنت الضعيفة
 المكسورة اللي لسه خارجة من تجربة وسهل جدا ترمي
 في حضن أي حد يطبب عليها، وممكن بسهولة تحبك
 وتتجوزك، بس لما تفوق هتعرف إنها كانت سكرانة بالوهم
 وتندم.. زينة لسه صغيرة، ومن حقها تكمل مع راجل ليها
 لوحدها، ومش مضطرة بأي حال إنها تشارك راجل في
 مراته!!!!
 أما الضحية الثانية في المؤامرة فهي ريهام مراتك اللي
 اختارتك في بداية حياتها من وسط كل الناس علشان تكمل

معاك حياتها، ومش مطلوب منها النهارده تنكسر وتضحى
علشانك.

أما بقه الطرف الثالث في المؤامرة والأهم بالنسبة لي فهو
انت. أيوه انت.. بني آدم كافح وشقني وعمل بيت وزوجة
وأسرة.. عمل نجاح وشهرة.. ومش المفروض النهارده
يضحي بيهم بالسهولة دي علشان مجرد نزوة ممكن تكون
اتكررت في حياته كتير قبل كده.. وخصوصاً إنه فنان..
ولاً إيه يا فنان؟

- اسمع يا بهلول.. أنا مش محتاج نصايح من حد، وإدعى
تفتكر إني جايلك كدكتور.. أبداً.. أنا زي ما قلناك جايلك
كدجال.. والصفقة ابتدت بينا من الأول على كده: إنت
تديني الوهم وأنا أديك الفلوس!

- اطلع برّه!! باقولك اطلع برّه!! وعلى فكرة، إنت كان ليك
عندي ستميت جنيه.. اتفضل.. خداهم وما تورنيش وشك
تاني!! مع السلامة!

- إزاي أطلع برّه؟! طب هاروح لمين؟! أنا ما عنديش غيرك!
إنت الوحيد اللي بيحللي مشاكلتي ويحققلي أحلامي! طب
بلاش تأثر على زينة.. أتر عليّ أنا! ولو شايفني مريض
عالجني، أو امسح ذاكرتي ونسيني زينة.. أو لو شايف إن
عليّ عفريت خرّجه.. اعمل أي حاجة أرجوك!!!
- إيهاب.. إنت بتعيط؟! أنا عمري ما شفتك كده! ياريتك

سمعت نصيحتي وما وقعتش في مصيدة الحب! بس
خلاص ما تزعلش! أنا نويت أخرج العفريت اللي عليك..
يلاً غمّض عينيك.

- إنت بتقول إيه؟
- باقولك غمّض عينيك لو عايزني أخرج العفريت اللي جواك!
- حاضر يا دكتور.. آديني غمّضت.

- ارجع بالذاكرة خمس سنين لورا.. تخيل نفسك وانت
بتعرض حُبك على ريهام لأول مرة وكل حلمك إنها توافق..
تخيل إنها ابتسمت ووافقت.. تخيل سعادتك في اللحظة
دي وأحلامك ليكره مع البنت اللي اختارتها.. فتح عينيك..
بُصلي.. غمّض تاني.. في لحظة وانت قاعد معاها هييجري
شريط حياتك أدام عينيك وتهترف إنك هتقابل زينة في يوم
من الأيام وتحبّها.. دلوقتي مطلوب منك تعترف لريهام
إنك هتحب أو هتتجوز عليها في يوم من الأيام.. يلاً ورّيني
شجاعتك.. بس خلّي بالك: ريهام زي أي بنت.. يعني أكيد
هتسيبك وتمشي.. عندك استعداد تسيبها وتدور على واحدة
غيرها تقبل بشروطك؟ هل فعلاً هتقدر؟ طب لو ندمت على
ريهام بعد كده، يا ترى هترجع وتقولها إنك كنت بتهزّر
معاها؟ وهتوعدها إنك هتكون طول العمر ليها لو حدها؟
طب لو وعدتها بده، هتصدق ولا هتطلع ندل وتخلف
وعدك؟! فتح عينيك وبُصلي.. غمّض تاني.. تخيل صورة

تانية: تخيل إن زينة وافقت واتجوزتك وريهام ما عرفتش ..
 وبعد سنة أو اتنين بقت زينة زي ريهام؛ مجرد زوجة عادية
 بدون توهج في المشاعر ولا الرغبة، وبقيتوا تتخانقوا زي أي
 اتنين على مصروف البيت ومشاكل الولاد، تخيل مشاعرك
 ساعتها، وقارنها بمشاعرك دلوقتي! طب تخيل إن ريهام في
 التوقيت ده عرفت وطلبت الطلاق، يا ترى هتقدر تضحي
 بيها وبيبتك وتسيب كل اللي حققته علشان الزوجة الثانية
 اللي بقت دلوقتي مجرد زوجة؟ ولأ ساعتها هتطلق زينة
 وتقولها أنا آسف مش هينفع أضحي بحياتي علشانك؟
 فتح عينيك.. وقولي دلوقتي إيه قرارك؟
 - مُشكر يا دكتور.. أنا هامسح رقم زينة!
 - مبروك يا أستاذ.. العفريت اللي كان عليك خرج.. بس
 يا ريت ما تسمحلوش يسكنك تاني!
 - ادعيلي يا دكتور.. ادعيلي أعرف أكمل حياتي كده.. من
 غير العفريت!
 - أنا واثق إنك هتقدر.. وواثق كمان إنك إنسان محترم..
 وما تستغربش إنني باقولك محترم بعد كل اللي عملته
 هههه.. وده لأن التجربة أثبتتلي إن الراجل اللي بيحب
 الستات نوعين: نوع محترم عنده ضمير رغم أخطاؤه زي
 حضرتك كده؛ يعني بيحافظ على حُب مراته ويحاول
 يسعدها بكل الطرق، وكاره من جواه للغلط، ونفسه

يتصلح. والنوع الثاني برضه بيحب الستات لكن غاية
 في القذارة؛ يعني تلاقيه كريم مع الستات برّه - في الحُب
 والاهتمام والفلوس وكل حاجة - وبخيل جداً مع مراته
 في نفس الحاجات، وممكن كمان يهينها أو يضربها
 بسبب إصراره على الخطأ؛ والنوع ده ما ينفعش يتعاشر
 أصلاً! والحمد لله إنك من النوع الأولاني، وإلا ما كنتش
 هاساعدك من أصله!
 - ادعيلي فعلاً ما كُنش النوع الثاني، ولا النوع الأولاني!!
 ادعيلي أكون إنسان عادي، زوج عادي!!
 - مش باقولك.. أهو رفضك ده اللي هيخليك تتغير للأحسن..
 لأنك بتقاوم الفنان المتمرد اللي جواك، وما بتعملش زي كثير
 من الفنانين والمُبدعين اللي ربنا فطرهم على حُب الستات،
 واللي بيستسلموا لتزواتهم لدرجة إنهم ما بيعملوش أسرة،
 ولا بيت، ولا ولاد، ويموتوا في الآخر في أوضة ضلمة
 لوحديهم.. وبعدين أنا واثق إن نظرك قوي ودي ميزة..
 وأكد شايف بوضوح النعم الكثير اللي ربنا ادهالك: عندك
 الصحة والفلوس والستر، عندك الأسرة والزوجة والولاد،
 عندك حُب الناس والسيرة الطيبة... يااه!! دي حاجات
 الناس بتحارب علشان تحققها، مش معقول تغمض عينيك
 عنها وتموت من غير ما تستمتع بيها علشان فيروس دخل
 حياتك ويحاول يدمرها!

- طب ده حل مشكلتي واللي ممكن نكون وصلناله.. طب

وحل مشكلة الست بتاعة الرسالة؟

- ما انا قُلتك قبل كده.. بس هاقولك تاني: ابعتها كل اللي

وصلناله، وقولها إن حُب السَّات فطرة ربنا فطر عليها

الراجل علشان يحافظ على النوع، وإلا ما كانش أي راجل

اتجوز من أصله، قولها كمان إن الراجل كائن مَلُول وبيعشق

التغيير، وطمنها إن جوزها من النوع الأولاني- زي ما فهمنا

من رسالتها- وانصحها تصبر عليه وتصاحبه وتحرك ضميره

بالقرب من ربنا، أو تشغله وتشغل نفسها بمشاريع خاصة

بمستقبلهم ومستقبل أولادهم، أو حتى مشاريع نبيلة تفيد

الناس.

- بس تفكر يا دكتور مفيش حل جذري لنوع الرجالة اللي

زينا؟

- للأسف.. ربنا خلق الراجل كده مَلُول وبيحب التجديد لأن

تكوينه تعددي بالفطرة، عكس المرأة اللي تكوينها أحادي،

وما ينفعش تحب غير راجل واحد، علشان كده حتى في

الجنة ربنا هيكافئ الراجل المحترم بسبعين حور عين،

وهيكافئ المرأة بجوزها بس، ده طبعا بعد ما يخلصه ويطهره

من كل عيوبه وذنوبه.. أما بالنسبة لحالتك والحالات اللي

زيها، فأعتقد إن الحل الوحيد والمُتاح دلوقتي هو الوقاية،

يعني زي ما قُلتك إوعى تكون مجرد «حمادة تحش» تاني،

ابعد عن أي تجربة ممكن تسوقك للحب أو الرغبة، وأكد

انت واللي زيك من الرجالة الخبرة بقيتوا فاهمين أنهي بنت

وأنهي تجربة اللي ممكن تودي للطريق ده.

- بس بجد حرام! إحنا كده بتتعذب.. يا ريتني اتولدت في

العصر اللي فات! لَمَّا كان الراجل بسهولة ممكن يحب

ويتجوز على مراته من غير ما تزعل أو ترفض أو حتى

تطلب الطلاق!

- معاك حق.. الرجالة القديمة دي كانت أسعد مننا بكثير!

بس للأسف كان برضه على حساب حق الزوجة اللي

كان مهضوم؛ كانت تُعتبر شبه ملكية للراجل، علشان كده

انفجرت وتمررت في العصر بتاعنا، وطالبت بحريتها

لحد ما أخذتها بالكامل.. هههه.. وابتدينا احنا دلوقتي اللي

نطالب بحقوقنا وحریتنا!!

- طب ليه فعلاً ما نتمرر دس احنا كمان ونطالب بحريتنا وحقنا

في امرأة تانية على الأقل؟!!

- للأسف.. ما بقاش ينفع دلوقتي؛ لأن ثقافة المجتمع اتغيرت،

وجواز الراجل على مراته بقى شرخ كبير وخيانة ليها- حسب

ما علموها- يعني علشان تتجوز عليها لازم تخسرها أو

تكسرها، والحلين أسوأ من بعض، ومعناهم التضحية بزوجة

وبيت وأولاد علشان زوجة تانية.. علشان كده هتلاقي

دلوقتي رجاله كثير متجوزة في السر أو حتى عرفي، ومنهم

اللي ما عندوش دين أصلاً ومصاحب على مراته.. وده كله بسبب مجتمع مُشوّه أخلاقياً؛ بيقبل العلاقات دي أكثر من الجواز الرسمي المُعلن!!

- طب والحل؟

- الحل إننا نربي بناتنا على تقبُّل الفكرة دي: فكرة التعدد، ونصنع جيل مؤهل لده، لأنه في السنين الجاية هيبقى الحل الوحيد لإنقاذ الرجل بشكل خاص والمجتمع بشكل عام من الانحراف.. وآخر نصيحة ليك إنت بشكل شخصي: لازم ترجع لربنا وتصبر، تشغل نفسك بالطموح والأحلام؛ أحلامك لنفسك وليبتك ولبنتك! ده الحل الوحيد عندي وسامحني إني ما عنديش غيرُه!

- طب والحب اللي ممكن يهاجم الرجل حتى وهو متجوز؟ عيش مع الكتب

زي اللي حصلتي كده؟

- أنهو حُب يا أستاذ إيهاب؟! إنت دلوقتي اللي هتجاوب مش أنا.. يلاً بقه كلمني عن الاحتياج العاطفي عند الرجل.. السؤال اللي ما وصلتش لإجابته لا من «قيس» ولا من «جوليت»، وأدي زينة بتمثل البنت الرومانسية اللي كنت بتحلم بيها! - بس انا باتكلم عن الحُب اللي ييلخبط الموازين، ويخدر العقل، ويلغي الإرادة! الحُب اللي بيجدد خلايا الجسم، ويعيد الرغبة في الحياة! الحُب اللي بيرد الشباب ويرر الجنون! الحُب اللي انت شايفه في عينيا دلوقتي!

- أوبيااا... يعني كل كلامك للشيخ «سهيل» كان غلط.. كنت بتقرأ كلامي وانت مش مُقتنع؟! - أنهو كلام بالظبط؟

- شكلك نسيت!! الكلام عن حب الصفات والعشرة والبيت! الكلام عن احترام الحبيبة والخوف عليها! الكلام عن قيس المُراهق اللي كان بيحلم بزوجة مش بتاعته، واللي ضيَّع عمره علشان وهم اسمه ليلي! الإنسان الفاضي اللي ملوش هدف يا أستاذ إيهاب! فاكُرُه؟!

- أيوه افكرت.. بس يظهر إن دايمًا اللي على الشَّط عوَّام، وواضح إني كنت ساعتها على الشَّط!

- لا يا صديقي.. الذكي هو اللي بيعوم على الشَّط، وجوَّ البحر، وفي وسط الأمواج كمان! الذكي هو اللي يفهم إن الحُب هو اللي ربنا سبحانه وتعالى سمَّاه «المودة والرحمة»! الحُب اللي بيتولد جوَّ البيوت مع العشرة والإخلاص! حُبك لريهام يا فنان يا رومانسي! مش الحُب المستحيل بتاع «روميو وجوليت» اللي كان هيتهي بمجرد إن أهلها يوافقوا على جوازهم! ولأحُب قيس ليلي اللي كان هيتهي برضه لنفس السبب لو أهلها وافقوا! ولأحُب الأمير لسندريلا واللي ما سمعناش عنه بعد جوازهم!

- عندك حق يا دكتور.. بجد فوقتني.. واضح إني كنت سكران.. مُتشكر أوي.. إنت بجد إنسان عظيم! ويا ريت

ييجي اليوم اللي انت كمان تتمرّد فيه على حياتك المزيفة
دي وترجع لأصلك: دكتور بهاء العبقري!
- طب وبعدين هاعمل إيه بالعبقرية؟

- تكرر التجربة تاني، وتفتح عيادة من جديد، ولو ما كنتش
نجحت هنا في طنطا يبقى ليه ما تفتحهاش في القاهرة أو
أي محافظة تانية ممكن تتقبل تخصصك النادر ده؟ صدقني
بجد، البيوت مخروبة ومحتاجة لحد زيّك يصلحها!

- هههه.. شوف يا صديقي: أولاً لازم نتفق إنني مش الدّجال
الوحيد في البلد دي، وان نص بلدك دجالين، على الأقل أنا
دكتور ومعايها شهادة، الدور والباقي على الدّجالين الكثير
اللي معهمش أي حاجة: المنتج اللي بيحرك ضمائر الناس
بأفلامه وهو في الأصل جزار، رجل الأعمال اللي قرر يفتح
فضائية علشان يجامل السّلطة فتمشي له مصالحه وبالمرّة
يفسد عقول الشعب، الصحفي أو الإذاعي اللي اتخرّج من
الحقوق أو التجارة ووظيفته يحل المشاكل الاجتماعية،
الدكتور اللي مش دكتور، والمحامي اللي مش محامي،
والوزير اللي مش وزير، يبقى اشمعني انا الدّجال الوحيد
اللي أعتزل؟ دي الحاجة الأولانية، أما الحاجة التانية بقّه
إن قرار الاعتزال بالنسبة ليّ زي التعدد بالنسبة لك بالظبط؛
قرار محتاج زمن تاني وجيل تاني، زمن ينصر العلم على
الجهل، وجيل يؤمن بالأدوية أكثر من السّحر، جيل بيشتغل

ويكافح بجد مش يحلم وهو قاعد على القهوة! ساعتها
هيبقى ليّ دور في حياتهم كطبيب!

- أيوه بس الناس الطموحة دي كثير، وموجودة ومحتاجالك!
- أنا معاك.. بس الناس التانية أكثر.. والناس التانية دي همّ
جمهوري اللي محتاجلي.. وزى ما جمهورك كصحفي
وكتاب همّ الناس المثقفة والواعية، أنا كمان جمهوري
همّ الناس البسطا والغلابة.. الناس اللي ما عندهم
طريقة لتحقيق أحلامهم غير بالوهم، إما بسبب جهلهم
وإما بسبب المحسوبية والعدالة الاجتماعية اللي ضاعت..
كمان ما تنساش إن ليّ جمهور كبير من المرضى اللي
مش لاقين سراير في المستشفيات العامة، ولا معاهم
فلوس للمستشفيات الخاصة، ولا حتى ناوين يموتوا
فيران تجارب في مراحيض مستشفيات التأمين الصحي..
دا جمهور مش قليل.. ده غير بقّه البنات الغلابة اللي مش
لاقيين عريس، والشباب المُحبط اللي مش لاقى وظيفة
ولا شقة.. الناس دي كلها هتعمل إيه يا أستاذ إيهاب؟!
الناس دي ما عندهاش حل ولا أمل غير في بهلول الدّجال
اللي بيقدر يبيع ليهم الوهم في حجاب!

- عندك حق!! وللأسف أنا كنت واحد منهم!
- هههه.. متأسف إنني جرحتك بدون ما أقصد.. بس انا واثق
إن التجربة دي غيرتك انت كمان.

- أكيد يا دكتور.. وبجد مُتشكر للمرّة المليون، ودايمًا هاكون
على اتصال بيك، بس معلىش آخر سؤال قبل ما امشي.
- اتفضل.

- أقول إيه بقّه لصاحبة الرسالة؟
- لا!! بجد أنا كده اتشليت.. يا عر بيبييس.. تعالى خُد الأستاذ
ده وهاتلي الزبون اللي بعده.. حي حي.

الرد

إلى السيدة الفاضلة: ر.ح... صاحبة الرسالة
الحائرة
إلى السيدة الفاضلة رانيا حافظ... رئيس التحرير
إلى السيدة الفاضلة ريهام حسن... زوجتي المصون
أرجو قبول اعتذاري، فليس بمقدوري الإجابة
على السؤال!

* * *

ملحوظة: مرفق مع الرد- لمن يهمه الأمر- ورقتين:
الأولى: استقالة غير مُسببة ومفتوحة التاريخ.
الثانية: توكيل عام بكل شؤوني وممتلكاتي باسم
زوجتي.
ولمن يريدني كما أنا:
عنواني الآن هو طنطا - عيادة الشيخ بهلول.
وهاتفي الجديد هو: «زيرواتناشر أربع ستات أربع
ستات».

وأشهد أن لا إله إلا الله.. محمد رسول الله.
والسلام عليكم.

الحائز
م.!

إهداء

لسه.. ريهام محمد حسن والدكتور عمرو خالد... أغلى الناس.

شكر

لكل الأصدقاء والأساتذة اللي دايماً جنبي:
مصطفى الفرماوي، الدكتور محمد المهدي، محمد فتحي،
كريم الشاذلي، هشام الجنج، محمد رفعت،
هشام محيي، بشير المدني،
وهبة السواح.

ربيع الكتب
book-spring.com
عيش مع الكتب

للتواصل مع إيهاب معوض:
www.facebook.com/ehab.meawad

قناة اليوتيوب:
www.youtube.com/user/emeawadtv

ربيع الكتب
book-spring.com
عيش مع الكتب